


الرجال من بولاق والنساء من أول فيصل



الكتاب الأكثر مبيعاً في العشوائيات

قصة صراع حقيقية بين هند و جوز هيند و مولا إله و محكمة الأشرف

الرجوع للنشر والتوزيع

إيهاب معوض

عالم
الكتب

ALEXANDER SMSM

fb.com/Book.juice ©

الرجال من بولاق والنساء من أول فيصل
إيهاب معوض

تصميم الغلاف: كريم آدم

الترقيم الدولي : ٥-٢٦-٥١٥٣-٩٧٧-٩٧٨

رقم الإيداع : ٢٠١٢/١٤٥٢٠

الطبعة الأولى : سبتمبر ٢٠١٢

عصير الكتب

Facebook.com/groups/Book.juice

هذا الكتاب حصري على جروب عصير الكتب

انضم الينا لتحصل على كل ما هو جديد

تنبيه هام

اسم الكتاب لا يمت بأي صلة... من قريب أو من بعيد
لمضمون الكتاب، وأي تشابه بين الاسم والمضمون فإنما
هو من قبيل الصدفة، وليس للمؤلف أي معارف في
بولاق أو فيصل...

لمزيد من الكتب المصرية ..

جروب نصير الكتب

[FB.com/groups/Book.juice](https://www.facebook.com/groups/Book.juice)

أطول مقدمة كتاب في التاريخ

من زمان وأنا متعود أدرس تجارب الآخرين قبل ما أدخل أي تجربة...
علشان كده لما قررت أعمل الكتاب ده كان بديهي أدرس التجارب اللي
سبقتني في طرح قضية الخلافات الزوجية... وبالطبع كان أهم الكتب
دي (الرجال من المريخ والنساء من الزهرة) للكاتب الدكتور جون
جراي... علشان كده بمجرد ما سمعت عن الكتاب نزلت اشتريته فوراً
واعتكفت عليه في البيت لمدة أسبوعين كاملين... إني أفهم منه حاجة...؟
أبداً...

رجعت وقولت يا واد ما هي برضه غلطتك إنك اشتريت النسخة
العربي... (على أساس يعني إني مدارس لغات)... بصراحة فكرت
أشترى النسخة الإنجليزي بس للأسف الميزانية مسمحتش... لكن لما
قررت على غلاف الكتاب من بره إنه باع أكثر من ١٤ مليون نسخة...
ابتديت أتشجع تاني وأقول لنفسى يعني الراجل باع ١٤ مليون نسخة...
لو كسب في كل نسخة جوز دولارات يبقى دلوقتي أكيد عدا الفقر...
ومحدث عارف يمكن أبيع من كتابي حتى ولو ٥٠٠ نسخة أسدد بتمنهم
إيجار الشقة شهرين... المهم... مطولش عليكم قريرت الكتاب كمان كذا
مرة لحد ما فهمته... بس السؤال اللي كان محيرني... هل يا ترى الكتاب
ده بيععرض مشاكلنا إحنا ولا مشاكلهم هما، وحتى لو بيععرض مشاكل
تمسنا... يا ترى الحلول اللي قدمها مناسبة لشخصياتنا... يعني من الآخر

الكتاب ده مفيد لينا ولا لأ... وعلى ضوء كده هقرر إيه اللي هقدمه في كتابي... علشان كده قررت كالعادة أعمل بحث ميداني عن مدى تأثير النوع ده من الكتب على الناس في كل المستويات الاجتماعية... وقررت ابتدي بالعشوائيات على أساس إن فيها تلت سكان مصر يعني ٢٥ مليون بني آدم عايشين في ١١٢٦ عشوائية... تخيلوا...
|||||يا بلد...

١- مدى تأثير الكتاب على نساء عزبة الهجانة

أولاً تعريف بعزبة الهجانة:

هي إحدى العشوائيات المصرية، وتتبع أهميتها من خلال موقعها الجغرافي الهام على طريق مصر السويس الصحراوي والذي يتوسط سكان مدينة نصر وسكان التجمع...
أما عن دخل الأسرة هناك فقد يتعدى السبعين جنيهًا شهريًا وهو ما يزيد بكل الأحوال عن احتياجات الأسرة التي يتراوح متوسط عددها من ٩ : ١٥ فرد (يعنى البني آدم عندهم بياكل ويشرب ويلبس ويتعلم ب١٠ جنيه شهريًا) شوفوا البربخ!!!. ويعيش سكان هذه العشوائية في تجمعات سكنية يطلق عليها مسمى (عشش)... وهي عبارة عن هياكل متلاصقة يتم تصنيعها بأي خامة بداية من الخشب والطين والصفائح إلى بقايا فضلات الحيوانات الجافة... ولهذه الأبنية من الخارج طراز معماري مميز للغاية يشبه في تكوينه المقابر الجماعية... حيث لا يدخلها الهواء إلا في الشتاء القارص فقط محملاً بالأتربة والجراثيم نتيجة مروره بأكوام القمامة المتلاصقة... والتي تعترضه عدة مرات مما يجعل سكانها في مجملهم عبارة عن مادة علمية دائمة لطلبة المستشفيات التعليمية مثل القصر العيني وعين شمس والدمرداش... أما في الصيف فلا يعاني الأهالي هناك من حرارة الشمس الحارقة كغيرهم من باقي سكان القاهرة الكبرى... وذلك بالرغم من أن معظم العشش قد صمم سقفاها من بقايا علب الصفائح الصدئ والتي تساعد على نفاذ الحرارة للداخل... وعن سر اعتدال المناخ صيفاً في عزبة الهجانة يجيب أحد خبراء

الأرصاء الجوية قائلًا (إن انسياب المجاري والصرف الدائم في حواري عزبة الهجانة هو الذي يمنحها هذا المناخ الرائع صيفًا حيث تعادل مياه الصرف الصحي التي تغطي الشوارع وأحيانًا البيوت من الداخل درجات الحرارة فتمنحها الرطوبة، هذا في الوقت الذي تعاني فيه باقي الأحياء المجاورة من شدة الحرارة، الأمر الذي دعا الحكومة لأن تفكر جدًّا في أن تفرض عليهم ضريبة ترطيفية توازي الضريبة العقارية لدى باقي الأحياء، ولكن نظرًا للديمقراطية التي يتمتع بها الأهالي هناك فقد قاموا بتفويض مندوبهم في البرلمان للاعتراض على القانون الجائر، موضحين أن هذا المناخ المميز للعزبة صيفًا إنما هو قائم على الجهود الفردية للسكان - كل على حده - وأثناء قضاء حاجتهم في دورات المياه الجماعية التي تشترك فيها كل مجموعة عشش، والذي ينساب بدوره بعد ذلك في الشوارع في صورة مجاري... غير أن تسبب الحكومة في تأخير عربات الترنشات (سيارات نزع المجاري من البيوت حيث لا يوجد صرف صحي عندهم) لا يعتبر مساهمة منها في تحقيق هذا المناخ...

.....
ثانيًا رأي إحدى سيدات العزبة في كتاب جون جراي:

● مدام حميدة إيه رأيك في الكتاب اللي في إيدي ده، ويا ترى تعرفي عنه إيه...؟

— أيوه يا خويا... هو فيه حد ميعرفش الكتاب الأخضر بتاع المدعوق القذافي، الله يجحمه مطرح ما راح...

● لا يا فندم ده كتاب تاني خالص... لجون جراي...

— يا سيدي... أهو كلهم أنيل من بعض، إذا كانوا هما ولا الراجل اللي كان بيحكمننا... جتهم مصيبة تخدم كلهم.

لمزيد من الكتب الحصرية ..

جروب مصير الكتب

FB.com/groups/Book.juice

• أنا متأسف... واضح إن الموضوع فيه لبس... ده كتاب بيتكلم عن علاج الخلافات الزوجية...

— يا نور عيني الخلافات الزوجية عندنا مالهاش علاج، أصلها بعيد عنك وعن السامعين عندها المرض البطل... يعني قول للدكتور بتاعك ميتعيش نفسه...

• يعني أفهم من كده إن حضرتك رافضة الكتاب من أصله...؟

— لأ يا حبيبي وهرفضه ليه... ده حتى كتاب باين عليه إيمه وسيمه ويوزن يبجي نص كيلو...

• يا فندم إيه بس علاقة الوزن بموضوعنا؟؟؟

— معلش يا سي الأستاذ، أصل إحنا عندنا أهم حاجة في الكتاب والجرنال... وزنهم... علشان اسم الله على مقامك لما نترنق نبيعهم بالكيلو للمعلم مرزوق بتاع الطعمية يعملهم ولا مؤاخذه أراطيس...

• أيوه فهمت... يبقى علشان كده وزارة التعليم بتعمل الكتب بتاعة التلاميذ ثقيلة وتقطع الوسط... علشان لو اترنقوا يعني...

— براوة عليك... أديك فهمت...

• طب اسمحيلي حضرتك أخذ رأيك في بعض المواضيع اللي بيتناولها الكتاب...

— ولو اني مش فاهمة أنت بتقول إيه... بس اتفضل...

لمزيد من الكتب الحصرية ..

جروب عصير الكتب

FB.com/groups/Book.juice

● هایل... ده برضه فرق منطقي بس أنا بقى اللي هكتبه في كتابي لأن الدكتور للأسف نسي يتعرضله...

— ومالو يا خويا... ما أنت برضه الخير والبركة... وان شاء الله كتابك هيبقى أكثر من ٢ كيلو... بس أنت بقى افكرنا وهاتلنا منه شوية...

● من عيني يا هانم... ألف شكر... سلام.

٢ - لقاء آخر..... مع أحد رجال عزبة أبو حشيش

عزبة أبو حشيش أيضًا... تعد من أهم وأكبر العشوائيات المصرية... وتتمتع العزبة بنفس الطابع الذي تتمتع به غيرها من العشوائيات من حيث الأبنية المعمارية وحاله الطقس... غير أن هذه العشوائية تنفرد بتوجه غالبية سكانها إلى العمل (كفواعلية)... وعن الفواعلية يقول ديكارت رحمة الله عليه... (الفواعلية هم المرادف المصري للعبيد في عصر الرومان وهم أناس سقطوا من ذاكره المجتمع... يستيقظ الواحد منهم فجرًا تاركًا بيته خاويًا بلا نقود أو طعام متوجهًا إلى أحد الميادين العامة ليجلس بين أقرانه على الرصيف منتظرًا إحدى سيارات النقل التي يمتلكها أحد مقاولي المباني والهدد، حيث تأخذ السيارة إلى إحدى المواقع ليقوم هناك بحمل الطوب والرمل والأسمنت على كتفيه ويصعد بهم للطوابق العليا والتي قد تصل إلى عشرات الطوابق... وعلى هذا

يقضي طيلة اليوم بين الإجهاد والتوبيخ والإهانات مقابل بضع جنهات
قد لا تكفي قوته منفردًا ويظل هكذا (المنسي) على حالته إلى أن يشيخ
أو تصيبه أحد الأمراض التي تقعه كالغضروف مثلاً... ليعيش بقية
حياته كفأر تجارب في المستشفيات التعليمية)...

وفي سؤال خبيث لأحد المقاولين (لماذا لا تقوم باستئجار ونش كهربائي
بدلاً من هؤلاء الفواعلية الملاحين) أجاب (يا باشا ونش ليه... ده
الواحد منهم زي اللوري يجر ميت مقطورة، وبعدين أصل بيني وبينك
إيجار الونش دلوقت ٥٠٠ جنيه يعني يومية ٧٠ واحد منهم... ولا
إيه؟؟)...

عفوًا إن كنت قد أطلت عليكم الوصف... ولكن فقط حاولت أن أصف
لكم شريحة البشر التي سنقدم لهم حلولاً لمشاكلهم الزوجية...

وإليكم الحوار مع الأستاذ مرسي... أحد الفواعلية هناك:-

● الأستاذ مرسي، يا ترى سمعت قبل كده عن كتاب اسمه (الرجال
من المريخ والنساء من الزهرة)؟

__ يا صلاة النبي... يا صلاة النبي... هما الرجال والنسوان طلعا
المريخ...

لمزيد من الكتب الحصرية ..

جروب مصير الكتب

FB.com/groups/Book.juice

● لا يا فندم... مقصدش... ده مجرد اسم لكتاب بيتكلم عن العلاقات الزوجية...

— يا عم قول كده... لفيت دماغي... وكنت هتضيع الحجرين... بس هي العلاقات الأسرية ولا مؤاخذه عايزة كتب...

● أنا آسف... طب يا ترى ممكن أسأل حضرتك سؤال...؟
— عينيا اسأل يا باشا...

● الكتاب ده بيقول إن المرأة بتعشق فكرة الهدية وطريقة تقديمها أكثر من مضمون الهدية وقيمتها المادية يا ترى أنت مع ده ولا ضده...؟

— إن جيت للحق... أنا لا معاه ولا ضده... بس اللي اعرفه إن النسوان بتحب أي حاجة ببلاش... المهم بس الراجل يكع ويجيب... ولو حتى تجيبها المحيط... هتقولك (قمان)... أصل ولا مؤاخذه عندهم فارغة وميملهاش غير التراب... طب خد عندك... أنا مرة دخلت على الولية أم أحمد _ حرمانا المصون_ وفي إيدي نص كيلو نيغه بس إيه من اللي وصى عليها لقمان... وقولتها خدي بري نفسك... تقوم الولية الناقصة بصالي من فوق لتحت وتقول (ياما جاب الغراب لأمه!! نص كيلو بس!! هما دول يا حيلة اللي قدرت عليهم... طب والنبي دول هيكفوني أنا وأنت ولا هيكفوا العيال التسعة ولا هيكفوا أمك العاجزة اللي متلأحة جوة)... أنا بقى ربك والحق... نفسي اتسدت وحلفت بالطلاق مهجيب لها حاجة تاني...

لمزيد من الكتب الحصرية ..

جروب مصير الكتب

FB.com/groups/Book.juice

- لا طبياً معندهاش حق الست أم أحمد... ده بدل ما تشكرك وتعملك دعم معنوي... دي كده عملتك حالة من الاستياء، وعطلت الاتصال الإيجابي بينكم...

— على رأيك... أنا برضه قولتلها كده...

- طب ده بالنسبة للهدايا العامة... لكن بالنسبة للهدايا الشخصية يا ترى فكرت مرة تجيلها هدية شخصية في عيد جوازكم مثلاً... أو في الفلانتين...؟

— والله يا أستاذ مشاغل الواحد بتنسيه المناسبات والأعياد الحلوة دي، بس أنا مرة جبتلها جلبية كستور في أول طلعة رجب...

- جلبية كستور!!! على كلّ مش مهم مضمون الهدية، الدكتور قال المهم الطريقة... يا ترى قدمتلها إزاي...؟

— هقدملها إزاي يعني... رميتها في وشها وقولتلها خدي ياكش يطمر فيكي...

- طب والله طريقة جديدة... ها... ويا ترى هي كان رد فعلها إيه...؟

— حدفتني بيها وقالتي جتك نيلة عليك وعلى مجاييك... هو أنا يعني كنت محتاجة جلبيتك يا ابو جلبية...

- طب والله برضه ردها منطقي... بصراحة يا جماعة انتو بتعاملوا بعض بمنتهى الشياكة... بس أعتقد ان الدكتور (جراي) لو كان شاف طريقتهم دي في التعامل كان ولع في نفسه وفي الكتاب... ألف شكر... يا أستاذ أبو أحمد...

.....
ده كان باختصار رأي شريحة من الطبقة المطحونة في النوع ده من
الكتب ناخد بقى رأي الطبقة اللي بتطحن الطبقة المطحونة...

لقاء مع مدام صافيناز

● مدام صافيناز... انتي أكيد قرיתי الكتاب ده...

— أيوه أيوه... بتاع عطارد والزهرة...

● لا يافندم بتاع المريخ والزهرة...

— يا سيدي... آهي كلها كواكب... المهم أدخل في الموضوع علشان
راحة الجيم...

● تروحي وتيجي بألف سلامة يافندم بس ياريت متنسيناش في
الدعاء.

— دعاء إيه... بقوللك راحة الجيم، وبعدين أرجوك ادخل في
الموضوع أنا يومي مزحوم جدًّا، جيم ودكتور سنان وبالليل رايحة
الروتاري... يعني مش فاضية... خاالص...

● الله يكون في العون... هي الحياة كده يا ست هانم... كلها تعب
وشقى... وعلى كلِّ أنا مش هعطلك وهدخل في الموضوع...

— اتفضل...

● أنا كنت بس عايز أسألك إيه رأيك في المشاكل اللي عرضها
الكتاب بتاع جون جراي وطريقة حلها... ويا ترى مناسبة لمجتمعنا
الشرقي...؟

— مش فاهمة... أرجوك وضح شوية...

- يا مدام واضح إن حضرتك مقرتيش الكتاب من أصله...
_
- بصراحة هو عندي بس معرفتش أقرأه... أصله مكتوب بالعربي
_ وانا مش بعرف عربي، ولفيت كتير على النسخة الفرنساوي بس
ملاقيتهاش...
_
- ها... ها... بصرة... أصل أنا كمان كنت بادور على النسخة
_ الإنجليزي وملقتهاش... واضح إن إحنا في المنطقة العربية عندنا
مشاكل مع اللغة العربية... ويمكن ده السبب اللي مخلينا أقل دول
العالم في القراءة...
_
- أيوة فعلاً... هو ده السبب...
_
- طب مش مشكلة أنا هشرح لحضرتك بعض نقط الكتاب وتقوليلي
_ إيه رأيك فيها...
_
- افيك بليزبير(بكل سرور)...
_
- يعني مثلاً... الكتاب بيقول إن الزوجة لما بتشكي لجوزها عن أي
_ حاجة بيكون هدفها إنه يسمعها ويتفاعل معاها... مش إنه يحللها
المشكلة... إيه رأيك في طرح النوع ده من المواضيع...؟
_
- والله أنا شايفة إن الموضوع عندنا أعقد من كده بكتير...
_
- إزاي يعني...؟
_
- يعني مثلاً عندهم في أمريكا وأوربا وغيرها من البلاد اللي انتشر
_ فيها الكتاب... الناس ثقافتهم مختلفة يعني بمجرد ما بيعرفوا

لمزيد من الكتب الحصرية ..

جروب عصير الكتب

FB.com/groups/Book.juice

المشكلة ويكتشفوها فوراً بيعترفوا بيها ويخدوا خطوات لحلها...
لكن إحنا عندنا... بنبقى عارفين المشكلة بس رافضين نلها...

● طب تفكري إليه مبتقدرش نلها...

— بقولك مبنرضاش نلها... مش مبتقدرش...

● برضه إزاي...؟

— هقولك... أنا مثلاً عارفة إن جوزي بيكره فيا حاجات كتير وعارفة
— بالتحديد إيه هي الحاجات دي، بس مش ممكن هغيرها لأنه هيتعود
على كده ويفضل كل يوم يطلب إني أغير حاجة تانية، وهو كمان
نفس الطريقة، عارف إني معترضة على حاجات كتير في
تصرفاته بس مصمم ميغير هاش علشان بيعتبر إن ده هيبقى
انتصار ليا وهيقلل من رجولته...

● أيوه تقصدي إن الكبر والعند هما السبب في احتفاظ كل واحد منا
بعيوبه؟؟

— مش بس كده... الكسل كمان...

● الكسل...!!! إزاي...؟؟

— يعني كتير مننا... عارف عيوبه.. بس اتعود عليها ومكسل يغيرها
— ومستتي إن الطرف الثاني هو اللي بيتدي أو حتى يستسلم ويتعود
عليها... أصل إحنا طبيعتنا كده، بنكره جداً التغيير...

● لأ بس ده ممكن يعمل تراكم بينكم... يعني يخلي كل طرف شايل
ومكتوم من الطرف الثاني... لحد ما ببيجي وقت وينفجر...

طب مهو ده فعلاً اللي بيحصل... يعني أومال المحاكم مليانة قضايا
طلاق ليه...؟

- عندك حق... يعني المشكلة عندنا مش إننا نعرف المشكلة...
المشكلة عندنا... إننا نقرر نحلها... واحنا طبعاً بنكسل ونتكبر
ونعاند... يعني مفيش فائدة...

تقريباً...

- طب أنا شاكر جداً لوقت حضرتك...

شكراً... سلام...

لمزيد من الكتب الحصرية ..

جروب عصير الكتب

FB.com/groups/Book.juice

نتيجة البحث

١- الفقر والجهل هما السبب في معظم الخلافات الزوجية في
معظم الأحياء البسيطة، ولا يمكن هيكول الحل عن طريق
روشته أو نصيحة أو حتى تدريبات، الناس دي محتاجة حد

يمدلهم إيداه ويطلعهم فوق الأرض علشان نشوفهم، وبعد كده نبتدي نفكر في حل مشاكلهم الأسرية...

٢- الكبر والعناد والكسل هما السبب في معظم الخلافات الزوجية في معظم الأحياء الراقية، ولا يمكن مشاكلهم هتتحل غير لما يعترفوا بعيوبهم، ويقدموا مصلحة البيت والأسرة على مصلحتهم الشخصية... الناس دي لازم يتزرع جواها الدين والقناعة ومش مهم ننصحهم لأنهم عارفين سبب مشاكلهم أكثر منا...

٣- فاضل الطبقة المتوسطة اللي هيا بتمثل ٧٠% من مجتمعنا... لازم ندخل في وسطهم ونعرف مشاكلهم ونحاول نساعدهم على حلها علشان كده اسمحولي أتتقل بيكم لموضوع الكتاب واللي هيحكي قصة هند وجوزها على اعتبار إنهم بيمثلوا الطبقة دي... يلا بينا...

عصير الكتب

[Facebook.com/groups/Book.juice](https://www.facebook.com/groups/Book.juice)

موضوعات الكتاب

- ١ . تعريف بهند وحكايتها إيه.
- ٢ . جاءنا العريس التالي.
- ٣ . يا دبله الخطوبة.
- ٤ . ليلة الدخلة.
- ٥ . المدام مبتعرفش ترقص.
- ٦ . حماتي ملاك.
- ٧ . هنداي بقي نتاوي.

٨. خريف المرأة الشهري.
٩. هدية عيد جوازنا.
١٠. الرجال لا يحبون المفاجآت.
١١. مبروك جالك بنت وولد.
١٢. فنانة جوزي الحملات.
١٣. جرب نار الغيرة.
١٤. جوزي بقى مستهتر جدًا.
١٥. الهانم عاملة شعرها.
١٦. أرجوكي سيبي الشغل.
١٧. مناخير جوزي.
١٨. جوزي بقى سايلنت.
١٩. جوزي بيخوني.
٢٠. هنداوي عايز يتجوز عليا.

تعريف مين هند وحكايتها إيه

لمزيد من الكتب الحصرية ..

جروب **عصير الكتب**

[FB.com/groups/Book.juice](https://www.facebook.com/groups/Book.juice)

هند... هي بطلة الكتاب ده... وهي أصغر إخواني البنات... بنت عادية
جداً... زي أي بنت... بتحلم كثير... بس معظم أحلامها بتصب في
الآخر في فارس الأحلام... وفارس الأحلام عند هند ميبقاش فارس إلا
إذا دخل البيت من بابہ... ساعتها بتسميه فوراً... ابن الحلال...
ابن الحيران... هو أول تجربة في حياة هند... لكن مش أول حب...
لأنها تجربة إجبارية... (على حد تعبيرها)... مش اختيارية... بمعنى
إنه أول واحد تقع عينها عليه يوم ما اكتشفت من تفاصيل جسمها إنها
بقت أنسة...

أمجد بقى هو طالب سنة رابعة تجارة... وأول حب في حياة هند (هي
بتقول كده) حاصرها بعنيه الزرقا أول يوم دخلت فيه الجامعة... ومن
ساعتها وهي بقت محسوبة عليه... يعني مفيش أي واحد من الدفعة
يقدر يهوب نحيتها...

للأسف أمجد بمجرد ما اتخرج هند اديتلو لقب (ندل) وده لإنه اختفى
ومبقاش يبجي الجامعة تاني... بس هي اعترفت لنفسها في أول يوم
تتشاف فيه على الكافتيريا لوحدها... وقالت (طب والله أنا عذراه لسه
أدامه جيش وكفاح طويل... إيه بقى اللي هيخليه يربط نفسه بيا من
دلوقتي).

هند من ساعتها قررت متدخلش تجارب تاني وقررت التفرغ لمستقبلها
ورفض أي واحد من العرسان اللي بيتقدمولها كل يوم والتاني...
عدت السنين (هوا)... واتخرجت هند من الجامعة وانتال من عليها
آخر غطا... وابتدت تفكر تشتغل علشان تشغل وقت فراغها... لكن
لإنها محترمة زيادة عن اللزوم أخذت وقت طويل جدًا لحد ما لقت
وظيفة مناسبة في شركة تصدير واستيراد...
أنا بقى إيهاب... ابن أم إيهاب وأخو هند الكبير وأقرب واحد ليها في
الدنيا، بتحكي لي كل أسرارها ومصايبها وأنا باسمع وبانصح على
عكس ماما وبابا اللي دايمًا يهاجموها.
أما بقى أكبر صدمة حصلت لهند في حياتها فهي بسببي أنا...
وبالتحديد يوم ما قررت أشتغل في الغردقة وأنقل كل حياتي لهنالك...
يوميه شفتها لأول مرة وهي بتعيط وحسيت أد إيه كانت بتحبنى...
يوميه مرضيتش تسكت غير لما حلفتها على المصحف إنني هنزل
القاهرة كل شهر وكمان هبقى معاها على التلفون والشات طول
الوقت...

جاءنا العريس التالي

لمزيد من الكتب الحصرية ..

جروب **عصير الكتب**

[FB.com/groups/Book.juice](https://www.facebook.com/groups/Book.juice)

من يوم ما سافرت للغردقة ما اتصلتس ولا مرة (بهند)... بس هي طلعت أجدع مني وكلمتني النهارده علشان تبشرنني إنها خلاص وافقت على عريس من اللي بيتقدمولها...
قالتلي إنه زميلها في الشغل بس عمرها ما شافته... لإنه على حد كلامها - خجول جداً وفي حاله ومالوش أصحاب... كانت شايفة إن عنده مميزات هائلة... يعني طيب وخجول وخام وعلى نيافته صفات عكس (أمجد) اللي كانت بتحبه!! وده اللي خوفني... لأن واضح إنها بدون ما تشعر بتختار شاب مختلف تماماً وفي كل حاجة عن تجربتها الأولانية اللي فشلت فيها، ودي في حد ذاتها غلطة... بس ربنا يستر...
الحاجة الوحيدة اللي ماكنتش عجاها في العريس هو اسمه... (هنداوي)... بصراحة اسم له إحياءات غريبة... يعني يا ترى له أصول هندية... ولا يمكن الست والدته سمته كده علشان خايفة عليه من الحسد... الله أعلم... هند اتصدمت أول مرة اتقدملها علشان كان لابس هدوم تضحك، وضارب لخرة ومتكلمش ولا كلمة، وكانت ناوية ترفضه زي كل اللي سبقوه... لكن رجعت وقالت (طب ما أدبي لنفسني فرصة تانية يمكن يكون فيه مميزات أهم من منظره) وده فعلاً اللي حصل...
لإنها في المقابلة الثانية والثالثة استريحته جداً وابتدت تكتشف مميزات الكثير، بس برضه علشان تتأكد من أخلاقه دخلت على صفحته على الفيس بوك و اتأكدت إنه مبيعلمش (آد) لأي بنت وكل اللي على صفحته خناشير...

.....
أنا فقلت مع هند بعد ما باركتها وطلبت رقم هنداوي واتصلت بيه
علشان أباركله هو كمان:-

- ألو... الأستاذ هنداوي؟؟
- أيوه أنا الأستاذ هنداوي... مين معايا؟؟
- انا إيهاب أخو هند...
- أهلاً وسهلاً... إزيك يا أستاذ إيهاب... والله أنا باسمع عن حضرتك كتير وكان نفسي أشوفك من زمان... أصل بصراحة هند ملهاش سيرة غير الكلام عليك لحد مزهقتني.
- زهقتك!! (لأ واضح إنه مدب) أيوه معلش أصل إحنا اخوات من زمان.
- أيوه أيوه، مانا حسيت كده برضه...
- (لأ ده كمان غبي) حسيت بايه يا أستاذ هنداوي؟؟
- حسيت زي ما حضرتك بتقول... إنكم يعني اخوات من زمان.
- (ما شاء الله... ده نفس دماغ هند... نفس الذكاء والنباهة، سبحان الله ما جمع إلا ما فوق) واضح إن حضرتك قوي الملاحظة جداً.
- ألف شكر ده بس من ذوقك...
- طيب يا أستاذ هنداوي... يا ريت نبقي على اتصال ببعض...
وياريت كمان نشيل التكليف... يعني خالينا أصدقاء...
- دي طبعاً حاجة تشرفني جداً...

أو لو غني هاتجبتها ذهب

وأنت وحظك

مش هاخصك

مبقاش عندك أي بديل

أو تدفن نفسك جنبيها

دبلة صفيح أو حتى خشب

تسحب بيها جاموسة وتمشي

تطلع حمرا... تطلع قرعة

مننا خلاص طبييت يا جميل

إلا إن أنت تولع فيها

أو تعمل مجنون في الهبل

دبلة صفيح أو حتى خشب

اتزفيت قصدي إتزفت

طلعت ست لأ طلعت قرد

آهي واحدة تعلمك الأدب

جيه المأذون بقى وأتأكدت

روحت البيت اتدريكت

جاي تتجوز وللا تفت

دبلة صفيح أو حتى خشب

وإذا جيت تتكلم ع الحب

ومحاضر وبوليس وأداب

إزاي تتكلم عالحب مش مكسوف وانت بقيت أب

قلبت من إسهاال لجفاف

ومخيمر بقى يشرب جاز

مجنون اللي يقول ياجواز

عيل والتانى بقيت أب

تلقي الشلايت ع الأجناب

أحسنالك فكر في عفاف

وعويس أبئك شم تراب

وسعاد طلعت في البوتوجاز

لو بس أعرف مين السبب

؟؟؟؟؟؟؟؟؟؟؟؟؟؟؟؟؟؟؟؟

دبلة صفيح أو حتى خشب

ما شاء الله ده إيه الرومانسية دي... ده انت شاعر موهوم
بس وحياتك بلاش تسمعها لهند علشان الجوازة دي تتم على
خير...

طب بلاش دي... أسمعك واحدة تانية...

لأ أبوس إيدك بلاش... أصلي بتأثر جدًا بالشعر
الرومانسي ده وبيعملي حساسية... يلا بقى تصبح على
خير...

خلاص يا سيدي... ملناش

-
نصيب... وانت من أهله...

التعليق العام

لأ واضح إن هنداوي كويس وعايز يعيش... وده اللي هيخليه يعمر مع
هند لأنها قوية ومفترية فبالتالي هيحترمها وطبعًا إحنا عارفين الإحصائية
اللي بتقول إن الزوج اللي بيحترم مراته وبيسمع كلامها (يعني بيقول
طيب وحاضر) عمره أطول ب ٤٠ سنة من الزوج اللي بيعترض
عليها... وده طبعًا واضح من كمية الأزواج اللي بيختفوا في ظروف

غامضة وبعد كده بيلاقوهم متقطعين في أكياس بلاستيك... كمان ده بياكده الازدحام الهائل بعنابر الكسور والحروق بالقصر العيني (قسم الرجال)... طيب... يعني هنداوي زوج مثالي... صحيح هو لاسع شوية لكن هند أسع من اللي جابوه وهتمشيه على العجين ميلخبطوش...

بس أنا عندي كام نصيحة لأي واحدة بتختار عريس... ممكن أقولهم...؟؟
١- الانطباع الأولاني مش مهم خالص ومش لازم يعجبك من أول مقابلة المهم تستريحيله بس، وكمان مش مهم جايب معاه إيه... فاكهة ولا ورد ولا سندوتشات، وحتى لو طلع جلياط وطبق إيدته في عشرة جنيه وإدهالك... استنتي شوية وشوفي المقابلة التانية يمكن يكون خجول أو معندوش خبرة...

٢- فرق السن مش مهم أوي... بس ياريت ميزدش عن ٥٠ سنة... كمان الفرق في المستوى المادي مش مشكلة (طالما بيشحت بكرامته) طب ما كل الشباب مش لاقية تاكل... لكن الخوف بقى من الفرق في المستوى الثقافي والاجتماعي... ده بقى اللي مينفعش... يعني مينفعش مثلاً دكتورة في الجامعة تنجوز (سمكري سيارات) ولا العكس... ممكن (نجار مسلح) ماشي بس يكون معاه دكتوراة زيها... (طب والنعمة أنا أعرف نجار مسلح معاه ماجستير)...

٣- بالنسبة للتجارب والخبرات السابقة فمنقدرش ننكر إن معظم البنات دلوقتي عندهم تجارب... يعني بالنسبة للبنات المحترمة أكيد اتخطبت كذا مرة... وبالنسبة للنصف محترمة أكيد اتجوزت عرفي كذا مرة... أما بالنسبة للمنحرفة خالص فأكيد مسجلة آداب... المهم يعني إن كلهم ليهم تجارب على اختلاف مستوياتهم وتربيتهم علشان كده بانصح أي واحدة إنها تنسى تجاربها السافلة أقصد السابقة وتدخل التجربة الجديدة على مية بيضة وبدون عقد وياريت متحكيش لخطيبتها حاجة... كمان بلاش كلكعة ومش كل حاجة تبان من العريس تخوفها وتقول (يا نهار اسود ده باين عليه زي اللي قابلته) لأن ده دليل على إنها بقت فعلاً معقدة... وبعدين هو حد لاقى عرسان من أصله؟؟ جتكم البلا...

لمزيد من الكتب الحصرية ..

جروب نصير الكتب

FB.com/groups/Book.juice

يا دبله الخطوبه

ألف مبروك... هنداوي خلاص دخل نص الققص برجليه... اشترى
الدبلة ولبسها لهند في احتفال عائلي بسيط... على أساس إن الشبكة
وكتب الكتاب والدخلة إن شاء الله هيكونوا مع الفرح الكبير...
من النهاردة قواعد اللعبة اتغيرت والعريس لازم يفهم إن الخطوبة
عندنا عبارة عن مركز إعداد وتأهيل... وده بيعطي الحق للقيادات العليا
(الأم والأب) بالمتابعة الدورية وإجراء كل الفحوصات الجسدية
والنفسية والمادية عليه للتأكد من صلاحتيه لأداء دوره المستقبلي
كزوج...

علشان كده ابتدوا يفحصوه بدقة على النحو التالي:-

١- الاختبار الطبي...

الحمد لله واضح من الهيكل العظمي لهنداوي إنه قوي البنيان (جثة
يعني)... مقاس القدم ٥٦ مع قليل من الفلات فوت... عرض الصدر
نفس مقاس القدم (ودي المعجزة)، عدد أصابع اليد اليسرى تشبه تمامًا
عدد أصابع اليد اليمنى مع اختلاف طفيف في أماكن السبابة
والوسطى... لون العينين صعب جدًا تحديده نظرًا لندرة هذه الدرجة
اللونية بين البشر والتي ترمي إلى اللون (الكحلي)... أما عن الشعر
العجري المجنون فهو يسافر في كل الدنيا دليلًا على انسداله، حيث
يكثر على الجانبين ويندر جدًا في الوسط (يعني من الآخر أصلع).....

لمزيد من الكتب الحصرية ..

جروب مصير الكتب

FB.com/groups/Book.juice

٢- اختبار القدرة المادية...

أهم حاجة إنه طموح ومجتهد وشاري البننت... بس قولي الأول...
بتقبض كام... وبيفضلك كام من المرتب بعد السجاير والمواصلات...
طبعا مفيش... مش مهم... إحنا بنشتري راجل... أهو بدل ما البت
تعنس... وعلى رأي المثل (خدوهم فقراء واشحتوا معاهم)... بس إحنا
مطمنين علشان واضح إن (الوالد) ربنا يديله الصحة لفترة محدودة..
نايم على خميرة... يعني غني... وان شاء الله بعد عمر قصير هتورثه
لأنك ابنه الوحيد... مش كده...؟؟؟

كمان إحنا عرفنا من مصادر مطلعة إنك عملت جمعية وقبضتها من
كام شهر يا ترى دي هتكفيك تشتري شقة تملك ولا ناوي تقضيها
إيجار جديد... لأ خد بالك إحنا مش بتوع الكلام ده...

أما بالنسبة للشبكة... دي حاجة ترجع لذوقك وانت كده كده هتخدها
معاك بينك بعد الجواز وأكد طبعا هتبعها بعد شهر العسل (أول لما
تترنق يعني)... علشان كده إحنا مش فارق معانا... هات أي حاجة
حسب ظروفك... بس خلي بالك الذهب بقى موضة قديمة... يعني كفاية
أوي خاتم سوليتير... زي منال بنت عمها... لأنها طبعا مش أحسن من
بنتنا... ولا إيه...

الفرح الكبير إن شاء الله هيكون عليك، على أساس إننا عملنا الخطوبة
عندنا في البيت... يعني واحدة بواحدة والبادي أظلم... كمان ابن خالتها
غانالك في الخطوبة انت بقى هتجيب عمرو دياب أو شاكير...

الموبيليا طبعا بالنص... إحنا هنجيب أدوات المطبخ (المعالق، الحلل)
وانت هتجيب خشب المطبخ والرخام كمان... إحنا هنجيب المرتبة
وانت هتجيب أوضة النوم (خشب زان)... وبالنسبة للأنتريه والصالون

والسفرة والمعيشة... كلها حاجات بسيطة ممكن تجيبها على أساس إننا هنشترى الستائر والسجاجيد... ومفيش مانع إن الوالد يهاديك بالأجهزة الكهربائية والنحف... المهم إحنا بنشترى راجل... وكل دي شكليات...

٣- اختبار الطاعة...

عندك مانع إنك تكتب مؤخر ١٠٠ ألف جنيه ولا نخليه إيصال أمانة على بياض علشان يعني لو لعبت بديك نوديك اللومان... دي بسيطة...
طبعا القائمة هتبقى عادية جداً... زي كل الناس... هنكتب فيها ١٦ أوضة و٣ مطبخ و٨ حمام وطبعا أبوك هيمضي شاهد علشان يبقى يونسك في السجن... ولا اقولك انت روح سلم نفسك من دلوقتي لأي مركز شرطة واخلص... بلا وجع دماغ...

٤- الاختبار الأيديولوجي...

ويا ترى انت تبع أنهي مذهب بالظبط وبتتبع أنهو (عمرو) فيهم... يعني وسطي وبتتبع عمرو خالد ولا ليبرالي وبتتبع عمرو حمزاوي ولا متغير وبتتبع عمرو أديب ولا انفتاحي وبتتبع عمرو دياب ولا مثلون وبتتبع عمرو موسي... شوف إحنا الحاجات دي بتفرق معانا خالص... لازم تعترف من دلوقتي... وخذ بالك البلد دلوقتي بقت إسلامية... يعني لو ليك أي ميول علمانية يبقى اخلع من دلوقتي مش عايزيين مشاكل... الدنيا اتغيرت وأمن الدولة دلوقتي بقى اسمه الأمن الوطني وساب الأخوان وبقى يمस्क في الثوار...

انت بقى مع مين فيهم... ميدان التحرير ولا ميدان العباسية...

لمزيد من الكتب الحصرية ..

جروب مصير الكتب

FB.com/groups/Book.juice

عن طريق المسمط الدائم بتاع (أم بيومي) اللي في الميدان...
وعلشان كده صنفوهم بأنهم حركة إرهابية...

- يا نهار اسود... إرهابية... يبقى على كده خطيب أختك إرهابي
زيهم...

- بصراحة أنا مش متأكد يا ماما هو يعني شكله كده يجيب إرهابي
وكمان اسمه على وزن أبو مصعب وابن لادن وصفوت الشريف...
يعني ليه لأ... بس انتي خدي حذرك وقتشي أكياس الفاكهة اللي
بيدخل بيها...

عصير الكتب

[Facebook.com/groups/Book.juice](https://www.facebook.com/groups/Book.juice)

هذا الكتاب حصري على جروب عصير الكتب

انضم الينا لتحصل على كل ما هو جديد

نتيجة الفصل

بصراحة العريس كويس وابن حلال... وبعدين هو حد لاقى عرسان دلوقتي... دي الشباب بقت تخاف تدخل البيوت... شقة تملك وشبكة بالشيء الفلاني وفرح وكوافير وفستان ده غير المؤخر والقائمة... إيه بقى اللي يخليه يخاطر ويدخل البيت وخصوصاً إن البننت يعني معندهاش مانع تقضيها كافيها، أهو سنة ولا اتنين ولا اتناشر لحد ما يخذوا على بعض وفي الآخر طبعاً العريس بيقلع... علشان كده البننت المحترمة أول لما يتقدم لها عريس جاد... لازم تمسك فيه بإيدها وسنانها... والأهل يعني كمان لازم يخلوا عندهم شوية رحمة ويخفوا على الواد ويقفوا جنبه...

وأهم من ده وده إنهم لازم يرجعوا زي زمان يسألوا عن أصله وفصله وكمان عن أخلاقه... يعني لو محترم ومن عيلة هيسألوا عنه في الشارع بتاعه أو في الشغل... أما بقى لو صايع وضايع يبقى لازم يروحوا يسألوا عنه في أقرب غرزة من بيته ويتأكدوا إذا كان بيضرب ولا بيترمل ولا بينيل إيه في حياته ويتأكدوا هل حد من أهله عليهم أحكام أو قضايا... يعني من الآخر لازم نسأل عن العريس وعن اللي جابوه... فهمتوا بقى كفاية استهتار وعدم تحمل مسئولية... محكمة الأسرة اتملت قضايا والبيوت اتملت مطلقات بسبب إننا بنقيم العريس بماركة عربيته...

ليلة الدخلة

لمزيد من الكتب الحصرية ..

جروب نصير الكتب

[FB.com/groups/Book.juice](https://www.facebook.com/groups/Book.juice)

- قبل المباراة:-

هند قاعدة بتتر عش... خائفة... هتموت من الخوف... النهاردة ليلة دخلتها... يا ترى إيه اللي ممكن يحصل (هي بتقول لنفسها)... ده أنا باسمع بلاوي عن الليلة دي... ويا ترى ممكن فعلاً يحصل زي ما طنط لولا حكّلي... يا نهار اسود... طب وبعدين مينفعش نأجلها ولا حتى نلغيها... ليه بس ياربي عملت ليلة الدخلة دي وكتبتبها علينا... هنداوي في بيته متسمر على الكرسي ومش عارف يلبس البدلة.*يا ابني ياللا... العروسة هتخلص الكوافير الساعة ٦. - يا عم أنا في إيه ولا في إيه... سيبنني في حالي الله خليك. * طب مالك بس خايف من إيه؟

- يعني مش عارف؟ ماهي كلها كام ساعة و هتطلع نتيجة الثانوية العامة والفضيحة هتبقى بجلاجل واللي ما يشتري هيتخرج... وانت عارف إنني مش مذاكر حاجة خالص وشكلي كده هضرب لخرة واتوتر وانام جنبها لحد الصبح... ويا خوفي من الصبح... بييجي الأهل ويسألوا... (ها... إيه الأخبار)... وطبعاً أنا مدهول وبيبان عليا... هاعترف من أول ألم... (ماحصلش حاجة يا بيه)... ليه بس يا ربي... يعني غلّطتي إنني كنت مستقيم ومش بناع ستات...

هكذا سيداتي سادتي... قدمنا لكم الوصف التفصيلي للاستعدادات التي يجريها كل من هند وهنداوي في إطار تصفيات الدور الأول لليلة الدخلة... ومن الوصف يتضح لنا إن العريس يفتقر إلى الخبرة الكافية والتي لن تمكنه من إحراز هدف الفوز في الدقائق الأولى كما هو مطلوب منه...

أما عن حارسة المرمى (العروسة) فهي تخشى عدم قدرتها على استقبال هدف مباغت قد يسبب لها بعض الإصابات...

- التعليق:-

وعلى ذلك يعلق الكابت (شديد عبد القوي) الخبير الكروي الشهير قائلاً:
(إيه يا جدعان الرجالة والسنتات الهلس دول... مالهم خايفين كده ليه؟ دا
الواحد اتجوز أربع مرات رسمي ومية حاجة وخمسين عرفي ده غير
الشقاوة والمغامرات والذي منه، ومحصلش أي حاجة) ثم التقت إلى
صورة إحدى زوجاته واستطرد قائلاً.. (الله يمسيكي بالخير يا أم
زينهم... مستحملتش في أيدي ٧ شهور... قاطعته أنا متسائلاً... إيه
ماتت...؟

فأجاب مستنكراً... فال الله ولا فالك... أقصد جابتلي جوز عيال...
فسألته مرة أخرى... وهل كنت تتعاطى أي نوع من أنواع المنشطات...
فأجاب مبتسماً... أيوة يا باشا ماهو برضه الحاجات دي بتساعد الرجل
مننا...

فسألته وما نوعها...؟

فأجاب مبتسماً فياجرا بلدي ياباشا... ثم واصل... ومن غير ما تسأل
يعني إيه فياجرا بلدي...؟ أنا هقولك... شوف يا سيدي انت تجيب جوز
حمام بلدي وتحمرهم في السمنة وبعد كده تضربهم في الخلط مع شوية
جوزة الطيب وقليل اسود وتحدفهم في بوقك... بس ياعم هتلاقي نفسك
بتطلع دخان من كل حته... وادخل بقى يا معلم واعمل أحلى شغل...
وفي استفسار آخر كاد أن يجعل الأستاذ شديد يفتك بي... طب ويا ترى
حصل لأي واحدة من زوجاتك أي مشاكل من اللي بنسمع عنها ليلة
الدخلة... فأجاب غاضباً:-... طب والله لو واحد غيرك سألني السؤال ده
كنت شقيته نصين... بس معلش واضح إنك عايز تتعلم... شوف يا
أستاذ... النسوان بتاعتنا ولا مؤاخذه متربية على السمن البلدي... يعني
ميفرقش معاها مليون ليلة دخلة... الدور والباقي على النسوان... بتاعتكم
اللي عمالة تترعش...

النتيجة

علشان النتيجة متبقاش صفر صفر والجمهور يحدفكم بالطوب لازم
تقهموا كذا حاجة وخصوصاً من واحد خبير زي حضرتي:-
- أولاً الكلام لهند:-

شوفي يا نونة... الموضوع بسيط جداً وراجع ليكي... يعني ممكن تعتبري إن المباراة مع غزل المحلة وممكن تعتبريها مع برشلونة... لو هتسمعي كلام طنط لولا ونصايحها اللي تودي في داهية يبقى توقعي أي مصيبة بسبب الارتباك اللي هيجيلكك... أما بقى لو هتسمعي كلام حد بيخاف عليكي زي ماما (وانتي عارفة طبعاً إن ماما خبرة بسبب الخمس جوازات) يبقى مفيش مشاكل، ولازم تفهمي حاجة مهمة جداً... إن هنداوي زي كل جيله مختلف تماماً عن جيل الكابتين شديد عبد القوي... يعني يادوبك لو جاب أوفسايد أول ليلة يبقى ده إنجاز... - ثانياً الكلام لهنداوي:-

إيه يا عم الفضايح دي... ضحكت علينا الناس... خوف إيه وتوتر إيه؟ شكلك كده كنت مقضيها أفلام ثقافية لحد ما جابت أجلك... يا عم اهدى شوية... الموضوع بسيط وكلها رزق وفتح من عند ربنا... وبعدين متخافش هند زيك بالضبط... يعني بلاطة... وانا واثق إنك في الجوازات الثانية ولا الثالثة هتبقى خبرة وزي الفل... وعلشان تطمن أنا هتبقى دلوقتي خطوات تعملها النهاردة... بس أرجوك التزم بيها وانت هتبقى زي الفل، شوف يا سيدي... انت طبعاً هتخلص الفرح وتأخذها وتطلعوا البيت واحنا طبعاً وراكم بالعريبات (بيب بيب ودوشة وكده يعني) وأكد هتكونوا تعبانين من الفرح والرقص والمعازيم... علشان كده أنصحك بالتريث والحكمة (حلوة أوي التريث والحكمة دي)... يعني متعلمش فيها أسد زي الأفلام، وتقول أشيلها واطلع بيها العمارة، أرجوك بلاش لأن الغضروف منتشر جداً دلوقتي... سيبها تطلع لوحدها وتدخل الشقة... وبعد كده خدها في حضنك وبوسها علي قورتها وقولها (ألف مبروك يا حبيبتني واضح إننا تعبانين ومتوترين جداً... إيه رأيك نقضيها النهاردة كوتشينة ونأجل باقي المواضيع لبكرة) طبعاً هي هتحترمك جداً وهتقدر حكمتك وخوفك عليها وهتقولك ماشي ياسبع!! سيبك منها ولا تاخذ في بالك... ابتدوا بعد كده اتمشوا في الشقة وافتكروا ذكرياتكم المأذلة أيام ماكنوا بتشتروا العفش... وواحدة واحدة ابتدوا خففوا من هدمكم (بس احترموا نفسكم وكل واحد يغير في أوضة لواحده) بعد كده هات الكوتشينة

المدام مبتعرفش ترقص

لمزيد من الكتب الحصرية ..

جروب مصير الكتب

[FB.com/groups/Book.juice](https://www.facebook.com/groups/Book.juice)

أولاً تعريف بالرقص الشرقي:

هو عبارة عن حركات انفعالية بهلاونية تقوم بها الراقصة بترددات مختلفة مستخدمة في ذلك مجمل مفاتها الجسدية والأنثوية بداية من الرقبة والتهدين مروراً بمنطقة الوسط حتى الوصول إلى الأرداف (بيت القصيد)، وتخرج منها تلك الاهتزازات بصورة مفتعلة وأبيحة في محاولة استثارة المتلقي قدر الإمكان... يساعدها في ذلك ارتداءها أو عدم ارتداءها قطعة دانتيل شفافة تظهر أكثر مما تخفي ملابسها الداخلية مما يضيف عنصر اللهفة والتشويق...

ومن خلال دراسة تشريحية أجريت على بعض الراقصات القدامى اتضح أن كمية النقطة (النقطة هي العملات الورقية المختلفة التي تنهال على الراقصة أثناء رقصها) تتناسب طردياً مع قدرتها على تحريك أعضاءها ومفاتها... ويحضرني هنا قول الأديب (جان بول سارتر) في وصفه لإحدى راقصات شارع الهرم قائلاً (ملين... وعهد الله... ملين) ولعله كان يقصد حين ذاك إحدى المعنيات.. إما لينة أو مسكرة... (يلا بقى الله يرحمه مطرح ما راح كان غاوي هلس ومسخرة)؟..

أما عن مفهوم الرقص الشرقي لدى النخبة والمتقنين فهو يمثل نوع من أنواع السربيتيز والشائع لدى بلاد الفرنجة... ولكن يتوارى عندنا خلف مسميات مختلفة مثل (فن شعبي)- (فن استعراضى) - (باليه مائي) أهو أي اسم مهذب وخلص... وعلى رأي الفنانة دينا في ردها على إحدى المذيعات (أنا مسميش راقصة يا عين ماما - أنا اسمى راقصة)... خذ بالك من مكان (الألف) في الكلمتين...

أما عن مصير الراقصات والرقص الشرقي عندنا فأظن أنه ثمة هاجس يؤرق العديد منهن تلك الأيام، وذلك بسبب الغزو الخارجي له على يد بعض بعض الراقصات (الروس) مما يهدد تراثنا العربي الراقص بالانقراض (ربنا يستر)...

ثانياً تاريخ الرقص:

وصدر سيلكون وعينين لينسيز وكمان الخلفية متبطنة... يا ليلة سوخة
يا ولاد... يعني الواحدة من دول لو استحمت تختفي...
ده نوع من البنات... وفيه نوع تاني مختلف تماماً... حيث تملك كل
منهن الإمكانات الكاملة بداية من الشعر حتى الخلفية... ولكن للأسف
بيرفضوا يرقصوا لأجوازهم؟؟؟ منهم اللي بترفض علشان بتتكسف
وشايفة الرقص قلة أدب، ومنهم اللي بتتكبر وشايفاه إهانة لأدميتها،
ومنهم اللي مبتعرفش ترقص من أصله، وده للأسف راجع للأسرة
وطريقة التربية وبالذات الأم اللي بتزرع في بنتها من الطفولة مفاهيم
مغلوطة عن الأدب... يعني عيب ترقصي لنفسك أو أدام المراية، عيب
تحطي روج، عيب تتدلعي، عيب تتمايصي، عيب تضحكي بصوت
عالي، عيب ضحكك يكون ليها رنة... كل حاجة عيب عيب... لحد ما
بتقضي على أنوثة البنت وتحولها لذكر... طب أنا أعرف واحد صاحبي
متجوز بقاله ١٥ سنة وعنده ٨ عيال ولسه مراته بتصمم تظفي النور
قبل ما يناموا مع بعض علشان آل إيه!! بتتكسف (دي مصيبة إيه دي)...
وأعرف واحد صاحبي كمان طلب من مراته ليلة الدخلة ترقصه راحت
شتماه (نعم ياروح خالتك... أرقصلك!! ليه هو أنا الجارية اللي جابهالك
أبوك) لكن الحمد لله صديقي طلع راجل حمش وحلف عليها بالطلاق
لازم ترقصه... الولية لقت نفسها هتتطلق وتفضح ليلة دخلتها... راحت
معيطه وقالتله... (أنا أسفة يا بيبى أصلي مبعرفش أرقص أرجوك نأجل
الموضوع ده كام يوم وانت بس إديني ٣ آلاف جنيه أروح أتعلم في
مدرسة رقص وأعدك هخليك تتجنن لما أرجع...) وفعلاً أخذت الفلوس
واختفت تلت شهور والراجل قاعد مكانه على السرير وفجأة دخلت عليه
الأوضة وشغلت موسيقى بيت هوفن وقعدت ترقصه باليه بحيرة
البيج!! وفعلاً الراجل اتجنن واهو من يومها متألح في مستشفى
الخانكة...

هنداوي بقى اتصل بيا من كام يوم وقاللي:

لحقني يا إيهاب هند نصبت عليا.....!!!!

•
إزاي... يا هنداوي؟

-
سألته قبل منتجوز إذا كانت بتعرف ترقص ولا لأ؟؟ ردت عليا بمنتهى الثقة وقالتلي (إيه يا دودي هو فيه واحدة متربية وبنيت ناس ومن عيلة مبتعرفش ترقص)... أنا طبعا فرحت جدًا وده اللي خلاني أمضي لأبوك على مؤخر ب ١٥٠ ألف جنيه... وقلت لنفسى يا واد مش خسارة في هند دي برضه بتعرف ترقص... لكن من يوم ما اتجوزنا وانا كل ما أطلب منها ترقصلي ألقاها بتتهرب وتقولي لما ناخذ على بعض... لحد إمبراح لما حلفت عليها لازم ترقص راحت معترفة إنها كدبت عليا وإنها مبتعرفش ترقص من أصله... يعني أنا اتنصب عليا...

•
طب وانا ها عمك إيه يا هنداوي... أبدلهالك بواحدة تانية بتعرف ترقص...؟

-
معرفش... اتصرف... إما تعلمها الرقص إما تديني الإيصال بتاع المؤخر...

.....

التعليق

تخليلوا... حتى هنداي انتصب عليه... الراجل يا عيني هايثشل...
وحالف إنه هيخونها مع أي واحدة بتعرف ترقص... وطبعاً دول كتير
لأن أي واحدة بتفكر توقع راجل بتدخله من المدخل ده، والغريبة إن
النوع ده من الستات كلهم بيعرفوا يرقصوا وبمنتهى الجرأة والإباحة...
و(هو المطلوب)...

أنا بقى مش فاهم ليه زوجاتنا المصونات المحترمات مبيحاولوش
يتعلموا الرقص طالما إحنا بنحب كده... طب والله العظيم... ده لا هو
عيب ولا حرام ولا يهين أي ست محترمة، وكمان ملوش أي علاقة
بمستواها الثقافي أو الاجتماعي...
وعلى فكرة الموضوع ده له أكثر من فائدة لإنها بكده ضمنت إن جوزها
عمره ما هيخونها ولا يتجوز عليها وهيفضل لابد في البيت لحد لما
بيجي أجله...
كمان لما يموت هتلاقي شغلانة محترمة تضمن لها لقمة عيش شريفة...

لعزيم من الكتب المصرية

جروب نصير الكتب

[FB.com/groups/Book.juice](https://www.facebook.com/groups/Book.juice)

حماتي ملاك

(حما + حما يبقوا حمايتين وانا اشوف العما ولا اشوف الاتنين) ده كويليه من أغنية لإسماعيل يس... غناها في السبعينات ضمن واحدة من مجموعة أفلامه المشهورة عن الحموات واللي كانت بتشاركه البطولة في معظمها الفنانة ماري منيب...

*السؤال الأولاني:

يا ترى الأفلام دي اتعملت بالصدفة واتزوج ليها بالشكل الهائل ده بسلامة نية، ولا سيكو سيكو...

الإجابة:

بصراحة أنا شايف إنه سيكو سيكو..... يعني لا هي صدفة ولا سلامة نية، ورأيي ده بمنتهى الصدق راجع لسببين...

- السبب الأولاني: إني زي كثير من الشعب المصري عندي ولا مؤاخذاة برنويا وبشك في صواب إيديا ومؤمن لحد النخاع بنظرية المؤامرة... وشايف إن أي مصيبة حصلت أو بتحصل في بلدنا من أول عصر بناء الأهرام لحد عصر بناء أسلاك شائكة حول ماسبيرو... لا يمكن تكون صدفة...

- السبب الثاني: هو كمية الدراسات الاجتماعية اللي اتعملت في الكام سنة اللي فاتوا واللي أكدت إن معظم حالات الطلاق عندنا بتبنتدي بخلاف بين الزوجة والحما...

إذًا هناك أصابع خفية أو قلة مندسة أو طرف ثالث أو ماس كهربائي وراء تلك الأحداث...

*السؤال الثاني:

ليه بقى الإعلام كان بيسوق للأفلام دي وإيه هدفه من عمل وقبعة بين الزوجة وحمايتها... وليه عايزهم يكرهوا بعض؟؟

الإجابة:

لأنه كان ولا يزال (حتى تاريخ طباعة الكتاب يوليو ٢٠١٢) إعلامًا مأجورًا هدفه هدم المجتمع المصري بشكل خاص والمجتمع العربي

بشكل عام... وده عن طريق تفتيت النواه اللي هي الأسرة وادينا شفنا النتيجة بعيننا في الكام سنة اللي فاتوا... لا يمكن زوجة توافق تتجوز وتقع مع حماتها... وبالتالي بتكون أعلنت من اللحظة الأولى عداها ليها، وبالتالي حماتها عمرها ما هتتسلها الموقف ده... وبكده ممكن نتوقع بسهولة نشوب حرب أهلية في البيت ما بين لحظة والتانية... علشان كده أنا باستشهد برأي هند وهخليكوا تسمعوا قصتها مع حماتها واللي هعتبرها دليل على إثبات وجهة نظري، اتفضلي يا هند احكي: شوف يا هوبه أنا لما اتجوزت هنداوي كان أول شرط ليا إننا منسكنش مع أمه في نفس العمارة رغم إن أبوه الله يرحمه كان سايب له شقة تمليك باسمه في الدور الأخير وتعتبر يعني ميراث... أنا بصراحة معرفش رفضت ليه رغم إنها كانت شقة ببلاش وهتوفر علينا مصاريف وديون كتير... لكن للأسف أنا ساعتها أصريت وقررت أضغط عليه لحد ما اشترى شقة تانية بعيدة شوية عن شقة حماتي... طبعاً الست زعلت جداً من موقعي ده ومكانتش عارفة أنا باعمل كده ليه على أساس إن علاقتي بيها أيام الخطوبة كانت كويسة جداً وهي كمان كانت بتعاملني زي بنتها بالظبط... المهم... بعد شهر العسل رحنا علشان نزورها أنا وهنداوي في شقتها وحاولت إنني أتعامل معاها بشكل لذيذ علشان أصفى الخلاف إياه بس كان واضح إنها قادرة تصفالي... هنداوي ساعتها قاللي (متز عيش هي أكيد طبعاً لسة زعلانة من موقفك بس بكره الحاجات دي كلها هتتنسي وتبقوا سمن على عسل) بس المشكلة إنني لقيت نفسي بدون ما أقصد شائلة منها أنا كمان ومعديش استعداد أزورها أو أسأل عنها تاني... وده طبعاً سبب خلاف كبير بيني وبين هنداوي... وعلى كده فضل الموضوع يكبر يكبر والخلاف يزيد، وابتدى هو كمان يرفض يزور أهلي، ده غير إن اخواته البنات بطلوا يكلموني أو يسألوا علينا... وكمان أهلي ابتدوا يخذوا موقف من هنداوي... وفجأة لقيت الدنيا كلها مولعة حوليا...

لمزيد من الكتب الحصرية ..

جروب عصير الكتب

FB.com/groups/Book.juice

كل الناس زعلانة من بعض وكل الناس بتكره بعض... وانا في وسطهم
مش عارفة أعمل إيه، لحد ما جيت في يوم بفتح التلفزيون لقيت شيخ
بيتكلم عن صلة الرحم وبيحذر اللي بيقطعوها...
انا بصراحة قعدت مع نفسي وقلت يا بت ما هو برضه إنتي السبب في
كل ده... يعني كان لازم تنشفي دماغك وتسكني بعيد عن حماك... طب
وهي يعني كانت عملتك إيه... ما هي ست طيبة وبتعاملك زي بنتها...
ده غير إنها عايشة لوحدها ونادر لما حد يبيزورها...
طب والله العظيم... لأنزل دلوقتي حالاً وأروح أزورها واللي يحصل
يحصل... وفعلاً نزلت وطلعت عندها... وأول لما خبطت على الباب
وفتحلي ودخلت، لقيتها لسة واقفة على الباب وفاكرة إن هنداوي
معايا...

رحت أنا قولتلها (لا يا ماما هنداوي مش معايا أنا جاية أزورك لوحدي
علشان إنتي وحشتيني)... بس يا سيدي... أنا مخلصتش الكلمة ولاقيتها
انفجرت في العياط... بصراحة مقدرتش أمسك نفسي ورحت وذاها
في حضني ولقيت نفسي بيعيط بحرقة أنا كمان من غير ما أعرف ليه...
يمكن إحساس بالذنب، يمكن تخيلت نفسي مكانها لما أكبر... معرفش!!
بس في لحظة تخيلت نفسي واحدة ست عجوزة وحيدة ضعيفة... مات
جوزها... وهجرها ابنها علشان يرضي مراته، وهجرتها بناتها علشان
يراعوا أجوازهم وولادهم...

ياااااا حسيت بشعور رهيب... ربنا ميوريهوش لحد... المهم يا سيدي...
خرجت من حضنها وأنا حالفة أعوضها عن أي جرح سببتهولها...
وقضيت معاها ساعات لحد ما هنداوي اتصل بيا وسألني إنتي فين...
وكان هيموت من الفرحة لما عرف إنني عندها وقالني خليك عندك أنا
جايلك حالاً... مفيش ربع ساعة وكان بيخبط على الباب... فتحته
بسرعة علشان أشوفه لأول مرة من يوم ما اتجوزنا وهو فرحان من
قلبه...

وحسيت إنني مش بس استرديت حماتي لكن كمان استرديت جوزي...
وبسرعة قررنا نقل للشقة اللي في العمارة معاها، علشان نكون جنبها،

وابتدت اخواته البنات يكلموني تاني وقرر هنداي إنه يعمل يوم كل أسبوع نزور أهلي بعد ما كان مقاطعهم لفترة طويلة...
هي دي يا إيهاب حكايتي مع الزمان أقصد حكايتي مع حماتي وقصة اليوم اللي فرق في حياتي كلها، وانتصرت فيه على نفسي وعلى الشعور الشيطاني الغامض اللي كان مخليني أكره حماتي...

شوقنوا بقى... هند في الأول وبدون مبررات كانت رافضة تسكن مع حماتها في نفس العمارة وكانت فاكرة إن دي أحسن طريقة علشان تستقل بحياتها وتتجنب أي صدام معاها... لكن طبعاً اللي حصل هو العكس تماماً واكتشفت بالتجربة إن حماتها ست طيبة جداً زي معظم الحموات وإنها مجرد أم بتحب ابنها، وكل أحلامها تشوفه سعيد، علشان كده أنا واثق أن أي زوجة ذكية ممكن بسهولة تكسب حماتها، بس بعد لما تشيل من دماغها الانطباع السائد عن الحموات ورواسب الإعلام الفاسد...

و دلوقتي عندي كام نصيحة لكل زوجة عايزة تكسب حماتها:
النصيحة الأولانية:-

ادخلي على حماتك المطبخ، وفي لحظة صفا اترمي في حضنها وعيطي بحرارة وانتي بتقوليلها: (الحقيني يا ماما... سي الأستاذ جوزي -اللي هو ابنها يعني -عايزني أطبخله محشي كرنب وأنا مبعرفش أطبخه... أرجوكي علميني وانقذي حياتي من الضياع).

طبعاً الست قلبها هايحن أو على الأقل هتفرح بدور الخبير وهتחס إنها بقت مسئولة عنك، وبكده هتضيع الندية والمنافسة من بينكم بس متزعلش لو ابتدت معاكي بجملة زي مثلاً:-

١- يا عيني عليك يا ابني... ده انت وقعت ولا حدش سمى عليك،

مراتك الخايبة مش عارفة تلف صباغ محشي... بس كانت

فالحة تلف عليك وتوقعك.

٢- جاتك البلا... أومال المحروسة أمك كانت بتعلمك إيه في

البيت؟؟

٣- كله من الخايب النايب ابني، قتلته يتجوز فوزية بنت خالته
شلبية، قاللي: (لا ياماما، أصلي مليش في السمين) وأدي اللي
أخذناه من المشفية.

٤- إتأندلي ادخلي المطبخ وانا جاية وراكي أهو الواحدة تعمل
الخير وترميه البحر... بس إياك يطمر فيكي انتي وأمك. طبعًا
انتي هتسمعي الكلام ده وهتقولي حاضر بمنتهى الأدب علشان
تكوني بكده عملتي بالمثل اللي بيقول (إذا كان ليك عند الـ...
قوله ياماما)

النصيحة الثانية:-

ادخلي عليها شقتها وفي إيديكي هدية قيمة مثلاً (صينية بسبوسة منتهية
الصلاحية) بشرط إن الهدية تكون بدون مناسبة يعني ولا عيد ميلادها
ولا عيد الأم... حطي الهدية بين إيديها وعينيكي مليانة دموع وانتي
بتقوليلها: (الصينية دي كنت جايها لماما لكن لما دوقت طعمها وشففت
تاريخ الصلاحية حسيت إنك أولى بيها من أي حد ثاني مهما كانت
غلوته)

طبعًا هتفرح بيكي جدًا والسكر هايعلع عندها وهاتأخذك في حضنها
وهي بتقوللك واحدة من الجمل دي:

١- ياما جاب الغراب لأمه.

٢- و دي بقى بمناسبة إيه يا عين أمك ولّا تكونيش فاكرة إن قلبي
هايصفالك بصينية بسبوسة.

٣- أيلة مانتل عارفة إنل عنءل السكر وعازلانل أكلها علشان
تلألل ملل؁ لكن ءه بعفلنك... قاعءة علل قلبك.

٤- طبعًا ما هل كلها فلوس ابني وهو انتل بعنل كنتل ءافعة ءاآة
من آلب أوكل. انتل برضه هلسمعل الكلام ءه بمنتهل الهءوء
بس هلصممل لأكللها الصفنللة كلها علشان تلضمنل إن العءاوءة
اللل بفنكم هلتنهل تمامًا؁ وبعء كءه هلفنكرلها بالآفلر.

ءل مآرء نصالآل فلرلل كل زوءة تعمل بفلها؁ وأنا شآصلًا أعرف كءا
واءة نفلءهل وءلمء لله... اسلرلآوا آااااااااااالص.

لمزفء من الكآب الصفرللة ..

آرول عمفر الكآب

[FB.com/groups/Book.juice](https://www.facebook.com/groups/Book.juice)

هنداوي بقى نتاوي

خريف المرأة الشهري

عصير الكتب

Facebook.com/groups/Book.juice

هذا الكتاب حصري على جروب عصير الكتب

انضم الينا لتحصل على كل ماهو جديد

في المستشفى بقى وأنا بأزوره – رحمة الله عليه- قاللي وهو بيطلع في الروح (والله يا إيهاب ما كنت أعرف إنه كيس أولويز) تخيلوا... الولد مات في عز شبابه بسبب كيس غامض.

ومن هذا المنطلق أنا قررت أعمل الباب ده علشان أحذر الشباب واقوللهم بلاش تتكلموا في الموضوع ده وبالذات أودام البنات اللي بتلعب رياضة. كمان ياريت لما تلاقي إعلان من إياهم في التليفزيون بلاش تركز وإوعى تسأل ده بتاع إيه... ثاني حاجة لما تلاقي زميلتك في الكلية فاطرة في رمضان بلاش تعمل فيها داعية إسلامي وتنصحها بالصيام وإلا هايحصلك زي صاحبي.

وآخر نصيحة هأقولها للزوج اللي لسة متجوز جديد ومش فاهم:-
شوف يا سيدي لما تلاقي المدام في أيام معينة من الشهر عصبية جداً وعدوانية وعندها فتور من كل حاجة ومش طايقاك ولا طايقة العيال ولما تيجي تكلمها بترد بعصبية: (غور من وشي الساعة دي لحسن عفاريت الدنيا بتتنطط في وشي) أو (اتلأح في أي حنة دلوقتي علشان روحي في مناخيري)

ساعتها لازم تخليك خفيف وتخلع من وشها علشان هي دلوقتي في الأسبوع اللي قبل السيكو سيكو، وياريت متسألنيش يعني إيه سيكو سيكو علشان أنا عندي عيال عايز أربيهم...

لمزيد من الكتب الحصرية ..

جروب نصير الكتب

[FB.com/groups/Book.juice](https://www.facebook.com/groups/Book.juice)

هدية عيد جوازنا

((ساحة المحكمة))

شافين... أول ما قولت كلمه (هدية) على طول كل الستات ريقهم جري... وده يا حضرات القراء أول دليل على براءة موكلي المائل أمام سيادتكم من التهمة الموجهة إليه...

*المحكمة: يا أستاذ أدخل في الموضوع على طول... القراء
معندهمش وقت...

□ المحامي: يا حضرات القراء... أحلفكم بياه... طب والله العظيم والمصحف والنعمة والختمة الشريفة والإخوة والعيش والملح طب عليا الطلاق بالتلاتة هنداوي بريء من كل التهم دي... والولية هند دي بتفتري عليه... طب بالذمة... ده شكل راجل ممكن يتعمد ينسى هدية عيد جوازهم...

* المحكمة: المدعي بالحق المدني يتفضل يتكلم...

- هند: أنا اسمي هند... وماما دايماً بتدلغني وتقولني (يامفترية)... اتجوزت البني آدم المتلأح ده من تلت سنين... مشفتش معاه ولا يوم حلو من ساعة لما اتجوزته... عمره ما دخل عليا وفي إيده هدية... حتى في المناسبات... وأنا طبعاً زي أي ست عاقلة... كنت باقول لنفسي يا بت استحلمي... يا بت اصبري... يمكن يكون عاملهاك مفاجأة وهيجيبك هدايا التلت سنين مرة واحدة... لكن بصراحة خلاص مبقاش عندي صبر... ده يا حضرات بقى ينسى كمان هدية عيد جوازنا... تخيلوا... وهو الزوج إيه غير مجموعة هدايا جنب بعضها... أنا ينساني?... ينسى هدية أزفت يوم في حياتنا... يوم ما اتجوزنا... لأ طبعاً مين يستحمل كده... دي الهدية بالنسبة للست أهم من الراجل

نفسه، أو على الأقل إثبات إن جوزها لسه بيحبها وفاكرها،
ومهتم بيها، وانا هنا ومن منبري هذا أعترف أمام سيادتكم...
إني واحدة ست... مجرد واحدة ست عقلها صغير وممكن
جوزها يضحك عليها بأي حاجة ملفوفة وبتلمع وعليها فيونكة..
حتى ولو كانت قنبلة زمنية.. حتى لو كانت حزمة جرجير...
إحنا كده... بنحب المفاجآت.. بنحب الرومانسية... أكثر حاجة
بتهمنا التفاصيل الصغيرة في العلاقة، والهدية أجمل التفاصيل
دي... مش لازم تكون غالية... مش لازم تكون كبيرة... المهم
إنه فاكرني... المهم إنها مفاجأة، وياريت ماكتش متوقعاها...
لكن هتقولوا لمين... هنداوي مصمم ميفهمش، مصمم يتصرف
من وجهة نظره حتى في الهدية... يدور على الأسلوب اللي
يناسبه... مش اللي يناسبني... يعني السنة اللي فاتت لما افكر
أخيراً إن النهاردة عيد جوازنا... قاللي... اتفضلي ادخلي البسي
هجيبيك النهاردة هدية بمناسبة عيد جوازنا، يا ترى عندك مانع؟
طبعاً قوتل معلش على الطريقة السخيفة... المهم إنه افكر،
ودخلت لبست وقولته (يلا يا حبيبي) ونزلت معاه وانا باحلم
بالمفاجأة... لقيته سحبني زي الـ... لحد محل الأدوات المنزلية
اللي على أول الشارع وقاللي اتفضلي اختاري... أنا طبعاً
اتصدمت وتحت... راح ضاحك ببلاهة وقاللي طبعاً مكسوفة
طب أنا هختارلك وشوفي ذوقي... إيه رأيك؟؟؟؟ طقم علب
بهارات!! تخيلوا... جايب هدية علشان يصلح علاقته بالمطبخ
مش بيا... ولما زعلت قاللي: خلاص اتفضلي ٢٠٠ جنيه
اشترى اللي انتي عايزاه... بجد بجد حرام ٢٠٠ جنيه بس؟؟
أقصد يعني فلوس إيه هو أنا متجوزة بنك... أنا عايزة
مشاعر... عايزة رومانسية... أنا محتاجة راجل يفكرني
وفتكر ذكرياته معايا ويحب يسترجعها... محتاجاه يتعب ويفكر

ويخطط إزاي يفرحني مش يديني فلوس ولا يجيبلي غسالة
أطباق... أنا كل اللي محتاجاه هو الحب، والهدية من وجهة
نظري هي الحب... وحتى لو معهوش فلوس كفاية أوي يكون
فاكرني ويدخل عليا ويقولني (كل سنة وانتي طيبة يا روجي)
ويخدني في حضنه... أهو الحزن ده عندي أعلى من مليون
هدية... لأنه حقيقي... مش روتيني... أنا مقولتش عايزة راجل
غني يجيبلي ألماظ ولا راجل غبي يجيبلي طقم بهارات...
ايهئ... ايهئ.. ايهئ.

- المحكمة: طب كفاية عياط... المتهم يتكلم...

؟] هنداوي: أنا اسمي هنداوي مرزوق هنداوي... العمر مقصوف
والريش منتوف وبكرة هنشوف لو الستات مخلتتاش نطالب
بالمساواة... مبقاش أنا هنداوي...

- المحكمة: يا أستاذ أدخل في الموضوع...

؟] هنداوي: يا حضرات القراء... أنا راجل غلبان على قد حالي...
بمشي جنب الحيط وباسمع كلام كل الدنيا بداية من الحكومة
ومديري في الشغل لحد المدام وأهلها... بشتغل طول النهار زي
المرمطون وأرجع بالليل البيت أرمي جتتي على السرير علشان
الحق أصحى الصبح أروح الشغل... أجيب بقي أنا منين فلوس
ولا دماغ لموضوع الهدايا ده... أنا كل حلمي إنني أكل العيال
وادخلهم مدارس، لكن المدام بقي عايزة تقضيها روميو
وجوليت... عشرين مناسبة في السنة... عيد أول مرة شوفنا
بعض فيها... عيد خطوبتنا... عيد جوازنا... عيد ميلادها...
عيد الفلاننتين المصري... عيد الفلاننتين المستورد... عيد تحرير

سيناء... كل دول لازم أفكرهم... وأجيب فيهم هدايا... يعني
أبقى طالع نازل شاييل دباديب حمرة وخضرة... وعهد الله أنا
هاين عليا أربي دقني وألبس جلبية وأحلف عليها إن كل الأعياد
دي بدع ومعاصي... طب ده أنا مرة اتخانقت معاها وزعلتها
ولما صعبت عليا جبتلها هدية وقلت أعمل زي كاظم
وأصالحها... واهو مين يومئها وهي كل أسبوع تخترع خناقة
علشان ترعل وأجيب لها هدية... طب واشمعنا إحنا يعني
مبنتلبش هدايا، ولا إحنا بس اللي لازم نكع، علشان كده ومن
هنا من داخل قفص الزوجية أطالب بقانون رادع لكل امرأة
تسول لها نفسها إنها تغضب علشان جوزها مفكرش أي عيد أو
مجبهاش هدية... على أن يكون هذا القانون تمهيدي لصدور
قانون آخر أكثر صرامة يلغي موضوع الهدايا ده من أصله
باعتباره المسئول الأول عن معظم الخلافات الزوجية... وكلي
ثقة في عدالتكم...

الحكم بعد المداولة

بالطبع طلب الأستاذ هنداوي بإلغاء الهدية طلب مرفوض... لأن الهدية
كانت ولا زالت وستظل أحد الأدلة القاطعة للحب، وأحد العوامل
الحفازة لاستثارة المشاعر الزوجية وتجديدها والإبقاء عليها حية... لذا
فلا يمكن الاستغناء عنها نهائياً كما إنه ليس من حق المتهم أن ينسى
بعض أهم هذه المناسبات في ظل وجود التكنولوجيا التي تمكنه من
تسجيل تواريخ هذه المناسبات كالموبايل والحاسوب... خاصة وأن
الزوجة الرقيقة جداً هند قد أعفته من الهدايا المكلفة واكتفت بالعناق
الدافئ (في حالة ضعف القدرة المالية)... كما أننا ندين أيضاً الزوجة
عند المبالغة في رد فعلها تجاه نسيان زوجها لبعض هذه المناسبات كما
ندينها أيضاً في الإكثار من هذه المناسبات حيث نرى أن تكثفي بعيد

تحرير سيناء من منطلق أننا حالياً تحت حكم العسكر... وإليكم بعض الهدايا المقترحة عند إصرار الزوجة على الاحتفال:-

أ- هدايا للزوجة القوية:

- ١- فلوكة في النيل في عز أمشير (يفضل أن تكون الزوجة لا تجيد السباحة)
- ٢- صميت وذرة في سجن طرة (خدها تتفرج على رموز النظام هناك يمكن تتعظ)
- ٣- مسدس أو بندقية في شوربة الملوخية (خليها تشربها على بوق واحد)

ب- هدايا للزوجة الرومانسية:

- ١- بوكيه ورد عليه كلمتين حلوين (وخليها تعمله مرية ورد للفطار)
- ٢- ليلة رومانسية في أوتيل شيك (وخليها تدفع)
- ٣- آخر سيديها كازم (وكسرها قدمها)

ت- هدايا للزوجة المادية:

- ١- خاتم سوليتير (يكون مسروق والبوليس بيدور عليه)
- ٢- أسهم في البورصة (على شركة تكون متأكد إنها هتخسر)
- ٣- مجموعة شهادات استثمار بمليون جنيه (مينفعلش تتصرف غير بعد ١٢٠ سنة)
وأوعدك إنها عمرها ما هتفتكر أي مناسبة بعد كده وادعيلي...

لمزيد من الكتب الحصرية ..

جروب عصير الكتب

[FB.com/groups/Book.juice](https://www.facebook.com/groups/Book.juice)

الرجال لا يحبون المفاجآت

فرق كبير جداً بين المفاجأة وبين الصدمة... يعني أنا لما استخبالك في الضلمة وأقولك (بخ) وأنا عارف إن عندك القلب... يبقى أنا كده

معملتكش مفاجأة... أنا عملتك (هارت أتك)... وبرضه لما أجيبك في عيد ميلادك هدية ملفوفة وجميلة وأقولك حزر فزر فيها إيه؟ تقوم حضرتك بسلامة نية تفتحها تلاقياها قنبلة وتتفجر في وشك... مينفعش ساعتها برضه أقولك إني عملتك مفاجأة... لأنني عملتك عاهة مستديمة...

وهو ده بالتحديد الفرق بين المفاجآت والصدمات... وعلى فكرة الاختلاف بينهم ملوش علاقة بنوع الهدية سواء كانت قنبلة أو وردة... لكن الموضوع كله في طريقة تقديمها ومدى استعداد الطرف الثاني لاستقبالها، وكثير من الناس مش فاهمة ده وساعات تزعل لما واحد ميعبرش عن فرحته بالمفاجأة اللي عملهاه... وده اللي هنفهمه من موضوع هند النهاردة وهي بتحكي لي وتقول لي:-

- طلعت في دماغي أول إمبراح أعمل نيولوك... رحت نازلة عند الكوافير غيرت لون شعري وضربته أسود، علشان عارفة إن هندأوي بيحب الشعر الأسود، وعملت فورمة جديدة لقصة شعري وحطيت لينسز زرقة وروج فوشيا...

● استنتي... استنتي... شعر أسود ولينسز زرقة وروج فوشيا، ده على أساس إنكم هتروحووا السيرك يعني....

- يا أخي بطل رخامة... المهم عملت الحاجات دي كلها ولبست بيبى دول أسود كمان، وقلت علشان تبقى ليلة سودة خالص، وضلمت الشقة ومليت الأركان شمع، وطلبت عشا فاخر من المطعم اللي جنبنا، ورشيت بارفان في الجو، وشغلت فيروز، وقعدت على السفرة مستنتياه... دخل الباشا لقي الدنيا ضلمة والشمع منور في الأركان راح مفزوع وقال (اللهم اجعله خير) قتلته متخافش يا حبيبي ده أنا بحتفل بيك، قاللي وإيه المناسبة؟؟ قولتله بمناسبة إنك وحشتني، يادوب... مخلصتش كلامي إلا ولقيته متجه ناحية السفرة... مع إن الدنيا كانت ضلمة... لكن ما شاء الله حاسة الشم عنده قوية جدًا...

عشر دقائق وكان منصف الترابيزة وأنا باتفرج عليه... في الآخر
بقى اكتشف إني قاعدة قدامه، ابتسم وقاللي (تسلم إيديكي يا حبيبتي).
جزيت على سناني وقولتله (بونا بيتي ياروح قلبي) راح مولع النور،
أنا طبعًا اتصدمت بس قولت مش مشكلة ملناش حظ في البرفان
والشمع وفيروز... يمكن يكون لينا حظ في حاجة تاني.. خلاص بقى
النور مولع يعني يتكلم... يعلق... يقول أي حاجة، مفيبيش... قلت
ألفت نظره أنا، رحت قايلاله (مش ملاحظ حاجة يا عمري)... ابتسم
ببلاهة وقاللي طبعًا ملاحظ يا شقية... قولتله ها... قاللي مغيرة مكان
ترابيزة السفارة... تخيل خد باله من مكان ترابيزة السفارة ومخدش
باله من قصة شعري ولونه، ولا حتى شاف أنا لابسة إيه... أنا
خلاص جالي إحباط... أنا مش فاهمة إزاي ميقدرش كل الحاجات
دي، وأنا اللي قضيت طول اليوم أعمل فيها، وكنت كل لما أعمل
حاجة أتخيل شكله وهو منبهر بيها... الإحساس ده كان بيخليني
أعمل أكثر وأقول علشان أكسر الملل اللي بقاله فترة مسيطر على
علاقتنا... تخيل بعد كل ده يسييني ويدخل ينام... طب أعمل إيه
تاني؟؟؟؟ أنا خلاص هاستناه بعد كده بالبيجامة ومش هحط ولا
ميكب ولا بارفان، يلا بقى خليه يقضيه جليبات وريحة بصل
وطبيخ...

.....

التعليق

طبعًا هند اتصرفت بسلامة نية وبذلت مجهود كبير علشان ترضي
هنداوي وكانت نيتها تجدد حياتها الزوجية ودي طبعًا حاجة تشكر عليها،
لكن للأسف إنها معملتش حساب كذا احتمال ممكن يكونوا خلوا هنداوي
مش جاهز نفسيًا أو جسديًا للمفاجأة الجميلة دي، وطالما هي عارفة إنه
بيتخض من المفاجآت كان واجب عليها تمهده قبل ما يبجي، يعني مثلاً
تتصل بيه وتقول له: (لواتأخرت يا ببيي النهاردة هانحط السيخ المحمي
في صرصور ودنك) يعني حاجة كده؛ لأنه ممكن يكون عنده ظروف،
زي مثلاً:-

١- راجع من خيانة زوجية ومش فاضل عنده أي طاقة.

٢- نسي شريط الحبوب بتاعه في الشغل.

٣- واخذ كلمتين من المدير بتاعه وراجع نفسه مسدودة.

٤- صوت فيروز بيعمل له ارتخاء في المشاعر الليمفاوية. يعني
هند برضه كانت لازم تعمل حساب حاجة زي كده. ولا إيه؟؟

لمزيد من الكتب الحصرية ..

جروب نصير الكتب

FB.com/groups/Book.juice

مبروك جالك بنت وولد

النهاردة كانت عقبة خديجة ومعاذ... التوأم اللي خلفتهم هند بعد صبر
خمس سنين.

يااااااه خمس سنين من الصبر واليأس والأمل والإحباط... راحوا لكذا
دكتور وكذا شيخ وكذا دجال وفي الآخر قرروا يسببونها لربنا. وفعلاً
رجع هنداوي من السفر بعد سنة ونص في الخليج لقي هند حامل وكان
هيموت من الفرحه (على فكرة هنداوي نزل كذا أجازة في الفترة
الأخيرة، علشان بس ماتقهموش غلط)

المهم... النهاردة بقى عقيقة الولاد وأنا طبعاً راجع من الغردقة جري
علشان ألحق أكل لحمه الخروف لإني واثق إن هنداوي ممكن ياكله وهو
صاحي... لكن طبعاً الصدمة الكبيرة إنه كان دابح فرختين علشان سأل
الشيخ بتاع الجامع وقال له إن العقيقة لازم تكون بأربع رجول.
أخذت هنداوي ودخلنا الأوضة اللي جوه علشان ندرش بعيد عن دوشة
المعازيم وابتدى الحوار الآتي:-

● ماقولتليش يا هنداوي الولادة كانت صعبة على هند؟؟

- يا عم صعبة مين... هي دي ولادة!!!!!! الولادة كانت زماااان...
طب دي الحاجة أمي وهي بتخلفني كانت عاملة فضايح
وصوتها كان جايب لآخر الشارع وأبويا كان واقف برة
الأوضة ومرعوب وعمال يقول يارب استر... يارب استر...
وانا كنت بضحك على شكله، لكن الولادة اليومين دول...
حاجة تانية خالص... يعني أنا كنت فاكِر إن الشهر التاسع في
حمل هند هيبجي ويبتدي معاه الرعب والقلق... ونفضل
مستنين (الطلق) ونقول يا ترى هتولد امتي وإزاي... لكن
روحنا للدكتور في آخر متابعة لقيته بيقولها ها (تحبي تخلفي
إمتي؟ إيه رأيك في يوم التلات الساعة ١٠) ردت عليه هند
وقالتله (لأ يا ريت نخليها الخميس الساعة ٨ علشان التلات
مشغولة شوية) أنا طبعاً واقف مش فاهم أي حاجة وفاكرهم
بيتفقوا على ميعاد دخول سينما ولا حاجة... المهم جيه يوم
الولادة وصممت هند إني أدخل معاها أوضة العمليات آل إيه
علشان متحشش بالملل... أنا طبعاً برضه مفهمتش دي

كمان... ملل إيه...؟! لأ دي أكيد داخله سينما بجد... أنا قلت يا
واد مدهاش رحى اشتريت ثمن كيلو لب سوري ودخلت
عليها أوضة العمليات لقيتها إيه بقى...!!! نائمة على البينش
والدكاترة بيولدوها وهي ماسكة في إيديها كاميرا فيديو
وبتصور العملية... أنا قلت أكيد البنج منفعش معاها... قالتلي
لأ يا حبيبي أصل أنا واخدة بنج نصفي... أنا طبعًا انترفزت
وقولتها طب متسيبي الكاميرا دي وتركزي شوية علشان
العيل ينزل بسرعة... راحت هي كمان متترفة عليا وقالتلي
وانت مالك... هو انت اللي بتخلف ولا انا... المهم كلمة منها
وكلمة مني... مسكنا في بعض وكانت هتقلب بمجزرة... راح
الدكتور مزعق لنا وقال (كفاية بقى ويا ريت توطوا صوتكم
شوية الطفل خايف ينزل)... أنا بصراحة اتكسفت من نفسي
وقولتها (يا حبيبي بلاش الولد يشوفنا أول مرة واحنا
بنتخانق)... قالتلي (خلاص يا حبيبي أنا أسفة... ياريت بقى
تروح على البيت دلوقتي وتعملنا أي حاجة نتعشى بيها وانا
هخلف واجي وراك على طول) آدي يا عم الخلفة بتاعة
اليومين دول... لكن بيني وبينك التعب الحقيقي ابتدى لما هند
رجعت البيت... بقت يا عيني مش عارفة تنام خالص من الألم
ده غير طبعًا عياط الأولاد... (خديجة) تصحى وتعيط تقوم
هند ترضعها وتنم... يصحى (معاذ) يعيط ترضعه وينام...
وعلى كده طول الليل... بجد كانت بتصعب عليا أوي وكنت
طول الليل سهران جنبها علشان أحسسها أد إيه بحبها
وحاسس بيها ومقدر تعبها اللي بسببه بقيت أب...

- بس حلو أوي اسم معاذ وخديجة إزاي اخترتم الأسمي الجميلة
دي؟؟

- هي هند الله يسامحها بقى هي اللي سمتهم كده... أنا بصراحة كان نفسي أسميهم حمدان وكيداهم... على اسم ابويا وامي... بس هي رفضت آل إيه... علشان الأسمي دي هتخليهم يتحسدوا...
- هي بصراحة عندها حق... بس مقولتليش إيه أخبارك مع البامبرز، أنا عارف إن رجالة كثير بتشتكي منه اليومين دول...
- يا أخي متفكر نيش بالبامبرز وسنينه السوده... ده اختراع فاشل ابن فاشل... يااااااااااااه فين أيام (الكافولة) كان العيل مننا يعمل فيها خمسين مرة وتتغسل وتبقى زي الفل... يمكن لحد ما يدخل الأعدادية... مش تقولي البامبرز بتاع اليومين دول... اللي يادوبك نغسله تلت أربع مرات وخلص يترمي بعد كده...
- هو انتو بتغسلوا البامبرز؟؟؟؟!!!!!!
- مش دايماً... يعني لو الواد أو البت عندهم لامؤاخذة يعني إسهال بنغسله... ماهو برضه... ميرضيش ربنا نرمي كل شوية خمسة جنيه في الهوا علشان لحظة تهور من طفل معندوش أي إحاسس بالمسئولية.

لمزيد من الكتب الحصرية ..

جروب مصير الكتب

[FB.com/groups/Book.juice](https://www.facebook.com/groups/Book.juice)

فنلة جوزي الحملات

النهاردة يوم باين عليه صعب من أوله... هند صاحية من النوم عنيه
بتطق شرار... وواضح إنها مستحلفة لهنداوي... أصل النهاردة
الجمعة... يوم أجازتهم وطبيعي إنهم بيتخانقوا النهاردة، لإن دي أطول
فترة بيقعدوها مع بعض طول الأسبوع، علشان كده ممكن نسمي أيام

الجمع بتاعتهم على اسم أيام الجمعة بتاعة الثورة... يعني جمعة الكرامة... جمعة الصمود... جمعة الانتقام... بس أعتقد من شكل هند كده إن النهاردة جمعة الغضب...

هنداوي طبعاً مش واخد خوانة وراجع من صلاة الجمعة زي الملايكة بجلبيته البيضاء وشايل الجرنال في إيد، وكيس اليوستنندي اللي مش فاضل منه غير واحدة بس في إيدته الثانية... هند في المطبخ وبتحضر الفطار وهو داخل بيتسحب ويبقرا المعوذتين وكأنه متوقع اللي هيحصل...

خلع هنداوي الجلبيية وفتح النشرة علشان يطمئن، لكن للأسف المذبة مطمنتوش... أعاصير وبراكين وزلازل تجتاح المدن الشمالية والجنوبية والشرقية والغربية... يعني مفيش فايده... لازم ينوبك من الحب جانب... دخلت هند وفي إيديها الفطار وعلى اعتبار إن الشوكة والسكينة أدوات حادة ممكن نعتبر إن هند دلوقتي مسلحة تسليح كامل يسمح لها بإصابة هنداوي في أماكن مختلفة من جسمه... لكن واضح إن الرجل هادي وبياكل بمنتهى الثبات... وده بيرجع لإيمانه الشديد بمقولة (الحذر لا يمنع القدر)...

خمس دقائق وكان هنداوي ماسح الصنية كالعادة بس هند كالعادة برضه مكلتش علشان تبقى خفيفة خفيفة هي بتتحرك أثناء المعركة...

الجولة الأولى

- هو انت يا هنداوي مش ناوي ترحمني بقى من الفنلة الحملات بتاعتك دي اللي لابسهالي على طول في البيت.
- لا حبيبتى... والله دي فنلة تانية خالص... لسة شاربيها.
- ما هي برضه فنلة حملات... حرام عليك يا أخي أعصابي تعبت من شكلها...

- يا حبيبتي طب ألبس إيه بس مش النهاردة يوم أجازتي...
والمفروض أكون على حرיתי وخصوصًا إن شفتنا قبلي وعلى
طول حر.

• يا أخي البس بيجامة، ترينينج، ولو يعني حران أوي البس
شورت وقلنة وكاب.

- لا يا ماما احترمي نفسك... الكلام ده تقوليه لأحمد السقا... مش
أنا اللي ألبس شورت وقلنة والكلام الفارغ ده..

بصراحة مش فاهم إيه حكاية القلنة الحملات دي. معظم الستات
بيشتكوا منها.. يعني تلاقي الرجل قاعد في البيت لابسها وناكش شعره
ومدلل كرشه قدامه شبرين... وسايب دقنه منبته... ولا حالقها ولا
سايبها تتطول... ومش طابق نفسه لكن أول لما يجيله تليفون سواء نازل
مع أصحابه أو جايه ضيوف، تلاقيه فورًا انتفض ودخل الحمام أخذ
دش وحلق دقنه وسرح شعره...
أما بقى لو مراته عاملة كده... يعني مبهدة في نفسها وهي قاعدة في
البيت... يبقى يومها مش فايت كأنه هو بس اللي ليه عينين وبيشوف
وهي بقى الجارية اللي جابهاله... ولا بلاش...

الجولة الثانية

• يا هنداي حرام عليك كفاية بقى... قوم استحمي... ريحتك
فظيعة... ولا انت فالح بس تقوللي ريحتك بصل... ريحتك
طبيخ... يعني يا هنداي الواحد يخلي عنده دم وقبل ما يتكلم
على ريحة الناس يشم ريحته...

- لأ من فضلك... أنا مسمحكيش تتكلمي على ريحتي... ده أنا
أكثر واحد في الدنيا بيشتري كولونيا خمس خمسات..

- أنا نفسي أفهم بس انت بتشتري الكولونيا دي منين... دي بطلوا ينتجوها من عشر سنين...

- لا ما أنا عندي إزازة من زمان، وكل لما تيجي تخلص بازودها مية..

.....
 فعلاً عندها حق... لأن موضوع ريحة الراجل مهمة جداً للسنتات بس معظمهم بيتكسفوا يتكلموا علشان ميجرحوش الرجالة... بس إحنا كرجالة بصراحة لازم نخلي عندنا شوية دم ونشيل من دماغنا فكرة إن ربنا خلقنا كده بريحة حلوة على طول...
 ولازم نفهم كمان إن البرقان متعملش علشان نحطه بس واحنا نازلين من البيت بالعكس ده المفروض يتحط جوا البيت لأن المفروض إن مراتي أهم من الناس كلها... (أي خدمة يا ريهام)...

الجولة الثالثة

- يا هنداي أبوس إيديك... قوم اغسل سنالك بأي معجون.
- والله يا حبيبي لسة غاسلها الأسبوع اللي فاتت.
- الأسبوع اللي فات!!... طب علشان خاطري اغسلها النهاردة كمان... ربنا يكرمك... ده خلاص العيد على الأبواب...
 وبعدين يا ريت تغير معجون الحوائط اللي بتستخدمه ده... لإن سنالك على طول صفرا.
- لا يا حبيبي دي هي لونها بقي كده من كتر أكل اللحم...
 ● يا أخي ليه بس قلبت عليا المواجه وفكرتني باللحمة.

- ليه يا حبيبتي ما انتي كل يوم بتطبخيها...
- أيوة يا هنداوي... بس انت مبتدنيش فرصة أدوقها، يادوبك آجي
أخذ حنة ألاقيك اصطدتها... ده انت أستاذ في صيد اللحمة من
الشورية...
- يا حبيبتي متكسفنيش بقي... أصل دي موهبة... عندنا في
العيلة... واخدها عن المرحوم أبويا الله يرحمه... كان أسرع
واحد يصطاد اللحمة من الشورية...
- أيوه ما هو علشان كده مات بالنقرس...
- لأ مماتش بالنقرس... ده مات منتحر...
- مات منتحر...!!... إزاي...؟؟
- لأ... دي حكاية طويلة ومش هتقدري تفهميها...
- ياااااه للدرجة دي الموضوع معقد...؟
- لأ مش معقد... بس هو غريب شويتين...
- طب ياريت تحكهولي وأنا هحاول أفهمه...
- صدقني مش هتعرفي...
- يا سيدي بس احكي وملكش دعوة...
- طب اسمعي يا ستي... أبويا بعد موت أمي الله يرحمها اتجوز
الحاجة (تفيدة)... والحاجة تفيدة كانت أرملة جميلة وعندها
بنت شابة اسمها (فرحانة)... راح جدي الله يرحمه شاف البيت

فرحانة وعجبته... واتجوزها وبعد ٩ شهور خلف منها ولد،
وفي نفس الشهر أبويا خلف من الحاجة تفيدة ولد... ساعتها
أبويا جاتله حالة عصبية وقفل على نفسه الأوضة وقعد يقول
(دلوقتي أبويا اتجوز بنت مراتي اللي هي في مقام بنتي... يعني
أبويا بقى صهري وبنت مراتي بقت مرات أبويا، يعني في مقام
أمي، وابني دلوقتي بقى أخو مرات أبويا، يعني في مقام خالي،
والواد اللي مرات أبويا خلفته بقى أخويا وفي نفس الوقت هو
حفيد مراتي... يعني مراتي بقت جدة أخويا... يعني في مقام
جدتي... لكن المفروض يكون جوز جدتي هو جدي... بس أنا
جوزها... يعني أنا بقيت جدي...) وانتحر...

• يا نور النبي ده انتو عيله دماااغ ... عقبالك يا هنداوي لما
تنتحر.

لمزيد من الكتب الحصرية ..

جروب عصير الكتب

[FB.com/groups/Book.juice](https://www.facebook.com/groups/Book.juice)

جرب نار الغيرة

جرب نار الشيشة... عفواً... جرب نار الغيرة... جرب واوصفلي...
جرب ليالك يبقى نهار... تحتك شوك و عيونك نار... الله الله ياست
(وردة)... والله انتي سابقة عصرك... يعني زمان لما غنت (لولا الملامة
يا هوا لولا الملامة لافرد جناحي عال هوا زي اليمامة وأطير وأرفرف في
السما...) من بعديها على طول بكام شهر اخترعوا الطيارات... بجد
أغاني الست دي نبوءة... وبالذات في موضوع الغيرة ده... يعني شوف

لما تقولك تحتك شوك و عيونك نار... يا سلام... طب والختمة الشريفة
ده اللي بيحصل فعلاً لأي حد بيغير، تلاقيه على طول تعبان ومهموم
كأنه بجد ماشي على شوك وبرضه زي ما قالت تلاقي عينيه نار مش
عارف ينام... هي كده الغيرة... ربنا يعافيني يارب...
هنداوي بقى ربنا ابتلاه بالمصيبة دي الغيرة... بس من ناحية هند...
يعني هي اللي بتغير، ولو معندكوش مانع تعالوا اسمعوا هند بتقول إيه:-
- أنا بصراحة الفار ابتدى يلعب في عبي (كناية عن الشك)
هنداوي شكله بيخوني، لأنني ابتديت ألاحظ عليه تصرفات
غريبة... يعني الجمعة اللي فاتت أخذ الجرامفون بتاعة...
أصله مبيحبش يسمع الكاسيت... ودخل البلكونة وقعد طول
الليل يسمع (عبد المطلب) وأغنيته الشهيرة (ساكن في حي
السيدة وحببي ساكن في الحسين)... وبعد كده الصبح لقيته
صاحي بدري واستحمى على غير العادة وألبس الجاكرت
الكاروه البنفسجي بتاعه على البنطلون الأخضر المألّم
بالعرض على الكرافة العريضة المشجرة بدون قميص وقلق
شعره من النص... على طريقة عبد الفتاح القصري... وقاللي
أنا نازل يا حبيبي علشان أقابل واحد صاحبي في الحسين...
طبعا أنا افكرت أغنية عبد المطلب واناكدت فوراً إنه نازل
يقابل واحدة... ورحت منكدة عليه عشته وحلفت عليه ما هو
خارج إلا ورجلي على رجليه (كناية عن الالتصاق)...

و على ذلك يعلق الأخ هنداوي قائلاً:

- أنا بجد اللي اتخنقت... دي بقت عيشة تطهق كل يوم غير
وشك على أطفه الأسباب... ألبس حاجة جديدة تقوللي رايح
فين؟؟ أخط برفان تنقلب الدنيا... أكلم زميلتي في الشغل علشان
أي سبب تنكد عليا... وتأخذ مني التليفون تديها كلمتين في
عضمها... ده حتى التليفزيون... لو قعدت أتفرج على فيلم

لأمانة رزق وقلت عليها أي تعليق... يعني مثلاً أمانة دي
ستايل... أو سيكسي... تقوم تكسر التلفزيون... دي فعلاً
اتجننت...

.....

عصير الكتب

Facebook.com/groups/Book.juice

هذا الكتاب حصري على جروب عصير الكتب

انضم الينا لتحصل على كل ما هو جديد

وبعدين الهدوم اللي بيلبسها دي بتأكد إنه رايح حفلة تنكرية مش رايح يقابل واحدة خالص... أما بقى الطريقة اللي بتستخدمها هند في التعبير عن غيرتها فهي دي المشكلة بعينها ولينا بقى هنا وقفة...

فرق كبير بين الغيرة والشك... لأن الغيرة هي دليل على الحب علشان بتأكد خوف الواحدة على جوزها بشكل خاص وعلى بيتها بشكل عام... الغيرة هي وقود الحب الدائم اللي بيروي شجرة الأمان والثقة بين الزوجين... (ايه الكلام الجامد اللي بقوله ده) الغيرة هي رفض الحبيبين لطرف ثالث بينهم وده حقهم، وبدون الغيرة الحب يفتر ويموت ويتبلد...

أما بقى الشك فهو عكس كده تمامًا... الشك هو اتهام ضمني بالخيانة... أنا بشك فيك إذا أنا دبوس... أقصد يعني يبقى بتهمك بالخيانة ودي الكارثة، تخيلوا لما يبقى الزوج أو الزوجة عنده شعور دايم بأنه متهم بالخيانة إذا هيعتبر إن البيت هو السجن... إذا هيكره الحياة الزوجية وهيكره الحب نفسه، الشك بيقتل الحب ويبيدمره ويحرقه... ولما واحدة تراقب جوزها وتتصنت على تليفونات وتودور في أرقام موبايله وتصلت عليه واحدة تعاكسه علشان تتأكد من إخلاصه (سامعة يا مدام) يبقى دي مش بتغير عليه... تبقى بتتهمه بالخيانة... وطبعًا العكس لو من راجل لمراته... يعني المفروض لو بتشكي في جوزك يبقى تصارحيه على طول بشكك مش تراقبيه (كفاية بقى حرام عليكو خلونا نخون في هدوء شوية)...

وبعدين هنداوي كمان مش لازم يزودها يعني... يعني إزاي يكلم زميلته في الشغل بالساعات ده استهبال وعدم مراعاة لمشاعر مراته...

لمزيد من الكتب الحصرية ..

جروب نصير الكتب

FB.com/groups/Book.juice

طب فيها إيه لما يشتري موبايل بخط تاني ويكلمها من وراها... ده إيه
الرجالة العبيطة دي!!!

جوزي بقى مستهتر جدًّا

عصير الكتب

Facebook.com/groups/Book.juice

هذا الكتاب حصري على جروب عصير الكتب

انضم الينا لتحصل على كل ماهو جديد

أقصر قصة قصيرة في العالم كانت لـ (تشيكوف) يتحدث عن شاب عاش طول عمره في رحلة بحث عن (ورقة نقدية بـ ١٠٠ روبية) وقعت من واحد غني في الشارع... الشاب سمع عن ضياعها وكان يبذل يلاقيها علشان يحقق أحلامه لكن للأسف في آخر القصة يتحدث عن تجربته ويقول (والآن وبعد ثلاثين عامًا بإمكانني أن أحصي لكم ثروتي كأني رجل غني وهي عشرون ألف عود ثقاب وخمسون ألف عقب سيجارة... وظهر محني...) يعني الشاب ده ضيع عمره يبذل بصدقة تخليه غني وأدي النتيجة...

- الإعلام بتاعنا بقى مع خالص عدم احترامي له طول عمره بيعمل فينا كده... بيزرع فينا فكرة الاستسهال وبيعلمنا إزاي نعيش عمرنا نحلم بضربة حظ تعدينا الفقر، وطبعًا لإن شبابنا يأس ومقهور فكان مضطر يعيش على الوهم ده... (أهو أحسن ما ينتحر) يعني مثلًا في السبعينات كنت تلاقي الشاب يتفرج على فيلم نجيب الريحاني ويشوفه وهو بيكسب ورقة يانصيب وبيغتني فجأة أو أحمد رمزي بيكسب في سبق خيل... أو فريد شوقي بيعتني في لعبة قمار... حاجات سهلة خالص ولذيذة... وأسهل بكثير من المذاكرة والكفاح والطموح والكلام الفارغ ووجع الدماغ... علشان كده الجيل ده حقق أعلى نسبة بطالة في وقته... لكن مع تطور الإعلام وظهور الفضائيات الكثير مع احتفاظهم بنفس الأهداف الواطية اخترعوا نوع جديد من (ورقة اليانصيب) وهي المسابقات التلفزيونية زي (مستر كولومبو) وغيرها من المسابقات الثقافية... واللي بتكون الأسئلة فيها غاية في التعقيد زي مثلًا:- اذكر الاسم الثلاثي لرئيس جمهورية مصري مخلوع... وعندك ثلاث اختيارات:

١-محمد حسنى مبارك

٢-محمد على كلاي

٣-برج الجزيرة

إذا عرفت الحل (وده طبعًا مستحيل) اتصل فورًا من أي محلول لتربح معانا ٥٠٠٠ ليرا إيطالية أو رحلة حج في شهر مارس... سعر الدقيقة ١٥٠ قرش.

اتصل فورًا علشان ناطعك على الويتنج نص ساعة انت وأمثالك من الطموحين وابقوا قابلوني في الأسبوع القادم لنعلن عن اسم الفائز وهو إبراهيم محمود من القاهرة... ولو مش مصدق إن فعلاً فيه واحد فاز اسمه إبراهيم محمود... يبقى انزل بنفسك القاهرة ودور عليه... وتأكد إنك لو لقيته مش هيطلع واحد شغال معانا من البرنامج...

هو ده دور الإعلام عندنا دلوقتي وهو ده مصدر رزق الفضائيات... وهو ده الحافز اللي بيقدموه للشباب علشان يجتهدوا وينجحوا... بالذمة مش حاجة تكسف...!!!

.....
لكن أنا بالصدفة من كام سنة شفت برنامج مسابقات محترم كان اسمه
(الفائز أبي)... وكان عبارة عن مسابقة بين أكثر من فرقة... والجميل
في الموضوع إن الفريق كان بيتكون من فردين... هما الابن والأب...
وبينافسوا فريق تاني بيتكون برضه من أب وابن... وكان ملحوظ جداً
إن الفريق اللي بيكسب هو الفريق المتفاهم...

يعني الأب والابن اللي فاهمين بعض ومتعودين يلعبوا مع بعض
وبيتناقشوا وبينهم مواضيع كتير مشتركة هما أكثر اتنين بيفوزوا...
لكن اللي لفت نظري أوي وخلاني استشهد بالبرنامج ده هو مأساة حلقة
التصفية الأولى... وبسميها مأساة لأنها فعلاً كده... أب وابنه مفيش بينهم
أي تفاهم، خرجوا من أول تصفية... من أول لعبة اشتركوا فيها ظهر
التباعد الرهيب بينهم... الأب اتترفز كذا مرة على الابن واتهمه بالفشل
في المسابقة الرياضية والابن كان واضح إنه مش طايق أبوه وأول مرة
يلعب معاه...

أما في اختبار المعلومات فالأب جاوب على كل الأسئلة الصعبة المعقدة
حتى سؤال اذكر أسماء سكان الصين جاوبه لكن فشل في الإجابة على
سؤالين اتنين:-

١- إيه أكثر حاجة بيحبها ابنك.

٢- اذكر اسم أقرب صديق لابنك.

الأب فشل في أهم سؤالين من وجهة نظر الابن، والابن اتصدم... أما
بقي الأم اللي ظهرت في وسط الجمهور حزينة هي دي (هند) اللي
خلتني استشهد بالبرنامج ده وأقرر دق جرس الإنذار بمنتهى القوة
وبصوت عالي جداً... تن تن تن تن واسألها:

* انتي ليه يا هند كنتي حزينة أوي كده..؟

- كنت حزينة علشان أنا السبب في الخسارة دي...

* إزاي يعني... ما هو مكنش ينفع تساعديهم...

- لأ... كان ينفع...

* إزاي..؟

- هحكيلك:-

لما اتجوزت هنداوي من عشر سنين كان نموذج رائع للزوج الصبور المكافح... كنت منبهرة بطموحه وأحلامه واجتهاده... اتجوزنا في شقة بسيطة جداً وقعدنا ٣ سنين ندفع في أقساطها... كان بيشتغل ليل ونهار علشان نسدد ديونا ونقف على رجلينا... لحد ما ربنا رزقنا بخديجة ومعاذ وابتدت المسؤوليات تزيد وحسيت إن هنداوي خلاص مش قادر يستحمل لوحده... وقررت إنني أشيل معاه... وفعلاً ابتديت أشغل وأساعده في مصاريف البيت... وبصراحة هو كان رافض في البداية لكن أنا صممت... ومع الوقت أفنعتة يكتفي بوردية واحدة في الشغل علشان يرجع البيت بدري ويستريح شوية... في الوقت نفسه كانت الولاد بتكبر ومسئولياتهم بتزيد وكان طبيعي إنني أشيل عنه جزء من مسئولياتهم زي مثلاً مراجعة الدروس ومتابعة المدرسين وكده يعني... وهو بصراحة كان دائماً بيشكرني ويحسني إنني سنداه ويقولي (مش عارف من غيرك كنت عملت إيه)... لكن الغريبة إنه بمرور الوقت ابتدي يتعود على كده ويتعامل معايا على إن ده واجبي الأساسي... مش بس كده ده ابتدي كمان يشيل كل يوم عن كتفه واحدة من مسئولياته ويرميها عليا... لحد لما اكتشفت فجأة إنني شايلة كل حاجة لوحدي... أصحى من النوم بدري جداً أعمل للولاد الفطار والبسهم وأوصلهم للمدرسة وبعد كده أروح الشغل علشان أرجع العصر مهدودة... أدخل المطبخ أجهز الغدا وبعد كده أبتدي أراجع لهم الدروس وبعد كده أستناه لما يرجع من الشغل واتعشى معاه وأنام بدري علشان الولاد والشغل الصبح...

وياريت على قد كده... الأستاذ مبقاش شايف إنني باعمل حاجة تستدعي الشكر ده بالعكس بقى يتهمني بالتقصير... يعني من كام يوم مثلاً أنترفز وأنعصب علشان راحت عليا نومة وملحقتش أروح اجتماع أولياء الأمور بتاع خديجة... وقبلها برضه بكام يوم زعل أوي علشان اشكيت له إن معاذ جاب درجة ضعيفة في السابنس واتهمني إنني السبب... ولما طلبت منه يعاقبه قالي (أنا ماليش دعوة... اعلمي اللي انتي عايزاه) وعلى كده بقى شايل إيدته من كل حاجة... لما أعصابي ابتدت تنهار وجسمي كمان... وكثير دلوقتي لما أتعب وأنام في السرير يتجاهلني

تمامًا وميفكرش حتى يجيب ليا دكتور وبالكتير يقولي (إنتي بتتدلي) أما هو بقى لو كان عيان ونايم في السرير يبقى لازم أكون جنبه وممنوع أعمل أي حاجة ولا أسيبه لحظة... هو ده هنداوي اللي فشل في المسابقة واللي ميعرفش عننا أو عن معاذ أي حاجة... وهو ده السبب اللي خلاني حزينة وباعترف إني السبب....

التعليق

عندك حق يا هند... انتي فعلاً ساهمتي في خسارة هنداوي ومعاذ في المسابقة وخروجهم من التصنيفات الأولى... وساهمتي أكثر في خروج هنداوي من مسابقة الحياة الزوجية... لأنك بدل ما تقفي جنبه... وقفتي قدامه... وبدل ما تشيلي معاه شيلتي عنه... عملتي كل حاجة صح بس بشكل متطرف... فرحتي بالإطراء والمدح وتمثيل دور الأرملة المكافحة ونسيتي إنك بكده بتلغي دور الزوج وتحويليه لشخصية أنانية مستهترة... وعلى فكرة أنا مقدرش ألوم جوزك برغم كل استهتاره... لأن الرجل في مجتمعنا مضغوط ونفسه يلاقي حد يرمي عليه كل مسؤولياته... وانتي بدون ما تقصدي عملتي كده... لكن برضه هنداوي راجل محترم وانتي ست ذكية علشان كده أنا واثق إن لسة فيه أمل... أرجوكي عيدي حساباتك وانسحبي بالتدريج زي ما دخلتي بالتدريج... اشركيه في مشاكل الولاد ومسئولياتهم خليه يفرح بنجاحهم ويحزن بفشلهم خليه يرجع يفكر فيكي تاني كزوجة وأنتى... مش كصديق يبساعده... وادعيلي مراتي تبقى زيك علشان أعيش حياتي شوية وارمي عليها كل المسئوليات وانطلق بقى... الواحد زهق.

لمزيد من الكتب الحصرية ..

جروب عصير الكتب

[FB.com/groups/Book.juice](https://www.facebook.com/groups/Book.juice)

الهانم عاملة شعرها

عصير الكتب

Facebook.com/groups/Book.juice

هذا الكتاب حصري على جروب عصير الكتب

انضم إلينا لتحصل على كل ما هو جديد

من المفروض ومن الطبيعي جداً إن الرجل يرجع من شغله بعد يوم طويل يلاقي مراته مستنياه بابتسامة عريضة... عاملة شعرها وحاطة مكياج وبرفان ولابسة حاجة لذيدة... وده مش لازم يكون مرتبط نهائياً بنيتها... يعني سواء كانت نيتها سليمة أو نيتها أبيحة لازم تكون عاملة كده في كل الأحوال... المفروض تكون خلصت كل حاجة في البيت وربطت العيال في السرير وجاهزة ومستتية الرجل الغلبان اللي جاي من الشغل (تعبان)... وكلمة تعبان هنا لا تعني مطلقاً إنه تعبان لا سمح الله من الشغل، لكن تعني أنه تعبان من الشارع... لإن الشارع عندنا

--- بعد خمس دقائق أو أقل ---

- إيه يا حبيبتي إنتي برضه نمتي... لأ أبوس إيديكي مش وقت نوم خاااالص...

● وبعدين معاك يا هنداوي مش شايفني عاملة شعري...؟

- أيوه يا حبيبتي أومال أنا استحमित ليه؟؟؟ هو أنا من إمتي يعني كنت باستحمي بدون مناسبة؟؟..

● لا ما هو اللي في دماغك مش هينفع النهاردة علشان شعري كده هيبوظ... وانا دافعة للكوافير خمسين جنيه...

- يا حبيبتي فداكي... وأدي الخمسين جنيه اتفضلي....

● طب هات... يلا بقى ادخل نام جنب العيال وخلي ليلتك تعدي على خير...

طبعا هنداوي دخل نام مع الأولاد وهو بيتحسر على الخمسين جنيه اللي دفعهم بتهور... وزيه زي كثير من الرجالة المقهورين استسلم لكونه رقم ٢ في حياة مراته ونام وهو بيحلم إنه بيخونها مع واحدة عندها كوافير تمليك...

.....
ده موقف بيتكرر مع كثير من الرجالة، وللأسف الرجل عموماً بيتكسف جداً يشتكى من الموضوع ده وبيعتبره إهانة كبيرة لرجولته وبيفترض إنه غير قادر على إمتاع مراته أو إشباعها علشان كده هي بترفضه... وده بيفسر تصرفات غامضة جداً للرجال بتطلع منه غصب عنه وفي أوقات معينة... لما مراته تلاقيه مثلاً عصبي جداً وبيتنرفز عليها من أقل حاجة... وساعتها بتسأل نفسها هو ليه عصبي كده وبدون مبرر، ومبتوصلش لإجابة، أهو ده بقى سبيه تجاهل مراته أو برودها معاه،

وللأسف طبعًا عمرها ما هنتخيل إن ده السبب لإنها بتقيس ده على نفسها وتقول (طب ما أنا ببقى ساعات عايزاه وهو مبيخدش باله وبينام ويسيبيني، اشمعنى أنا مبتعصبش) وده الغلط لأن علمياً الرجل في الموضوع ده مختلف تمامًا عن الست (لأنه موجب) وقدرته على تحمل غريزته أقل كثير منها، وده طبعًا مش فضيلة منها أو تفوق بإرادتها لكن دي نعمة ربنا إدهالها علشان تقدر تعصم نفسها في كل الأحوال... وأكبر دليل على كده إن الأرامل أو المطلقات ممكن يعيشوا من غير راجل أحيانًا، لكن الرجل الأرملة أو المطلق من الصعب جدًا يعيش من غير امرأة بقية حياته...

المهم... نرجع ثاني لموضوع التجاهل... علشان أكون محايد لازم أعترف إن الستات أحيانًا بيكون ليهن مبرراتهن لعدم تقبل الزوج أحيانًا، بعضها مقبول وبعضها غير مقبول... يعني ممكن نلتمس ليها العذر أحيانًا لما الرجل يسيء التعامل معاها، سواء في الموضوع ده بالذات أو بشكل عام في حياتهم... يكون مثلاً بيهينها... أو بيمد إيده عليها... بيتعامل معاها بعنف ويتجاهل مشاعرها... يعني حاجات من النوع ده، طبعًا ساعتها الست بتبقى مش متقبلاه وصعب نجبرها... لكن برضه لازم نقولها رفضك مش هو الحل طالما هو مش متقبل رفضك... يعني إما تصبري وتدليه حقوقه أما تطلبي الانفصال...

أما بقى الست اللي ترفض جوزها أو تتجاهله أو تنام وهي عارفة إنه محتاجها في الوقت اللي هو بيتعامل معاها باحترام وحنية... وتبرر لنفسها وتقول (أصلي حرانة، زهقانة، ماليش نفس، مش طايقة نفسي، مهدودة من شغل البيت والعيال، حاسة إنني مش محتاجة ده منه، مكسلة أخذ حمام، خايفة على شعري) كل الحاجات دي ظلم وافترى على الرجل ولازم الست تفهم ساعتها إنها شريكة له في أي غلطة يقع فيها وده عقابها في الدنيا أما في الآخرة... ربنا يستر...

لمزيد من الكتب الحصرية ..

جروب عصير الكتب

FB.com/groups/Book.juice

عصير الكتب

Facebook.com/groups/Book.juice

هذا الكتاب حصري على جروب عصير الكتب

انضم الينا لتحصل على كل ماهو جديد

أرجوكمي سيبني الشغل

الله يسامحه بقى... (رفاعة الطهطاوي) رحمة الله عليه... هو السبب في
كل المشاكل اللي إحنا فيها النهاردة...
أيوه... هو أول من نادى بتعليم المرأة... أنا معرفش بس إيه اللي طلعتها
في دماغه... محنا كنا عايشين زي الفل والأشياء كانت معدن... والولية من

دول كانت تصحى الفجر تحلب الجاموسة وتزغط البظ والوز والعيال
وبعد كده تخبز العيش وتنصف الدار وبعد كده ترجع للباشا اللي نايم
مأنتخ... تزغده في جنبه بمنتهى الرقة علشان يصحى ينزل الأرض
يرويهها في نص ساعة تكون هي عملت الغدا ونزلتله على الغبط تغديه
وبعد كده ترجع على الدار تلاقي الداية مستنياهها علشان تولدها... لإنها
بتولد بانتظام كل ٩ شهور وممكن كل ٦ شهور... حسب وقت الداية
وظروفها...

ياااااااااااه كانت حياة رائعة، وفي منتهى المثالية والكل عايش في سعادة
وسلام الرجل والولية والعيال والبهائم...
بس طبعا الحاج رفاعة الطهطاوي ميرضيهاوش الكلام ده، رجع من بعثته
لأوروبا راح عامل كتاب اسمه (المرشد الأمين للبنات والبنين) وده كان
سنه ١٨٧٠ وقعد ينادي بصوت عالي لتعليم المرأة... وفعلا حصلت
الكارثة الأوانية.

بعد ٣ سنين انفتحت أول مدرسة لتعليم البنات... تاتاتاتاتاتاتاتاتاتاتاتاتاتاتاتاتات
طبعاً بنات داخليين وبنات خارجيين وكل شاب واقف وملمع الطربوش
ومستني يعاكس أي واحدة تكون نسيت تلبس الياشمك النهاردة... وابتدت
الأباحة وقلة الأدب.
المهم بعديها ب ٨ سنين رجع صاحبه (قاسم أمين) من فرنسا وابتدى هو
كمان ينادي بحرية المرأة في كتابه (تحرير المرأة)... وابتدى يحرضها
إنها تشتغل علشان تحصل على حريتها من الرجل المستبد...
وفعلا حصلت الكارثة الثانية، ونزلت المرأة للعمل وابتدت المشاكل
والندية بينها وبين الرجل... ومن يومها واحنا عايشين في الأرف ده... كل
بنت مفيش على لسانها غير كلمة... عايضة أشتغل... أنا لازم أمن
مستقبلي... أنا لازم أحقق ذاتي... ولو جالها عريس ورفض إنها تشتغل
علشان خايف عليها من البهدلة ونفسه يكون أسرة مستقرة وبيت هادى...
يبقى راجل أناني ورجعي ومتخلف ولازم يترفض فوراً...
وأنا بصراحة مش فاهم ليه نسيء الظن بالعريس من البداية... و نفترض
إنه هابقعدها في البيت علشان يتحكم فيها... أو ليه نعتبر إن عمل المرأة
هو الطريقة الوحيدة لتحقيق ذاتها... أنا أعرف مثلا إن الست تشتغل

علشان محتاجة... أو ليها ظروف خاصة... لكن تشتغل وخلص... ده بقى اسمه استهبال وعلشان أكون محايد هقولكم خمس حالات يحق للمرأة إنها تشتغل:-

١- لو لسه أنسة وخلصت دراسة وعايزة تصطاد عريس مثلاً وعندها فراغ أو حتى عايزة تساعد في مصاريف جهازها.

٢- لو كانت لا قدر الله مطلقة أو أرملة ومحتاجة فلوس علشان تصرف على نفسها أو على أولادها أو محتاجة تسافر بيروت تعمل شفت ونفخ.

٣- لو زوجة وولادها كبروا أو اتجوزوا وجوزها مشغول أو اتجوز عليها أو مش فاضيلها لأنه بيخونها علطول.

٤- لو زوجة وظروف جوزها المادية تعبانة ودخله ضعيف جداً (أقل من خمسين ألف جنية في الشهر) ومحتاجة تساعد.

٥- لو كانت زوجة بس لسة ربنا مرزقهاش بأولاد وحاسة بالوحدة والفراغ.

٦- لو متجوزة راجل محترم وظروفه كويسة وعندها عيال بس عايزة تنكد عليه وتقرفه كل شوية وتحسسه إنه ملوش لازمة في حياتها وإنها مستقلة وتقدر تستغنى عنه في أي وقت. ولما يقولها

(حضريلي الغدا) تقوله (متقوم انت تحضره... هو انت أحسن منى في إيه... ما احنا الاتنين بنشتغل)

طبعا رقم ٦ دي خارج اتفاقنا لإنهم ٥ بس أما السادسة دي فهي النموذج اللي عايز أتكلم عليه... دي زوجة محترمة ومتعلمة ومتجوزة راجل محترم وظروفهم معقولة وعندهم أولاد محتاجين رعاية وتربية وحب وحنان... كمان الراجل بيعمل اللي عليه في شغله ونفسه يرجع البيت

يلاقي زوجة جميلة مستنياه... ورغم إنه مبمئعهاش من أي اهتمامات أو نشاطات أو خروج أو فسح لكن برضه هي مصممه تشتغل.

واللى جاي ده حوار بين هند وهنداوي فى نفس الموضوع ياريت

تسمعوه

□ أرجوكي يا هند كفاية كده أوي... أنا مبقتش حاسس إنني متجوز انتي لازم تسيبي الشغل بقى... وبعدين أديكي شايفة ظروفي الحمد الله اتحسننت وسددنا كل ديونا ومبقناش محتاجين أي دخل إضافي، وبصراحة أنا والولاد اللي بقينا محتاجينك جدًّا...

- ياااااااا يا هندواي بقى أنت عايزني أسيب الشغل علشان خلاص ظروفك اتحسننت ومبقتش محتاج مساعدتي... إيه الأنانية دي!!! أنت لازم تفهم إنني كنت باشتغل أصلاً علشان أحس بقيمتي وأحقق ذاتي.

□ يعني إيه تحقيق ذاتك، الكلمة دي بتحسني إن الستات كلها حافظة مش فاهمة، أنا أعرف إن الست بتشتغل علشان محتاجة للشغل، أو عندها ظروف. لكن عايزة تنزلي الشغل علشان تثبتي ذاتك دي بقى اللي ملهاش ترجمة عربي...

- يا سلام.. يعني انت مش شايف إن شخصيتي اتطورت من ساعة ما نزلت الشغل... وبعدين انت كنت أول واحد مشجعني على كده قبل الجواز...

□ أولاً... قبل الجواز انتي كان عندك وقت فراغ رهيب وكانت خبرتك في الحياة زيرو، علشان كده طلبت منك تنزلي الشغل، وبعد الجواز مرضتض أضغط عليك تسيبي الشغل علشان تأخير الحمل، وقلت آهو تشتغلي أحسن ما تقعدي تفكري في الخلفة

ويجبلك اكتئاب، لكن دلوقتي بقى عندك أولاد ومسئولياتهم كل يوم بتزيد... مش ده برضه شغل وتحقيق ذات ولا هي أنانية وخلص، وبعدين انتي كل يوم اشتغلتيه يمكن إداكي خبرة بس أكيد أخذ في المقابل من أعصابك ومن حقوقي وحقوق ولادك...

- أه يعني عايزني أتفرغ لكم وابقى مجرد خدامة لولادي وجارية ليك. مش كده...

□ إيه المفهوم العقيم ده... بجد أنا مصدوم فيكي... انتي إزاي شايفة إن خدمتك لولادك تخليكي مجرد خدامة، ولا خدمتك ليا تخليكي جارية... يا بنتي دي أعظم مهمة في البشرية إنك تبني إنسان إنك تربى طفل ويتحول مع الوقت لإنسان صالح وناجح يراعيكي في شيخوختك ويخدم مجتمعه... أعظم حاجة في الدنيا إنك تسعدي جوزك وتحافظي عليه... أفكارك دي عمرها ما كانت أفكارنا ولا اتربينا عليها... بس إحنا بقينا بناخد من الغرب أسوأ ما فيه وخلص...

- يا حبيبي طب ما إحنا عندنا مربية وشغالة إيه اللي ناقصكم بس...

□ أه يعني انتي لخصتي دورك في البيت في مجرد واحدة ست بتشارك راجل في السرير، طب ليه متمرديش على الدور ده كمان وتقول (أنا مش مجرد جسم) وتجييلي جسم غيرك، وبكده تبقي اتفرغتي تمامًا لذاتك... بس ساعتها هسألك هي فين دي ذاتك دي اوصفيها لي... يا هند... الست كل ما بتنفصل عن دورها اللي ربنا خلقها علشانها كل ما بتفقد ذاتها... أرجوكي لازم تفهمي إن أشرف مهنة في الوجود لأي ست إنها تكون خدامة لولادها وجوزها... ولا انتي ناسية إن إحنا كلنا بنخدم في مكان عملنا... يعني ليه لما

واحد بيتحال على المعاش يقولوا عنه إنه خلاص أنهى خدمته...
يعني برضه خدمه ولا الخدمة للغريب فيها كرامة والخدمة للأولاد
والزوج فيها إهانة...

- هنداوي أرجوك حس بيا شوية... انت مش متخيل إني بقى ليا عالم
تاني وأصدقاء وحياة اتعودت عليها...

□ والله يا هند حاسس بيكي بس أرجوكي إنتي إدي نفسك فرصة
تقعدى وتستمتعي بالعالم الأولاني... عالم البيت والأولاد
والزوجة... عالم الأسرة، ارجعي اتكلمي مع الولاد وشوفي
مشاكلهم وعيشي حياتهم البسيطة... انتي مش فاكرا أد إيه كنتي
مبسوطة لما أخذتي أجازة الرضاعة... كنتي خلاص اتعودتي على
البيت وكنتي مبسوطة جدًّا وياريتك ما رجعتي تاني بعدها...

- يا روح قلبي انت واثق إني مهتمية ببيك وبالولاد، وإنكم مش
محتاجين مني أكثر من كده...

□ بيتهيا لك... الولاد محتاجينك جدًّا... بس هما افتكروا إن ده الطبيعي
إنك على طول في الشغل وراجعة مجهددة ومتوترة ومضغوطة من
المشاكل والمواصلات... افتكروا إن ده العادي يعني، علشان كده
بطلوا يتكلموا معاكى غير للضرورة، وابتدوا يتعودوا إن عندهم
اتنين (أب) أنا وانتى... وواثق كمان إن أسرارهم دلوقتى مع
أصحابهم، أو بالكثير مع الدادة... ياهند افهمي الولاد محتاجين
لعاطفة الأمومة... إحساسها اهتمامها، محتاجين أم كاملة متفرغة
لأحلامهم وأفكارهم... أنا بجد مستغرب إزاي متوقعة تنجحي في
شغلك مع كل الضغوط دي وكمان تنجحي في تربية ولادك
والاهتمام بيهم وبييا... ده مستحيل؛ لأن النجاح في كل حاجة أكبر

من قدرات أي بني آدم... يعني مستحيل هتنتع إنك تبقي قوية في الشغل ورقيقة في البيت، كمان أنا شايف إن أنوثتك انتهت تمامًا وسط ضغوط شغلك والصراعات اللي موجودة فيه، يا بنتي ده كفاية المواصلات وانتي رايحة وراجعة... ده أنا ساعات باسيب العربية في الشارع من كتر الإشارات وارجع على رجليا مش طابق نفسي... يعني مستحيل تقنعيني إنك بعد كل ده هتلاقي أعصاب تسمعي الولاد ومشاكلهم وتراعييني وتراعي ظروفني وضغوطني أنا كمان...

- يعني أنا المفروض اللي أراعي الناس كلها... طب وانا مين يراعييني...

□ أيوة أيوة معاكي حق... منتي برضه محتاجة حد يراعيكي حد يستناكي وانتي راجعة من الشغل علشان يخفف عنك... حد يعوضك نفسيًا عن كل الضغوط اللي بتلاقيها، حد يرفعك معنوياتك ويحسسك بقيمة شغلك، حد يساندك ويديكي دعم ويشرك إنك بتكافحي علشانه... بس خدي بالك إنتي كده بقيتي محتاجة (زوجة).

- نعم!!!!!!!

□ أيوة محتاجة زوجة لأن كل الحاجات اللي انتي محتاجاها بعد رجوعك من الشغل مش هتوفرها لك غير زوجة رقيقة، فيها أنوثة، حنية، تططب عليك وتحسسك بقيمة اللي بيتعمليه، وبالليل تديكي من الرومانسية والإثارة والمتعة اللي تخليكي تعرفي تكلمي كفاحك وتروحي الشغل تاني يوم... للأسف يا هند... هي دي مشاعري واحتياجاتي دلوقتي... محتاج زوجة... يعني انتي بقيتي واحد

صاحبي... الندية قتلت مشاعرنا.. واستقلالك المادي خلاني أفقد
إحساسي باحتياجك ليا، وبالتالي فقدت إحساسي بأنوثتك، وانتي
بالطبع بطلتي تحسسيني بأي تقدير. فابتديت أكره شغلي وأحس
بعدم أهميته...

- طب ما أنا عرضت عليك إنك تقلل من ساعات شغلك وانا أساهم
معك في مصاريف البيت، بس انت رفضت...

□ أه طبعاً مستحيل هقبل لإني راجل بحترم نفسي، ولإني عارف إيه
هي احتياجاتي - أنا محتاج زوجة - محتاجك إنتي يا هند...

- والله مقدره وحاسة بيك وبحبك وبحب الولاد وفاهمة كل الحاجات
اللي بتقول عليها دي... بس برضه برجع وأقول لنفسي (يعني
تدرسي كل السنين دي وتحققي كل الخبرة دي في شغلك وفي
الأخر تسيبي كل حاجة وتقعدي في البيت) يعني ده مش حرام.

□ ليه بتقولي كده يا هند... يعني أنا لو قتلتك تعالي اشتغلي أستاذة في
الجامعة علشان تربي وتعلمي جيل مش ساعتها هطلب منك كل
الدراسات والخبرات دي؟؟؟؟؟؟

- طبعاً!!!!!!!!!!!!!!

□ طب ليه مستخسرة كل ده في ولادنا... يعني انتي مش شايقة إن
ولادنا بإذن الله هيستفيدوا من كل حاجة اتعلمتها في حياتك،
وهيطلعوا أفضل من ولاد واحدة تانية معندهاش إمكانياتك، يعني
كل اللي حقتيه مهم... بس الأهم نستثمره في المكان المناسب،
وأكيد مفيش مكان أفضل من ولادنا نستثمر فيهم، ولا إيه...؟

لمزيد من الكتب الحصرية ..

جروب مصير الكتب

FB.com/groups/Book.juice

مناخير جوزي

من المعترف بيه في مجتمعنا الشرقي وبالذات عندنا في مصر إن
الزوجة ممكن تتخفق من جوزها وتبقى مش طايقاه في حالتين:-
الأولى:- لما يتحال على المعاش ويتقاعد من شغله...
الثانية:- لما يرجع من السفر بعد غربة عشرة خمستاشر سنة ويقعد في
البيت...
والحالتين طبعًا بيربطهم عامل مشترك هو إن الراجل بيقعد في البيت
بشكل دايم بدون شغلة ولا مشغلة، وطبعًا ساعتها بيلاقي عنده كمية
فراغ رهيبية، ويكتشف فجأة إن البيت هو الهواية الجديدة والوحيدة اللي

ممکن یمارسها، وبالتالي بیبتدی یتدخل فی کل کبیرة وصغیرة... سواء فی شئون البیت وطریقة إدارته أو حتی فی حیاة الزوجة والأولاد... ومن هنا ینلای الطرف الثاني اللی هی الزوجة اللی اتعودت علی الاستقلالیة فی کل حاجة یتفجر وتعرض، وتبتدی المعارک بینهم اللی غالبًا یتنتهی بانتصارها وانسحاب الزوج للشارع إما علی القهوة یلعب طاولة (ده لو کان فقیر) إما علی الکافیة یتلعب جیمز (ده لو کان غنی)...

المصیبة الکبیرة بقی لو كانت دی طبیعة الراجل أصلًا من بداية الجواز... یعنی متعود یتدخل فی کل حاجة ساعتها طبعًا الزوجة مضطرة یا إما تأخذ علاج شهري للسكر والضغط والقولون وقرحة الاثنی عشر وشلل الأطفال، یا إما تستسلم وتعود علی كده... أو الاحتمال الثالث: تنسحب من البیت وتنزل تلعب طاولة علی القهوة أو جیمز علی الکافیة حسب ظروفها المادیة...

طب کویس... بس إیه علاقة الکلام ده باسم الیاب (مناخیر جوزی)... ده سؤال وجیه... بس للأسف ملوش إجابة محددة لإن كلمة (مناخیر) فی مفهوم الزوجة مختلف تمامًا عن مفهومها عند عموم الناس... بمعنی أوضح إن كلمة (مناخیر) عند الناس بتعنی (أنف) یعنی مجرد جزء غضروفي بارز فی منتصف الوجه وظیفته بتقتصر علی التنفس والشم...

لکن الزوجة لما بتقول (مناخیر جوزی) بقی بتقصد معنی تانی خالص وده اللی هنفهمه من مکالمة هند لیا النهاردة...

- ألو... أیوة یا إیهاب أنا خلاص زهقت وتعبت وقرفت... مش قادرة أستحمل... أعصابی خلاص بتنتهار..

[?] فیہ إیه مالک یا هند؟

- هندأوی خلاص بقی حاجة لا تطاق..

[?] لیہ مالہ...؟

القميص الأزرق... (يا حبيبي خلاص خيظته الصبح)... طب وليه
تعملي حاجة من غير متقوليلي، أنا كنت قاطعه علشان الحسد...
(أنا أسفة يا حبيبي)... يرجع يسأل... الولاد ناموا؟ (لأ)... طب
وليه صاحيين لحد دلوقتي مش عندهم زفت مدرسة الصبح... (يا
حبيبي بقولك لأ نامو، مش لأ صاحيين)... طب وليه يناموا من
غير ميسلموا على أبوه، ولا أنا خلاص ماليش لازمة في البيت
ده... (يا سيدي دماغي ورمت صدعتني كفاية بقى)... إزازه المية
تبقى جنبه ويقوللي هند هاتي المية لو سمحتي... يا سيدي ما هي
جنبك انت مكسل....

حتى في السوبر ماركت لو اشتريت حاجة لوحدي يقوللي غالية
وملهاش لازمة لكن لما ببيجي معايا يقوم يملى الترولي بحاجات
ملهاش أي لازمة، ويدفع ألف جنبه وتبقى على قلبه زي العسل...

وكله كوووم ودولاب هدومه كوم تاني... يعني ببيجي علشان
يسحب القميص يقوم يهد رصة الدولاب كله... ويرجع يزعق...
ليه الدولاب مش مترتب... أهو على كده علطول حاشر مناخيره
في كل حاجة، والمصيبة كمان إني لما أعمل حاجة تضايقه يقعد
طول اليوم يعيد ويزيد فيها ويأنيبي ويحرق دمي... لكن لما أعمل
حاجة تعجبه ميتكلمش ولا حتى يعبرني بكلمة شكراً... وبعدين
بقي بيعمل حاجة الأيام دي بتزعلني منه مووووووووووت

□ إيه تاني؟؟؟؟

- يعني ساعات أروح أحضر له العشا وابتدي واحدة واحدة أخط
الأكل على السفرة... وعقبال ماظفي نور المطبخ علشان أقعد

لمزيد من الكتب الحصرية ..

جروب مصير الكتب

FB.com/groups/Book.juice

اتعشى معاه يكون ابتدى أكل... ده لو مكنش خلص أصلاً... أما
بقى موضوعه مع الريموت فده مصيبة لواحده!!!

□ إيه بيدخل مناخيره كمان في الريموت..؟

- أيوة... يا دوبك يخلص عشا ويطلع على السرير يمسك الريموت،
والجدع بقى يقدر يخذه منه... يفضل يقلب في القنوات من هنا
لهنا، ولا كأي قاعدة جنبه يجيب فيلم... ميعجوش... يجيب
مسلسل... ميعجوش... يجيب النشرة... يقعد يشتم في الحكومة
ويحول على الماتش يشتم في اللعبة ويحول... يفضل كده لحد
ربنا ما يرزقه بكليب لهيفاء ولا نانسي... يروح متمسمر وسايب
الريموت ويقعد يشتم في محمود صاحبه اللي رشطني له وكان
السبب في إننا نتعرف على بعض...

- لا بجد الله يكون في عونك... بصراحة ليكي حق... بس ليه
متحاوليش تلفتي نظره إن الحاجات دي بتضايك بدل ما تكتمي
في نفسك وتنفجري مرة واحدة كده... يعني خديها بهزار وحاولي
تفهميه واحدة واحدة...

- طب ماشي ده بالنسبة لمناخيره وهو صاحي طب أعمل إيه بقى
في مناخيره وهو نايم...

□ إيه ده... هو بيحشرها كمان وهو نايم...!!

- لأ.... البيه بيشخر وهو نايم... تخيل يا إيهاب... شكمان عربية
لوري بمقطورة... عزف سيمفوني منفرد ومتواصل طول الليل...
كل أنواع الموسيقى والإيقاع من أول كلاسيكيات موتزارت وباخ
لحد شعبيات عدوية... مبيجليش نوم خالص جنبه... أدخل أنام مع

جوزي بقى سايلنت

عصير الكتب

Facebook.com/groups/Book.juice

هذا الكتاب حصري على جروب عصير الكتب

انضم الينا لتحصل على كل ماهو جديد

أعتقد إن كل الرجاله على مدار كل العصور بيشتركوا في حلم واحد... وهو إنهم يلاقوا زوجة عندها خاصية (السايلانت) يعني ليها زرار يدوسوا عليه تقوم تسكت وتبطل رغي.
أما الستات بقى فعندهم حلم مختلف تمامًا... كلهم عايزين راجل رغاي... راجل مايبطلش كلام... بييجي من الشغل يقعد مع مراته يحكيها عن كل حاجة حصلت بداية من نزوله الصبح لحد رجوعه

بالليل... وبعد لما يخلص حكاوي بيتدي يسمع لكل حكاويها بداية من طفولتها لحد برضه رجوعه من الشغل.
علشان كده علماء الأرصاء بيعتبروا إن ده أهم اختلاف بين الجنسين وبيرجعوا السبب في كده للعوامل اللي جاية دي:
أولاً: بالنسبة للراجل:

١- طبعاً هو طول النهار في الشغل مايبين الرغي والحوارات والمشاكل والصراع ونفسه يرجع البيت يلاقي شوية هددووووو.

٢- الراجل عموماً مبيحبش فكرة الكلام للكلام؛ لأنه متعود على حل المشاكل وأخذ القرارات... يعني بيحب يجيب من الآخر.

ثانياً: بالنسبة للست:

١- طبعاً هي قاعدة طول النهار في البيت بين أربع حيطان مش لاقية حد تكلمه وخلصت كل رصيد الموبايل على أهلها وأصحابها ومستتية بفارغ الصبر رجوع جوزها من الشغل علشان تاكل ودانه.

٢- الست عموماً عندها دايمًا شعور بالقلق من ناحية جوزها، ودايمًا بتسأل نفسها: يا ترى لسة متمسك بيا؟؟ يا ترى لسة بيحبنى؟؟ علشان كده دايمًا سكوته بيخوفها ومحتاجه يتكلم علشان يحسسها بالأمان ويأكد تمسكه بيها.

٣- الست دايمًا محتاجة كلام حب وغزل وده عندها أهم من أي حاجة تانية وللأسف الراجل دايمًا شايف أن أفضل طريقة لتعبيره عن حبه لمراته هو الشغل والكفاح علشان يوفر لها الأمان .

دي بعض الأسباب المتوقعه وعلشان نقرب من المشكلة أكثر تعالوا
بقى نسمع الحوار ده بين هند وهنداوي

- يا هنداوي أنا بقالي ساعة باتكلم وأنت سرحان.

? يا حبيبتي أصلك حكيتيلي الموضوع ده إمبراح.

- طب أعمل إيه... أصل النهاردة محصلش حاجة جديدة
علشان كده بحكيك اللي حصل إمبراح.

?يعنى هو انتي لازم تحكي وخلص؟؟ يا ستي اسكتي شوية أنا
راجع من الشغل تعبان وعايز أسمع النشرة.

- النشرة!!! الله يرحم أيام الخطوبة لما كنت تقعد تمسك
وداني وهاتك يارغي وحكاوي وضحك وهزار لدرجة
إني أدمنت البنادول من الصداق بتاعك.

? يا ماما أيام الخطوبة مكانش عندنا قسط شقة ومصاريف
مدارس الولاد وجزار وسوبر ماركت و.....

- خلاص خلاص أنا آسفة، مش هاتكلم تاني... أنا فعلاً
غلطانة إني بفتح معاك مواضيع... أنا بعد كده مش
هعبرك وهاسيبك تكلم نفسك وحتى لو انت كلمتني
مش هأرد عليك وحتى لو.....

? كفااااااااااااااااااا... أبوس إيدك اسكتي شوية.

(تليفون البيت بيرن وهنداوي بيرد على صاحبه والمكالمة
بتستمر نص ساعة)

- طبعا دلوقتي رديت عالتليفون وبقيت زي البربنط
وطبعا دلوقتي عايز تنام علشان تعبت من الكلام مش
كده؟؟

7] طيب ياستي قوليلي عايزه ايه وانا هانفذ لك كل طلباتك.

- يا هنداوي أنا معنديش طلبات، أنا عايزاك ترجع زي
زمان من الشغل جري تاخدني في حضنك وتحكي لي
واحكيلك... تشتكيلي واشتكيلك... نرجع تاني
أصحاب... انت بقيت مش طابق لي كلمة... ده حتى
الموبايل لو كلمتك وانت في الشغل بتبقى عايز
تختصر وتقل بسرعة. ومجرد ما أحكيلك عن حاجة
تاعباني فوراً تقدم لي الحل مع إني مش عايزة الحل
أنا عايزة أتكلم معاك.

8] يا حبيبتى أصل بصراحة ومن غير زعل مواضيعك كلها بقت
عبيطة يعني يا أما شكوى من سوزي صاحبك يا أما خناقة مع
ناهد جارتنا يا أما مشكلة مع حد من قرابيك... يعني كلها
حاجات رخمة وتعصب.

- خلاص ياسيدي... احكي لي انت مواضيعك المهمة
واشركني معاك في اهتماماتك وحياتك... لكن حالة
الخرس الزوجي اللي وصلنا ليها دي مش هقدر
أستحملها.

لمزيد من الكتب الحصرية ..

جروب عصير الكتب

FB.com/groups/Book.juice

❓ خلاص يا حبيبتي أنا هارجع أصدعك زي زمان.

- بجد يا حبيبي... طب قوللي هاتعمل إيه؟؟؟

❓ هاجيب معايا كل زمايلي وانا جاي من الشغل ونقعد نرغي
أودامك لحد ماتصدعي...

لمزيد من الكتب المصرية ..

جروب عصير الكتب

[FB.com/groups/Book.juice](https://www.facebook.com/groups/Book.juice)

جوزي بيخوني

لمزيد من الكتب الحصرية ..

جروب عصير الكتب

FB.com/groups/Book.juice

هل هناك علاقة بين المنديل والخيانة الزوجية؟؟؟

وللإجابة على هذا السؤال ينبغي التوقف عند بعض النقاط:-

أولاً تعريف المنديل:-

هو اختراع بشري قديم يؤكد الميل الفطري للإنسان تجاه النظافة بشكل عام والمنظره بشكل خاص.

ثانياً تاريخ المنديل:-

(طرزان) هو أحد أبناء العصر البدائي وهو أيضاً أول من استخدم المنديل وقد وجدت له جدارية منحوتة على أحد جدران كهف التاميرا في إمبابة تصوره وهو يستخدم منديل مصنوع من جلد الديناصور ينظف به مؤخرته بعد قضاء حاجته أسفل شجرة كافور عملاقة...

ثالثاً تطور المنديل:-

ولقد تطور المنديل عدة مرات حتى وصل إلى القرن الماضي في صورة قطعة قماش يستخدمها الرجل لمسح العرق والأتربة أو يضعها خلف ياقة القميص حفاظاً على نظافته، ثم اتسع إيمانه بأهميتها إلى درجة أنه وضعها في جيب الجاكييت العلوي تأكيداً على نظافته الدائمة. ثم تحولت مع الوقت إلى رمز للأناقة.

لكن دوام الحال من المحال... فمع نهاية هذا القرن ظهرت دعاوي تنادي بإلغاء المنديل القماش... تحولت بعد ذلك إلى مظاهرات سلمية يقودها بعض النخبة من الرجال الشرفاء تنادي بإسقاطه وتحريمه نهائياً... لم أكن حتى وقت قصير ملماً بالأسباب التي دعت هؤلاء الرجال إلى رفض المنديل القماش إلى هذه الدرجة حتى قص لي جدي رحمة الله عليه الأمر قائلاً:

((ياابني المنديل القماش ده كان لعنة، وياما رجالة راحوا بسببه، يعني أنا ليا ثلاثة أصدقائي انقتلوا في ظروف غامضة وانا الوحيد اللي عارف إنهم انقتلوا بسببه... عندك مثلاً الأولاني مراته ظبطت في جيبه منديل عليه أحمر شفايف وتاني يوم لقوا جثته منقطة في كيس بلاستيك، وصديقي التاني مراته لقت منديله في شقة جارتها ومن يومها محدش يعرف عنه حاجة، أما بقى التالت فانتحر من نفسه لما نسي منديله على مكتب زميلته في الشغل))،

ومات جدي واختفى المنديل القماش وولدت أنا في عصر أقر به هو عصر المنديل الورق (الكلينكس) ذلك الذي نلقيه سريعاً في القمامة بعد أي خيانة زوجية... ولا من شاف ولا من دري... معلومة تاريخية:- بعد اختراع الكلينيكس بخمس سنوات قام العالمان... (براز بول وكيكي بيبي) باكتشاف ورق التواليت...

وهكذا استعاد الرجل حريته لسنوات طويلة وأصبح يخون بمنتهى الجراءة واثقاً من أن زوجته لن تتمكن من الحصول على دليل مادي حتى ظهر على السطح (عفرتو) مخلوق عجيب أكثر قدرة من المنديل على كشف الخيانات الزوجية وهو الجهاز اللعين والمسمى بالموبايل ذلك الكائن الذي اعتبرته المرأة وسيلة فعالة وسريعة جداً في اكتشاف خيانة زوجها حتى قبل حدوثها... وبإمكان أي منا متابعة أسباب الخلافات الزوجية وحالات الطلاق في العشر سنوات الماضية ليدرك أن هذا المخلوق وراءهم جميعاً... لعنة الله عليه... (راجع كل أفلام الفترة اللي فاتت بالذات سهر الليالي وموقف منى زكي وجوزها فتحي عبد الوهاب وإزاي اتكشف)...

غير إن هذه النسبة مرشحة للزيادة في الفترة القادمة وخاصة بعد التطور المذهل الذي يطرأ على المحمول كل يوم مثل....

(g. p s)، (Google earth)

!!وبذلك تستطيع زوجتك تحديد مكانك في أي لحظة وفي أي وضع والمصيبة إن الموبايل كمان بقى تاتش يعني يفتح لواحد في ثانية وانت يادوبك لسة هتخون... ولكن اليوم هل بإمكاننا نحن معشر الرجال أن ننادي بسقوط الموبيل كما فعل قديماً أبائنا الشرفاء... لا أظن... فلقد صار الموبايل أهم من الإنسان نفسه (يعني أنا شخصياً لو اختفيت مراتي مش هتسأل عليا... لكن لو موبايلها ضاع هتقلب الدنيا)... والنتيجة إنه ليس هناك جدوى من محاوله إسقاط الموبايل لذا فإنني أطالب الرجل بأن يكون أكثر حنكة وحيطة في التعامل مع هذا الجهاز الرهيب حفاظاً على حياته الزوجية، كما أدعو كل الرجال الشرفاء إلى مليونية تحمل شعار (الراجل المسطول ميشلش محمول)

والآن اسمحولي أن أقدم لكم شوية نكد في حوار تليفوني دار بيني وبين هند بعدما اكتشف خيانة هنداوي لها:-

□ ألو... أيوة يا هند إزيك... إنتي فين بقالك فترة طويلة مبتكلمنيش.

- لا ولا حاجة أنا كويسة... انت طمني عليك يا إيهاب؟

□ يا ستي أنا كويس بس واضح إنك انتي اللي مش كويسة.

- لأ يعني شوية تعب على شوية انشغال...

□ لااااااااااا واضح إن في حاجة كبيرة!!

- ايهىء.... ايهىء...

□ إيه يا هند انتي بتعيطي!! مالك إيه اللي حصل؟

- جوزي هنداوي بيخوني! ايهىء ايهىء.

- بنتكلمي جد... يعني متأكدة ولا مجرد شك؟
- أبوه... كان مجرد شك لكن من كام يوم اتأكدت..
- لأ احكي لي الموضوع من الأول...
- من حوالي سنة وانا حاسة إنه مش طبيعي... كل تصرفاته غريبة على طول تليفونه مشغول... عطلول مهتم بنفسه وبيرجع متأخر... دايماً شاردد... دايماً مش طابق الولاد... حياته كلها بقت لبس وبرفانات وسهر... دايماً ينتقد كل حاجة فيا... اتقلب ١٨٠ درجة ماشي بس برضه كل الحاجات دي مش دليل على خيانتة..
- لا منا بعد كده عرفت كل حاجة...
- إزاي؟
- كنت راكبة جانبه في العربية وبعد كده لقيت صوت الكاسيت بيغلويش، قلت أكيد الموبايل بتاعي أو بتاعه هيرن مننا عارف شوشرة الإرسال على الكاسيت بسبب الموبايل... لكن الغريبة إن الموضوع اتكرر كذا مرة من غير ما الموبايل بتاع حد فينا يرن... المهم... خلص المشوار ورجعنا البيت... اتصلت بدينا صاحبتي وحكيت ليها... قالتلي يا عبيطة إنزلي العربية ودوري، وفي الغالب هتلاقي موبايل تاني معمول سايلنت... وفعلاً نزلت واكتشفت..
- ايهئ.. ايهئ.. الخاين الكداب... أكثر من سبع سنين جواز... ادبتله كل حاجة، حبي وشبابي واهتمامي، عمري ما قصرت معاه في حاجة... عمري ما خليتة ناقصه حاجة... الكداب... الكداب... ايهئ

لمزيد من الكتب الحصرية ..

جروب عصير الكتب

FB.com/groups/Book.juice

□ طيب اهدي... اهدي من فضلك خليني أعرف أسمعك... وبعدين
عملتي إيه؟؟

- لقيت فعلاً موبايل تاني بخط تاني معرفش عنه أي حاجة ومعليهوش
غير رقم واحد بس بيكلمه دايمًا... طبعًا اتصلت بالرقم ده من خطي،
ردت عليا واحدة مايعتة، واضح إنها طبعًا من إياهم... سألتها انتي
مين؟... قالتلي انتي اللي مين؟... قفلت في وشها السكة... وبقيت
زي المجنونة مش عارفة أعمل إيه...

□ طيب وانتي قولتيله الكلام ده...؟

- لسة...

□ وهو مش ملاحظ عليكى حاجة؟

- طبعًا ملاحظ ودايمًا بيسألني... مالك وبقوله مفيش، بس خلاص مش
قادرة وعايزة انفجر... فكرت إنني أعرف عنوان الست دي وأروح
أقتلها ولا أهددها أو حتى اترجاها... فكرت إنني أواجهه وأصرخ في
وشه وأقوله إزاي تخوني بعد العشرة دي... إزاي. مش كان في بنا
عهد على الوفاء... ليه خونته... أنا عملتلك إيه...؟؟؟ إيه انت
عارف الخيانة عندي يعني إيه... أنا غير أي واحدة.. أنا الخيانة
عندي مش انهيار للحب بس... ده انهيار للرجال اللي عشت معاه كل
عمري... انكسار لصورته قدامي... ده كان نموذج رائع بحترمه،
النهاردة خلاص انهار ومبقتش بحترمه... انت عارف يعني إيه
واحدة متحترمش جوزها في قرارة نفسها... عارف لما بشوفه
بيكذب عليا ويقوللي أنا كنت في الشغل بحس إنه عريان بحس إنني
مش طايقة أسمع... أنا مش متخيلة إيه اللي ممكن يكون بينهم... يا
ترى حب... يا ترى جنس... تخيل ممكن جوزي يلمس واحدة

غيري... أو يقولها بحبك... تخيل... أنا مش طابقاه يلمسني... نفسي
انفجر وأقوله طلقني... أنا مش عايزاك...

□ هند أنا حاسس بيكي ومقدر مشاعرك، بس أرجوكي الأمور دي
مينفعش فيها انفعال أو تسرع، لازم نتأكد الأول من نوع العلاقة
وبعد كده نتصرف بحكمة...

- حكمه إيه يا إيهاب... هي دي حاجة محتاجة حكمة...!؟

□ طبعًا... دي أكثر حاجة محتاجة حكمة... يا هند دي أقوى عاصفة
ممكن تجتاح البيوت، وأكبر اختبار ليكي انتي شخصيًا... اختبار
لإرادتك وثقتك في نفسك وإصرارك على الاحتفاظ ببيتك وولادك،
انتى لازم تهدي وتفكري بهدوء... أرجوكي اعتبريها معركة
لاسترداد كل ممتلكاتك... جوزك... حياتك... وعمرك اللي فات...
معركة لازم تكسيبها لإنك مش ممكن بالبساطة دي تتنازلي عن كل
حاجة للتانية دي...

- يعنى عايزني أعمل إيه...؟ أقوله علشان خاطري... أرجوك...
سيبها...

□ لا طبعًا انتى مش لازم تقوليله إنك عرفتي من أصله...

- نعم...!!!

□ صدقيني... لأن الرجل فى الحالة دي... إما بيعتذر ويعلم ندمه لحد
ما يتأكد إنك سامحتيه وبعد كده يواصل العلاقة بحذر أكثر... يا أما
بيتحول لشخصية بحة ويلومك إنك بتراقبيه وبتجسسى عليه
وساعتها ممكن يقولك- أنا كده وإذا كان عاجبك - وفى الحالة دي إما

هتطلبي الطلاق أو تستمري وترضي بالأمر الواقع... والحالتين
أسوأ من بعض...

- يعني عايزني أعمل إيه؟؟

□ أهو كده... تعالي نفكر بعقل... أولاً مش لازم يعرف إنك عرفتي،
كمان تشيلي من دماغك فكرة إنك تروحي للست دي لأن بزيارتك
ليها هتخليها تتمسك بيه أكثر، وتحس إن الموضوع بقى صراع وفي
الغالب هتقوله، وبعدين مينفعش تهيني نفسك قدام واحدة زي دي،
ولازم تفهمي إن المفاتيح عندك وعند جوزك مش من عندها...

- يعني إيه عندي؟؟

□ يعني اسألني نفسك... يا ترى سبع سنين جواز غيروا فيكي إيه؟ يا
ترى لسه بتهتمي بنفسك... يا ترى لسه بتهتمي بجوزك ولا بقى رقم
٣ بعد البيت والولاد... يا ترى لسه بتقوليله كلام حب وإعجاب ولا
مستتية بس هو اللي يقول وبتتهميه على طول بالتقصير....

- لأ طبعاً لأنني، أولاً مهتمة بنفسي جداً... وبعمل علشانه كل حاجة
وواقفة إنه مش ناقصة أي حاجة... ثانياً يعني إيه أقوله كلام حب
واهتمام وإعجاب هو المفروض مين اللي بيقول؟؟

□ شوفي بالنسبة لاهتمامك بنفسك فكل ست شايقة إنها مهتمة جداً
بنفسها لمجرد إنها بتلبس أحياناً لبس مثير أو تحط شوية ماكياج...
لكن كل ده مش دليل على اهتمام الست بجوزها... أما بالنسبة للكلام
الحلو، لازم تعرفي إن الراجل في المرحلة دي من حياته يعني تقريباً
قبل ما يدخل سن الأربعين بيكون محتاج جداً لواحدة تحسسه بإنه
لسه مرغوب فيه، وإنه لسه جذاب، واحدة تمدح رجولته وتأكد ثقته

في نفسه... تمدح وقاره ونجاحه في شغله... وللأسف كل الزوجات
مبتدش بالها وبتشغل بالحاجة اللي هي محتجاها وتنسى هو محتاج
إيه وبالذات في المرحلة دي...

- طيب وانا مين يشوف احتياجاتي...؟؟

□ شوفتي... نفس المشكلة... أرجوكي انشغلي بيه شوية لحد متسترديه
وبعد كده هعلمك إزاي تخليه يشوف احتياجاتك... المهم دلوقتي لازم
تبتدي المسابقة...

- مسابقة إيه؟؟

□ مسابقة ملكه جمال البيت...

- تفنكر أنا فيا أعصاب تخليني أعمل كده...

□ لازم يكون فيكي أعصاب وإرادة وإصرار... عايزين كلام طلو
واهتمام زيادة وحنية... بس الأول لازم تحاولي تنسي مؤقتاً إنه
بيخونك، ومش لازم يلاحظ حاجة... بالعكس... ده إحنا هنحرك
ضميره ومشاعره في وقت واحد... عايزين مكياج وبرفانات وبيبي
دولز، عايزين حنية وإثارة... عايزين نحرك الأولاد ناحيته ونشغله
بيهم وبالحاجات الحلوة اللي بيعملوها مش العكس... بنجاحاتهم
والتزامهم وضحكهم وحبهم لأبوهم واهتمامهم بيه، وبالذات البنت
الصغيرة صلتها عليه بدلها وطفولتها...

- تفنكر ده كفاية...؟؟

□ ممكن كمان نفكر في مشروع مشترك... تشتتروا مثلاً شقة أكبر في
مكان تاني... أو لو معاكم فلوس اشتتروا حاجة في أسكندرية أو

الساحل أو السخنة... أو يا ستي اشتروا أرض للمستقبل... أو خليه
يعمل وديعة للعيال... أي حاجة تخليه يحس بدوره ويلفت نظره
للجاي من حياتكم...

- إيهاب أنا هحاول... بس عايزة أسالك على حاجة...

□ اتفضلي...

- هو إمتي الراجل بيخون مراته وليه...؟

□ شوفي... وارد جدًا إنها تكون نزوة حصلت في حياته بالصدفة
وبدون أي احتياج... يعني مثلاً واحدة قابلته صدفة واتعلق بيها... أو
واحدة كان يعرفها من زمان واتقابلوا تاني... أو ممكن زميلة في
الشغل والعلاقة اتطورت... ووارد كمان إنها تكون تجربة بإرادته،
يعني قرر يعرف واحدة... وفي الحالة دي يبقى عنده نقص في
واحدة من الاحتياجات الأربعة للرجل.

- وايه هي؟؟

١- (الاحتياج الجسدي)... وهو احتياج للغريزة بسبب تقصير
الزوجة وإهمالها في أنوثتها... يعني مثلاً تخنت أوي أو
شكلها اتلخبط أو أهملت في نفسها، أو ممكن مبقتش تحسسه
بالإشباع الجنسي بسبب عدم اهتمامها أصلاً بالموضوع
ده... يا أما بقى بسبب الفتور في العلاقة اللي ببيجي مع
الوقت، والاحتمال التالت ممكن يكون بسبب طاقة زائدة عند
الرجل ودي غالباً بتيجي في مدخل الأربعين وبتكون بسبب
اكتمال الرجولة من ناحية، ومن ناحية تانية بسبب إحساس
الرجل بأنه خلاص داخل على الخمسين وهيبقى عجوز

وعايز يلحق آخر حاجة في قدراته، في الوقت اللي بتكون
الست داخلة على مرحلة الهدوء الجنسي ومش قادرة
تسايره.

- بس أنا مش كده...

□ أنا عارف... إنه فيه ستات كتير مختلفة... بس أنا بتكلم على
الغالب...

- طب كمل، إيه بقية احتياجات الرجل الأربعة غير الجسدية...

٢- (العاطفية)... وهي احتياج الرجل للعاطفة والحب
والمغامرة، يعني عايز يرجع يحس إنه رومانسي أو حتى
مراهق، وببسموها المراهقة المتأخرة ودي برضه أحياناً
بتكون سببها الزوجة اللي بتعتبر الرومانسية والحب والهيام
في السن ده عيب أو ملهاش لازمة، وبالتالي الرجل بيدور
عليها بره، ودايمًا تلاقيه بيدور على بنت أصغر منه بكتير
علشان تكون عندها استعداد أكثر للرومانسية

٣- (الاحتياج العقلي)... وفي الغالب ده ببيجي مع النضوج
الكامل للراجل لما بيكون محتاج لعقل يساعده ويعمل لحياته
جدولة، يعني بمعنى أصح سكرتارية عاطفية... وده فعلاً
اللي بيخلي معظم رجال الأعمال يعملوا علاقة مع
السكرتيرة اللي بتنظمه حياته وتهتم بأفكاره وأعماله
ونجاحاته.

لمزيد من الكتب الحصرية ..

جروب مصير الكتب

FB.com/groups/Book.juice

٤- الأخير بقى هو (الاحتياج الروحي) وده بييجي من حاجة اسمها الفراغ الروحي يعني مفيش أصدقاء... مفيش زوجة ينفع يتكلم معاها... وتسمعه ويتناقشوا مع بعض في أي حاجة... والراجل ده غالبًا بتلاقية بيعمل علاقات أشبه بالصدقة وممكن تكون على الشات مثلاً أو الموبايل...

هما دول يا ستي احتياجات الراجل الأربعة واللي المفروض الزوجة تحاول تحققهم بقدر استطاعتها....
- يعنى كل الرجالة عايزة واحدة فول أوبشن بتعرف تعمل كل حاجة؟؟

□ معظمهم... لكن في الغالب بيكون نقطة ضعفه ناحية واحدة بس منهم والزوجة العاقلة هي اللي تعرف نقطة ضعف واحتياج جوزها وتلعب عليها، لأنه في الغالب بيقع في علاقة بسببها... وآخر حاجة هقولها لك... امسكي نفسك وبلاش تنهاري... كمان بلاش تحكي لأي حد بالذات لأهلك لأنها أولاً خيانة لأسرار بيتك، ثانياً هتولع الموضوع أكثر، ثالثاً وده الأهم إنها هتسبب أثر سيء جداً عند أهلك ناحية جوزك مع الوقت وهيفقدوا احترامهم ليه، وده بقى انتي اللي هتعانى منه بعد ما تزول المشكلة إن شاء الله... هسيبك دلوقتي واول عديني إنك هتحاولي تعملي اللي قولتلك عليه ومتنسيش الدعاء، وانا برضه هطلبه دلوقتي وأحاول أديله كلمتين بس مش هخليه يعرف إنني عندي أي فكرة عن حاجة...

- أنا متشكرة يا إيهاب علطول تعباك معايا...

□ متقوليش كده يا حبيبتى ربنا يهديهولك ويصلح بيتكم... تصبحي على خير.

- وانت من أهله.....

لمزيد من الكتب الحصرية ..

جروب عصير الكتب

[FB.com/groups/Book.juice](https://www.facebook.com/groups/Book.juice)

- ألو... هنداوي إيه أخبارك..
- أيوه يا إيهاب فينك ياعم...
- معلش يا حبيبي كنت مشغول بقالي فترة، أنت طمني عليك وعلى هند والأولاد..
- الحمد لله زي الفل... بس قوللي يا هوبة مال صوتك...
- لأ والله... بس حصلت مشكلة تعباني نفسياً أوي..
- اللهم اجعله خير إيه اللي حصل؟؟
- لأ أصل واحد صاحبي في الشغل كان هيقول مراته إمبارح والجيران أنقذوها منه، وفيه كلام إنه اكتشف خيانتها..
- أعوذ بالله... دي القيامة هتقوم يا أخي... إزاي واحدة تخون جوزها اللي مأتمنها على شرفه وعرضه وبيته وولاده... يا أخي دي ستات عايزة الحرق...
- والله أنا زيك مصدوم... بس تعرف يا هنداوي إن اللي لفت نظري في الموضوع، هو حالة الاستياء اللي بتحصل لأي حد أحكيه الموضوع ده، مع إنني بحكي كتير عن الخيانات الزوجية اللي بيعملها الرجال ومبلاقيش نفس الاستياء، زي ما يكون خيانة الرجل حاجة عادية ومعتادة عند الناس...
- طبعي...!! لأن خيانة الرجل غير خيانة الست؟؟؟؟

□ إيه الفرق يا هندأوي؟؟؟؟

- خيانة الرجل بتبقى نزوة أو ضعف، ومفيش وراها مصايب، لكن خيانة الست هي الزنى... اللي بيحبيب ولاد حرام ويخلي الرجل يربى ولاد مش ولاده، يشيلوا اسمه ويورثوه... يعني مصيبة...

□ آه... يعني أنت عايز تقول إن المشكلة في خيانة المرأة إنها بتجيب ولاد حرام... طب إيه رأيك لو الست مبتخلفش... ينفع في الحالة دي تخون جوزها؟؟؟

- برضه لأ... ياعم ده شرفها ولازم تحافظ عليه...

□ يعني عايز تقول أن الرجل معندوش شرف يحافظ عليه...

- إيه يا عم إيهاب أنت عايز تقول إيه؟؟؟

□ لأ عايز أقول أن مفيش أي فرق بين الخيانتين... دي خيانة شرف وأمانة وإهدار للثقة... والثانية زيها... حتى الدين لما اتكلم عن الزنا ساوى بين الزاني والزانية في العقاب وقال عنه بشكل مطلق (ولا تقربوا الزنا إنه كان فاحشة وساء سبيلاً) من غير ما يحدد، لأن المشرع بيتكلم عن عملية مشتركة بين الرجل والست... ليه إحنا بقى نفرق...

- أيه ياباشا أنت عايز تحلل زنا الستات ولا إيه؟؟؟

□ لأ عايز أحرم زنا الرجالة وأساويه بزنا الستات زي ما ربنا قال، علشان المجتمع يبطل يتعامل معاه على أنه شيء بسيط، وأنت أكيد فاهم أنه سهل جداً يجيلك واحد صاحبك يحكيك عن مغامرة نسائية وهو متجوز ويبقى فخور أوي، والغريبة أننا بنعتبره فلانتينو راجل

مقطع السمكة وديلها يعني... لكن لو سمعت عن أي واحدة متجوزة
ليها مغامرة بتعتبرها فوراً بيتش وحقيرة وواطية ويبقى نفسك تروح
تخنفها، ويصعب عليك أوي جوزها المسكين... صح ولا لا؟؟؟

- عندك حق بس تفكر فيه المفهوم ده جوانا؟؟؟

□ ببساطة لأن الراجل كائن مغرور عنده كل الإمكانيات وليه كل
الحقوق، ومش من حق أي حد يحاسبه، حتى الزوجة... ممكن
يطلقها فوراً لو قررت تحاسبه... مع أنهم شركا في نفس الحياة
وبينهم اتفاق ضمني بالعهدة والأمانة من يوم ما اتجوزوا... لكن هو
بيسيء استخدام حقوقه... وناسي أن ممكن العقاب يجيله في أعلى ما
يملك، ولاده... صحته... فلوسه... حاجات مينفعلش بعدها الندم...

- ياعم وحد الله... ده ربنا غفور رحيم...

□ معاك حق... ربنا غفور رحيم... وكمان ستير... يعني بيستر... مرة
واتنين وتلاتة ويدينا فرصة للرجوع والتوبة، بس لما بنعانده ونتمادي
ونفكر أن ملناش رادع... بيظهر بقية أسماءه... المنتقم - شديد
العذاب، كده يعني... ولا انتا مش معايا برضه.

- بس يا إيهاب ساعات بتكون الست سبب في خيانة جوزها ليه.

□ ده كلام فارغ، أنت بتكلمني عن راجل ملوش إرادة، راجل بيستخبي
ورا أي مبرر ويحمل مراته حتى أخطاءه... يعني إزاي راجل
يخسر دنيته وآخرته علشان مراته تعياه في حياته، أو مقصرة معاه
أو حتى مش مهتمة بنفسها... يعني ليه ميحاولش معاهها مرة واتنين
وتلاتة ويلفت نظرها ويعلمها علشان يحافظ على بيته وولاده، وبعد
كده لو فشل يبقى ينفصل عنها أو حتى يتجوز عليها، مش ده أرحم

ما يدمر نفسه وبيته وحياته تحت مبررات تافهة... يا أخي أو مال
نبقى رجالة إزاي؟؟

- طب بس مش كل الرجالة لما بتخون بتعمل علاقة كاملة (محرمة
يعني)!!!

□ برضه اسمها خيانة يا هنداوي...

- يا أخي يعني لو راجل بيتكلم مع واحدة غير مراته أحياناً وبيحس
معاها بالراحة... إيه المانع... يعني بلاش تكلعها أوي يا أبو إيهاب.

□ بس دي مش كلكعة، لأنك أولاً مترضاش إن هند تتكلم مع واحد
غيرك وتقولك أصل بحس معاه بالراحة... ثانياً متقدرش تنكر إن
النوع ده من العلاقات في الغالب بيتطور لحب وأحياناً بيتطور لأكثر
من الحب وانت فاهم طبعاً...

- طب لو الراجل ضمن إن العلاقة مش هتطور؟؟

□ برضه خيانة... برضه خيانة يا هنداوي... خيانة مشاعر... خيانة
أمانة... خيانة عهد بينك وبين مراتك... يا أخي دي أكثر حاجة
تجرح المرأة خيانة المشاعر... ده يمكن أكثر من خيانة الجسم...
لإن الست بطبيعتها رومانسية أكثر مننا... يعني المشاعر بتهمها
أكثر من أي حاجة ثانية، وأي ست بتتخيل أن جوزها ممكن يحس
بالراحة مع واحدة غيرها، ويقولها كلمة بحبك ده بيدمرها ويهدم كل
حاجة فيها... وساعتها بتحس إن دورها في حياته انتهى وأنها
اتحولت لمجرد زوجة أو أم العيال زي ما بيقولوا، وساعتها بتكره
حياتها وبتتمنى الموت... انت نفسك يا أخي تخيل للحظة إن مراتك

لمزيد من الكتب الحصرية ..

جروب مصير الكتب

FB.com/groups/Book.juice

بتقول بحبك لأي واحد غيرك، بالله عليك ساعتها هتفرق معاك إذا
كانت خيانة جسم ولا خيانة مشاعر...

- إيهاب طب أنا هضطر أقفل معاك دلوقتي علشان جالي شغل...

□ أنا آسف يا هنداوي طولت عليك بس كنت محتاج حد أدرش معاه
وانت بالذات بعتربك نموذج للزوج المحترم ويهمني رأيك..

- أنا آسف يا إيهاب لازم أقفل دلوقتي... سلام...

.....
طبعا هنداوي قفل معايا لانه مقدرش يواجه الحقيقة... والحقيقة إنه بيظلم
نفسه قبل ما يظلم مراته وولاده... لانه أول واحد هيدفع التمن... وأعتقد
إنه بعد المكالمه دي هيعيد حساباته وهيبتدي يخاف على النعم الكثير اللي
ربنا إدهاله...

بس إيه رأيكم أنا فحمته... صح؟؟؟؟

هنداوي عايز يتجوز عليا

لمزيد من الكتب الحصرية ..

جروب نصير الكتب

[FB.com/groups/Book.juice](https://www.facebook.com/groups/Book.juice)



من كام سنة كده طلعت في دماغي فكرة مجنونة وقررت أعمل كتاب
عن تعدد الزوجات... وسميته (برضه هاتجوز ثاني) بس يا سيدي
وعينك ما تشوف إلا النور... يادوبك نزل المكتبات ولقيت حرب أهلية
قامت في البلد...

جمعيات ومنظمات وأحزاب وميليشيات... ناس بتطالب بإعدامي، وناس
بتهدد باغتالي، وناس بتهتف باسمي، وناس بتتطالب بتنصبي خليفة
للمسلمين... وأنا طبعًا مش فاهم حاجة... مقابلات في كل البرامج
التلفزيونية وأحاديث على كل الفضائيات... منشئات في كل المجالات

والصحف القومية والمعارضة، صفحات على الفيس بوك باسمي واسم
الكتاب ومدح مرة وشتيمة بالأب والأم مرات...
أمشي في الشارع الأقي ناس بتبتسم وعايزة تتصور معايا، وناس تانية
بتلعن سلسفيل أهلي وتحدفني بالطوب وهي بتهتف الله أكبر... وأنا
برضه مش فاهم أآآآآآ أي حاجة...
مراتي أيامها كانت في العمرة مع أبوها ولما رجعت وسمعت
الموضوع... نزلت الشارع و عملت صوان كبيبيبيير... وعزمت كل
صحابتها وجيرانها وأهلها... آل إيه علشان تاخذ العزاء فيا... على
أساس إن الطلاق مش كفاية من راجل واطي زيي... وفي نفس الأسبوع
اتعمل قدام مقر مجلس الشعب سرداق كبير ضم معظم الطوائف الدينية
والتيارات السياسية المختلفة وعلى رأسهم جمعيات حقوق المرأة
و جمعيات تحرير المرأة و جمعيات المرأة المستبدة و جمعيات المرأة
المتوحشة... والجهة العلمانية المتحدة... وطالبوا جميعاً باستصدار حكم
قضائي عسكري بطردي من البلد... وفعلاً صدر، بس الغريبة إنني لما
جيت أسافر قالولي في المطار إنني ممنوع من السفر... وبكده كنت أول
مصري يصدر في حقه حكم بالطرد والمنع من السفر في نفس الوقت...
أنا طبعاً ساعتها مكنتش عارف أروح فين، يعني أدخل ولا أخرج... في
الآخر ربنا هداني لفكرة إنني أشترى خيمة وأبات في المطار لحد ما
يرسوا على حل... ثاني يوم قرئت في الجرايد الأجنبية إنهم أدرجوا
اسمي على قوائم الإرهابيين مع بن لادن والظواهري وأبو مصعب
وباقى الشلة
أنا قلت يا واد كفاية قوي كده وطالما مش فاهم حاجة انتحر واخلص
وفي الآخرة هتشوف!! لو دخلت النار يبقى أكيد عملت حاجة غلط
والناس دي كلها صح وعندها حق... ولو دخلت الجنة يبقى أكيد عملت
حاجة صح والناس دي كلها كفرة ولاد ستين في سبعين... وفعلاً مسكت
المسدس وحطيته في الشوربة... ولسه هاشرب لقيتلك صوت دوشة في
المطار... سألت (إيه يا جماعة اللي حصل) قالولي البلد قامت فيها ثورة
٢٥ يناير... قلت يا نهار اسود... كل ده بسبب الكتاب... لكن الحمد الله
اتضح بعد كده إنه بسبب كتاب ثاني خآآآآآالص، كانوا الثوار كاتبين اسمه

على يفت كبيره وماشيين بيها في الشوارع والميادين الكتاب كان اسمه (عيش - حرية - عدالة اجتماعية). وعرفت إن الكتاب ده كان ممنوع من النشر من حاجة وتلاتين سنة.

المهم... الحمد لله الكتاب بتاعهم نجح وخلعوا الرجل اللي كان مانع نشره لأنه مبيعرفش يقرا من أصله... ومسك المجلس العسكري البلد والناس نزلت واتصورت مع الدبابات... واتعمل الاستفتاء على كتاب تاني خالص... لكن الناس لإنها كانت بتحب الجيش وشايلاله جميل إنه وقف مع الثورة... اشتريت الكتاب... لكن للأسف الكتاب طلع مكتوب باللغة اللاوندية يعني لا الشعب عرف يقراه ولا المجلس عرف يطبقه وحصلت الخناقة... والناس قطعت الصور اللي اتصورتها مع الدبابات... واتعملت الانتخابات البرلمانية وفاز الإسلاميين لإن الشعب كان زهق من الناس اللي مبتعرفش ربنا... علشان كده قرر ينتخب الناس اللي كانوا بيهونوا العيشة عليهم زمان ويوعدهم بالجنة... واتشكل البرلمان من الدقون وحفظة القرآن وخريجي المعتقلات... وراهن عليهم الناس الغلبة وابتدوا يلحموا من جديد بالجنة... بس المرة دي على الأرض مش في الآخرة.

وابتدى يرجع موضوع كتابي تاني... بس المرة دي الهتافات زادت لصالحه وقالوا إني بطالب بتطبيق السنة في التعدد... ولقيت نفسي للمرة العشرين مش فاهم حاجة بقول للناس في الشارع:- يا جماعة أنا مش رجل دين علشان أطالب بتطبيق السنة - ده إذا كان التعدد سنة من أصله - أنا بس كنت بطالب المجتمع يرفع الحظر عن الكلام في الموضوع ده... لإن الناس محتاجة تعرف يعني إيه تعدد... وإمتى يبقى صح وإمتى يبقى غلط... إمتى يبقى لصالح المجتمع وإمتى يبقى ضده... الناس محتاجة تفهم إيه موقفه الشرعي يا ترى هو سنة ولا فرض ولا مستحب ولا مكروه ولا حتى مباح... ناس كثير بتخاف تطبقه رغم احتياجها ليه... وناس كثير بتطبقه غلط رغم عدم احتياجها له... كل ده لإن الموضوع غامض ومش بيتناقش غير بس في الكتب السلفية اللي مش بيقرأها غير السلفيين اللي هما أصلاً مؤمنين جداً بالتعدد وبيطبقوه... يعني مش محتاجين أصلاً للكتب دي...

هو ده كان هدفي من الكلام في الموضوع ده... وهو ده كمان هدفي
دلوقتي من عرض المكالمة دي اللي دارت بيني وبين هند مرة... وبينني
وبين جوزها مرة ثانية... ياريت تتفضلوا معايا تسمعوا بنفسكم:-
بس ياريت تركزوا معايا أوي وتسامحوني إني هقلبها جد؛ لأن بجد
الموضوع ده مصيري في حياة ناس كثير ولازم نحسمه، وخذوا بالكم
كمان دي آخر مرة هتسمعوا هند وهنداوي، وبعد كده مش هتسمعوا غير
نفسكم... يللا بينا.

لمزيد من الكتب الحصرية ..

جروب عصير الكتب

[FB.com/groups/Book.juice](https://www.facebook.com/groups/Book.juice)

- ألو...أزيك يا إيهاب...
- أبوة... إزيك يا هند إيه أخبارك...؟؟
- إيهاب محتجالك أوي.... أرجوك لازم ترجع بسرعة...
- خير في إيه...؟ واضح من صوتك إن فيه حاجة كبيرة أوي...؟؟؟
- مفيش... هي كل حاجة خلاص انتهت..؟
- هي إيه دي اللي انتهت...؟؟
- حياتي... مع هنداوي....
- طب اهدي بس واحكي لي اللي حصل؟؟
- إيهاب مش وقت حكاوي، أنا خلاص أخذت قراري ولازم اتطلق منه...
- ياااااااه أنا عمري مشفتك بتتكلمي بالحرقة دي... للدرجة دي الموضوع كبير...؟؟
- ده إنسان أناني، وانا حزينة على كل يوم ضيعته من عمري معاه، أرجوك لازم ترجع وتطلقني منه النهاردة....
- طب بس قوليلي عمل إيه، وانا أوعدك إن الموضوع لو يستاهل هنزل فوراً...
- البيه عايز يتجوز عليا... ايهى... ايهى...
- طب بهدوء... أرجوكي امسكي نفسك وبطلي عياط واحكي لي عرفتي إزاي..؟؟

- هو بنفسه قاللي...؟؟
- قاللك عايز اتجوز...!!! كده مرة واحدة...!!!
- أيوه الأستاذ خلاص مبقتش فارقة معاه، وبيتكلم بمنتهى الثقة...
- يبقى أكيد هو نفس الموضوع القديم... مش كده؟؟
- للأسف لأ... ده موضوع ثاني... أقصد موضوع ثالث...
- ليه هو حصل حاجة بعد المشكلة إياها... أصلك مكنتيش بتحكيلى من بعدها، وانا قلت خلاص أكيد الموضوع انتهى وربنا هداه ورجع لعقله...
- هو فعلاً ده اللي حصل ساعتها، وانا نفذت كل اللي انت قولتهولي ومرضتش أصارحه بموضوع الموبايل السري بتاعه... وكتمت في قلبي وحاولت أسمع كلامك وأغير من نفسي...
- ويا ترى الطريقة دي نفعت معاه...؟؟؟
- أيوه فعلاً... في وقتها نفعت، وابتديت المح من تصرفاته شعور بالندم وتأنيب الضمير، وخصوصاً مع معاملتي الجديدة معاه واهتمامي بنفسى واهتمام الولاد بيه....
- بس يا ترى حسيتي إنه ساب البنات دي وقتها...؟؟؟
- أيوه سابها....
- عرفتي إزاي...؟؟
- هو اعترفلي....

نعم....!!!

- أوبة اعترفلي، قعد الأول كام يوم حزين ومهموم، وانا كنت حاسة إن فيه حاجة مضيقاه بس مرضتش أسأله، لحد مهو جيه بنفسه واعترفلي إن كان في حياته نزوة.... واحدة زميلته في الشغل وابتدت علاقتهم تتطور... وابتدى يحبها، لكن فجأة اكتشف إنها مستهتره وبتتكلم مع كذا واحد في نفس الوقت ولما واجهها اتعاملت معاه بمنتهى قلة الأدب.

معقولة حكاك كل ده؟؟!!!

- أوبة واعتذرلي كمان وطلب مني إني أسامحه... وأقف جنبه لحد ماينساها... ووعدي إنه مش هبخاطر بالدخول في أي علاقة تاني حتى لو كانت صداقة، وابتدى فعلاً يتغير للأحسن ويهتم بيا وبالولاد... وأنا ساعتها انتهرتها فرصة وطلبت منه نشترى شقة كبيرة في مصر الجديدة على أساس إن الولاد بتكبر كل يوم ومحتاجين شقة أوسع....

ووافق...؟؟

- جدًّا، ورحب كمان، وبالفعل دفعنا كل الفلوس اللي معنا مقدم ليها وابتدينا نقسط الباقي، على أساس إننا هنستلمها بعد سنتين... بس بصراحة القسط كان واخذ معظم دخلنا، وانا قلت مش مشكلة آهي حاجة تشغله وخلص...

ها وبعدين.....

- مفيش....فضلنا على كده حوالي سبع شهور... لكن فجأة ابتديت أشم نفس الريحه القديمة... رجع تاني يسرح ويتوه في الكلام... الأقيه

شوية مبسوط بدون مناسبة، وشوية مشدود ومكتئب... وابتدى تاني يشتري لبس كثير ويبالغ في الاهتمام بنفسه... واللي لفت نظري أكثر إنه صبغ شعره واشترك في الجيم وكان دايمًا متضايق أوي من موضوع كرشه... كمان ابتدى يشتكي إن قسط الشقة كبير وإنه يفكر يتراجع ويشتري شقة أصغر أو يأجل الموضوع شوية...

وانتي عملتي إيه؟؟؟

□

- طبعًا أنا كنت حاسة إن الأعراض دي سببها نزوة تاني، لحد ما (منال) صاحبتني شافت جنبه في العريية واحدة ست في طريق صلاح سالم...

□ طبعًا المرة دي واجهتيه...!!

- طبعًا مهو مش كل مرة... هو أنا خلاص يعني معنديش كرامة...

□ وقاللك إيه...؟؟

- طبعًا أنكر... وقاللي إن أكيد منال اتخيلت بواحد تاني غيره، وإنه يوميهها مكنش في القاهرة من أصله... أنا ساعتها رجعت لمنال وسألتها إذا كانت متأكدة إنه كان جوزي ولا لأ؟ بس هي اترددت وقالتي إنها مش متأكدة أوي... بس أنا كنت واثقة إنها مش عايزة تخرب البيت... وطبعًا مكنش أدامي غير إنني أسكت وأصدقه... بس كنت واثقة من جوايا إن فيه حد في حياته... وعلى كده قعدت أكذب على نفسي وأرفض إنني أصدق كل اللي شيفاه حواليا لحد مجالي من شهرين وطلب نقعد مع بعض في مكان لوحدنا بره البيت...

□ طبعًا انتي توقعتي هيقوللك إيه...؟؟

□

- تقريباً... بس كنت فاكرة إن الموضوع زي المرة اللي فاتت، يعني هيعترفلي بنزوة ويعلم ندمه ويطلب إنني أسامحه... لكن للأسف الموضوع طلع أكبر من كده بكثير...

□ طلب يتجوز عليكى...؟؟.

- أبوة... بمنتهى البجاجة...!! زي ما أكون واحدة صاحبتة وبيأخذ رأيها في موضوع خاص بيه... قولتله طبعاً البننت اللي منال شافتها معاك... حلفلي إن مش هي، وإنه مفيش أصلاً واحدة... بس هو محتاج لزوجة تانية... قولتله طب وانا مقصرة معاك في إيه...؟؟ قاللي الموضوع مالوش أي علاقة بيكي... وإنه بيحبني جداً وإني ست مكتملة ومفيش أي عيب... لكن المشكلة في احتياجه هو، وإنه خايف يقع في الغلط، وأحسن له إنه يرجع لشرع ربنا ويتجوز...

□ وردك كان إيه...؟

- أنا كنت بتقطع من جوايا، ولولا إننا كنا في مكان عام كنت صرخت ولميت الدنيا عليا... بس قلت أعمل بنصحتك واتعامل بهدوء... قتلته إنني مش زعلانة وإني مبسوفة إنه بيعترفلي أحسن ما كان يعمل حاجة من ورايا... وقولتله كمان إنني حاسة بيه... لكن طلبت منه يشيل الموضوع من دماغه لمدة شهرين تلاثة... يمكن يكون مجرد هاجس أو احتياج مؤقت... وقاتله طالما مفيش واحدة معينة في حياتك يبقى نسيبها للظروف وفهمته كمان إن الرجل المتجوز اللي عنده عيال وفي السن ده مش بسهولة هيلاقى واحدة ترضى بيه... وفي نفس الوقت تكون ليها مواصفات كويسة... هو طبعاً اتبسط من كلامي وقاللي عندك حق...

لمزيد من الكتب الحصرية ..

جروب مصير الكتب

FB.com/groups/Book.juice

(هي مين دي اللي ممكن ترضى بيا وانا داخل على الأربعين)
ووعدي إنه هيجاول يشيل الموضوع من دماغه... بس طلب مني
مزعلش لو فشل واضطر يفكر في الموضوع تاني...

□ طيب لحد كده كويس... إيه بقى اللي جد؟؟

- ما أنا كنت فاهمة كده وخصوصاً بعد معاملته الجديدة معايا والهدايا
والفسح والكلام الحلو، حاجات معملهاش من أيام الخطوبة.

□ يعني ربنا هداه وشال الموضوع من دماغه...

- منا بقولك كنت فاكرة زيك لحد إمبارح...

□ إمبارح.....!! إيه اللي حصل؟

- رجع من الشغل... أخذني في حضنه وقاللي إنه بيحبني أوي...
وسكت شويه... ودخل المطبخ... وبعد كده رجع ودخل الحمام...
وقعد يلف في الشقة، وبعد كده رجع تاني ووقف أدامي وقاللي (هند
أنا متأسف... أنا حاولت كثير بس مش قادر ولازم أتجوز) قتلته
إزاي إحنا مكملناش شهر... يعني محاولات إيه اللي عملتها?...
وبعدين مش فاهمة هنتجوز مين ولا ناوي تنزل تدور في الشارع
على واحدة تتجوزك... قاللي... لأ... منا خلاص لقيتها... أنا طبعا
حسيت إن الأرض بتلف بيا وكأني بحلم... قعدت ساكنة دقيقة كده
وبعدين مسكت نفسي وقلته بابتسامة واحدة بتموت... (ولقيتها فين
دي وإمتي؟)... قاللي أبدا... دي عميلة عندنا في الشركة... واحدة
كده على أدها... أرملة وعندها طفلة ومش حلوة خالص... يعني
واحدة وخالص...

□ ها... عمليتي إيه؟؟

- أبدأ... هعمل إيه... قولتله أرجوك تسبيني دلوقتي...

□ أنا مش مصدق إنك قدرتي تتماسكي كده بعد كل اللي سمعته!؟

- فعلاً أنا معرفش إزاي قدرت أتماسك... الذهول خلاني مش عارفة لا أفكر ولا أتكلم، طب انت عمرك حسيت إنك بنتحدف من فوق برج ونازل ببطء وشايف تحتك أسياخ حديد ومتوقع كل واحدة من دول هتدخل فين في جسمك انت عارف!!! ساعتها الموت بيبقى أكبر أحلامك... لأن لحظة انتظارك للموت بالطريقة البشعة دي بتبقى سنين طويلة... انت عارف يعني إيه تحس إن حنت من جسمك بتتسرق منك وانت صاحي... يعني واحد يقطع قلبك ويرميه، وبعد كده يشيل الرئة وبعد كده الكبد... معرفش... هو شعور صعب أشرحهولك، أنا مش متخيلة إزاي جاله قلب يعمل فيا كده... طب فين الحب... فين العشرة... فين السنين الصعبة اللي عشناها مع بعض... كإني مكنتش شريكة فيها... كإني كنت ضيف في حياته ولازم أمشي علشان أوسع لواحدة تانية... واحدة تيجي تاخذ كل حاجة على الجاهز... تاخذ شبابي وحياتي وجوزي... والمفروض دلوقتي إني أنسحب بمنتهى الحب وأقوله اتفضل ربنا يوففك... يلا استمتع وعيش شبابك من جديد... مش مهم أنا... أنا في داهية... طالما فيه واحدة جديدة... إيه لزمتي... النجاح خلاص وحققته... الولاد وخلاص خلفتهم. وكبروا... إيه بقى دوري... لازم أنسحب مش لازم يعني أبقى ضيفة ثقيلة...

□ كفاية يا هند... كفاية أرجوكي...

- كفاية ليه... مش من حقي أتكلم كمان، ولا لازم أكون مؤدبة وأمشي وأنا ساكتة... يا أخي ده المذنب اللي محكوم عليه بالإعدام ببسألوه

من باب الرحمة نفسك في إيه... أنا بقي مأذنبتش ومحكوم عليا
بالإعدام ومش عايزني أقول نفسي في إيه... نفسي أنكلم... نفسي
أصرخ... نفسي أقوله انت كذاب... كدبت عليا... وعدتني بالحب
والحياة... وعدتني إننا هنكبر مع بعض... ونشيك مع بعض ونفرح
بالولاد مع بعض ونشيل ولادهم مع بعض وفي الآخر هنموت جنب
بعض على نفس السرير... وحلفتني ممتش قبليك علشان متحسش
بالوحدة من غيري... ليه دلوقتي بتحكم عليا بالاتنين مع بعض...
الموت والوحدة... لأ... ده ماكنش اتفاقنا... انت كدبت عليا....

هند خلاص من فضلك... بلاش تعملي كده في نفسك أنا هتكلم
معاه...

- إيهاب أرجوك من غير ما تتكلم معاه... أنا خلاص أخذت القرار...
خليه يتجوز... بس يطلقني الأول....

□ طب يا هند... أنا أوعدك إني هعمل كل اللي انتي عايزاه... بس
هكلمه الأول وبعد كده أرجعك... سلام دلوقتي وحاولي تمسكي
نفسك...

لمزيد من الكتب الحصرية ..

جروب عصير الكتب

FB.com/groups/Book.juice

- ألو... إزيك يا هنداوي... أخبارك إيه...
- الحمد لله... أنا كويس وانت... طمني عليك..؟
- أنا كويس... المهم انت متأكد إنك كويس؟؟
- أه... واضح إن هند حكيتلك؟؟
- إيه زعلان إنها حكنتلي؟؟
- لا بالعكس... مش زعلان خالص... ده طبيعي إنها تحكيك وتحكي لطنط وعمو كمان... لأن دي حاجة مش هتستخبي وأكيد كلكم هتعرفوا.
- يااه ده انت عامل حسابك لكل حاجة... بس ممكن أسألك سؤال...
- اتفضل!!
- الست اللي انت عايز تتجوزها... هي نفس الست اللي شافتها معاك منال مش كده؟؟
- شوف يا إيهاب... انت بالذات مينفعش أخبي عليك حاجة؛ لإني بعتبرك أخويا الكبير... ومش لازم مهما حصل نخسر بعض.
- لا طبعًا عمرنا ما نخسر بعض. على الأقل كأصدقاء لأنني عمري ما اتعاملت معاك كجوز أخت... كنت دايماً شايفك أخ وصديق، بس أنا زعلان من الطريقة اللي استخدمتها مع هند...
- أنهي طريقة؟؟

- يعني واضح إن البننت دي في حياتك من فترة طويلة وانت بتجهز للجواز منها بس خدعت هند...
- أبوة ده حقيقي... بس ياريت مكنش قتلها...
- لا طبعا... لإنني مينفعش أحطمها أكثر مهني متحطمة...
- صدقني يا إيهاب دي حاجة خارجة عن إرادتي، وعمري ما تخيلت إنني ممكن أفكر ولو مجرد تفكير إنني أتجوز على هند... بس هعمل إيه أحياناً بيكون الموضوع أكبر من قدراتك... بس أنا هشرحك إيه؟ مننا أكثر واحد في الدنيا ممكن يحس بحاجة زي كده...
- ليه يعني إشمعني أنا..؟؟
- انت نسيت إنك كنت بتنادي بالجواز الثاني لما عملت كتابك الأخير (برضه هتجوز ثاني).
- لا يا هنداي مش ناسي... بس أنا مكنش بطلب من الرجالة تروح تتجوز على ستاتها... أنا كنت بطلب من المجتمع يشيل الحظر والتجريم اللي عامله حوالين التعدد... علشان الراجل اللي تضطره ظروفه للجواز الثاني ميحسش إنه بيعمل حاجة غلط أو يضطر يلجأ للعلاقة المحرمة...
- طب ما أنا مضطر أتجوز ثاني...
- يعني إيه مضطر. من أنهي ناحية يعني... مراتك ست زي الفل وشايفة نفسها ولسه محتفظة برشاقتها، وأنوثتها ومش باين عليها من أصله إنها عدت الثلاثين، مهتميه بيك وبالبننت وبالولاد ست بيت

لمزيد من الكتب الحصرية ..

جروب عصير الكتب

FB.com/groups/Book.juice

وسيدة مجتمع... عارفة ربنا... عايز إيه تاني... ولا هي فراغة عين...

- إيهاب انت متحيز... انت غيرت أفكارك لما الموضوع بقى يمس أقرب الناس ليك... أختك "لازم تعترف بكده"

□ هنداوي بلاش تستهبل... انت عارف إن هند مش أختي، ولا حتى انت جوزها، وفاهم كويس إنكم مجرد أسماء وهمية لشخصيات وهمية أنا اخترتها وخليتها تتكلم.

- طيب لما انت بتعترف إننا شخصيات وهمية "يبقى إحنا بنتكلم بلسانك وانا بالذات... يعني انت بتناقض نفسك وكتابك...."

□ يا بني آدم افهم... أنا معملتش الكتاب ده علشانني ولا علشانك، أنا عملته لإنني خفت على جزء من الدين ليضيع... وشفيت عواقب ده بعنيا... شفيت بلاد مسلمة زي تونس في عهد المخلوع (بن علي) بتحرم التعدد وتحلل الزنا، وشفيتها عدوى بتنتقل من بلد للثانية زي المغرب وغيرها من الدول المسلمة... خفت على الرجل اللي نفسه يعدد لإن مراته أهملته وأهملت نفسها وبقي وزنها فوق الميت كيلو، ومبقاش عندها أي إحساس برجولته ولا أنوثتها... شفيت الرجل ده وهو بيتقطع ونفسه يتجوز تاني ويعصم نفسه وهو مليون طاقة وشباب... لكن مراته وأهلها رافضين والمجتمع بيحذره وبيهدده... خفت كمان على الرجل اللي مراته مشغولة عنه بأحلامها ومستقبلها وطموحاتها، شفته وهو رقم ١٠ في حياتها شفته وهو بيدور على البيت والسكن والزوجة... على اللقمة السخنة في البيت، على الزوجة الأنثى، شفته وهو مش لاقى حل غير إنه يصاحب أو يغلط، خفت يا هنداوي على الرجل اللي مراته لسانها طويل ومنكدة عليه

عيشته وهو مش لاقى حل، خفت على الأرامل والمطلقات والعوانس
ميلقوش شباب يتجوزوهم. وقلتلهم إيه المانع تشاركوا واحدة ست
عندها دين في جوزها بس بإرادتها مش غصب عنها... عملت
الكتاب ده علشان التعدد ميتحرمش في يوم من الأيام أدام عينها
وربنا يسألنا عنه... معملتوش علشانك ولا علشاني ولا علشان أتحيز
للراجل. عملته علشان يفضل التعدد رخصة مسموحة ومرهونة
بالأسباب، زي صلاة القصر... مينفعش حد يحرماها ويقول أصلها
مش كاملة، وينسى إن ليها وقتها وظروفها... معملتشوش يا هنداوي
علشان الرجالة اللي عايزة تتدلع وتدور على مبرر تستخبي وراه
وتتعرف كل يوم على بنت وتصاحبها وتقول إنها بتدور على زوجة
تانية... ولا عملته علشان راجل يتجوز كل يوم واحدة عرفي وفي
السر وبعد كده يطلقها ويتجوز غيرها بعد ما يسرق شبابها
وحقوقها... فهمت يا هنداوي...

- أيوه بس أنا حالة متكررة في رجالة كثير، حالة محتاجة الجواز
التاني لاحتياج جسدي، وانت خايف تعترف بيها، رغم إنك عارف
اللي أنا حاسس بيه...

□ عارف عايز تقول إيه؟؟... تحب كمان إنني أتكلم بالنياية عنك، عايز
تقول إن جواك طاقة مشاعر وطاقة رغبة وطاقة شباب وحياة
وجنون وتمرد. عندك حنين لنزوة في الحلال وحاسس إن دي آخر
فرصة تلحق بيها شبابك اللي خلاص بيودع... تعبان إن قدراتك
بتتلاشى وبتصدي وحاسس إنك أقوى من كده... وواثق إن المتهم
الحقيقي في حالتك دي هي الرتابه والملل والتكرار. نفس المرأة
بنفس الجسم ونفس الصوت والإحساس. كل حاجة هي... هي...
مفيش جديد... الحماس بيقل والرغبة بتقل واللذة والمتعة بتروح...
حاسس إن المرأة الجديدة هي اللي هتصحي كل حاجة فيك وترجعك

كل قدرتك اللي مستخبية، وتحسسك إنك لسة في قمة عنفوانك...
صح يا هنداوي ولا غلط...

- أيوه صح... عرفت بقى إن كلنا نفس الرجل.

□ أيوه بس كلنا نفس الرجل الكداب الأثاني... محدش فينا عايز يدفع الفواتير... لا عايز يدفع الفاتورة القديمة ويسدد لمراته تمن شبابها ووقوفها جنبه إمبراح وتمن جرحها وانهارها النهاردة... ولا حتى عايز يدفع الفاتورة الجديدة للست الجديدة ويوفرلها حياة زوجية كاملة، يعني كلنا مش عايزين مسئولية ثاني ولا مصاريف ثاني ولا عيال ثاني... عايزين عشيقة في الحلال، واحدة متفرغة لينا... نروح ليها وقت محنا عايزين ومش مهم هي إمتى تعوزنا... عايزين واحدة ببلاش بدون تكلفة ولا شقة ولا حتى ضمانات تحميها من بكرة... كفاية عليها شقة إيجار جديد أو حتى لوكاندة، مهني فترة وهنزهق... مش عايزين منها عيال ولا مشاكل، مش عايزين أي مسئوليات... ولا ضغوط منها ولا من الأولانية... مش عايزين وجع دماغ... عايزين وقت الرغبة نجري عند الجديدة تنفرج على حفلة رقص خاصة ونتخلص من الرغبة ونرجع بسرعة نحلي بالفضيلة في البيت الأولاني... مش هو ده يا هنداوي اللي إحنا عايزينه...

- فعلاً... بس انت ليه اعترفت، انت كده دمرت التعدد من جذوره.

□ لأ يا هنداوي أصل مش ده التعدد، مش ده الجواز الثاني اللي ربنا شرعه. لازم اللي يتجوز ثاني يكون راجل بجد، ويكون مضطر زي ماقولتلك إنه يتجوز لأن معدوش أي حل غير كده، راجل بجد أمين على بيته وولاده، واثق إنه قادر على دفع الفوتير كلها... مش ناوي

لمزيد من الكتب الحصرية ..

جروب نصير الكتب

FB.com/groups/Book.juice

يخلي حد يدفعها بالنيابة عنه، مش ناوي يهرب من المسئوليات
ويكتفي بالمتعة بس... صح يا هنداوي.

- طب خلاص، تاهت ولقيناها... أنا هتجوز وأعدل بينهم... يعني
هدفع الفواتير وأورليك إني راجل بجد.

□ يا ابني... مهني مش حرب، ده جواز وانت معندكش أي مقومات
تساعدك على الجواز الثاني... يعني معندكش وقت بسبب ساعات
شغلك الطويلة ودخلك الضعيف ومش تعرف تفتح بيتين، ده غير
إن ولادك في مرحلة صعبة ومحتاجينك جدًا، ناهيك عن علاقتك
الرومانسية بهند واللي بسببها مستحيل هتقبل تكمل معاك
وهتصمم على الطلاق.

- خلاص يبقى في الحالة دي قرارها مش قراري...

□ يااه للدرجة دي بيتك بقى سهل عليك... ومراتك وولادك مبقاش
ليهم أي قيمة عندك... يا هنداوي انت بتضيع كل حاجة علشان
نزوة.

- مش نزوة يا إيهاب... مش نزوة...

□ يا أخي حتى ولو كانت حب حقيقي... برضه ميستهلش تضحي
علشانها بكل اللي حققته طول حياتك... صدقتي هتندم... والله
هتندم... أرجوك ضحي علشان بيتك واصبر واستحمل واحلفلك
إن الحالة دي هتنتهي بعد سن الـ ٤٥... وهتشوف...

لمزيد من الكتب الحصرية ..

جروب مصير الكتب

FB.com/groups/Book.juice

- إيهاب أنا أخذت القرار... أنا هعيش علشان نفسي. كفاية أوي عليهم كده أنا ضيعت عمري علشانهم...

□ يااه فكرتني بقصيدة خدناها زمان في المدرسة كان اسمه (التينة الحمقاء)، شجره تين يا هنداوي قررت تعيش لنفسها بس، وقالت (كم ذا أكلف نفسي فوق طاقتها وليس لي بل لغيري الظل والثمر، إني مفصلة ظلي على جسدي فلا يكون به طول ولا قصر، ولست مثمرة إلا على ساقِي فلا يأتيني طير ولا بشر) لكن للأسف البستاني مقدرش يستحمل شكلها بعد ما أصبحت وتد ملوش ورق ولا فروع ولا حتى ثمر وقال يقطعها ويتدفا بخشبها أحسن (فاجتسها فهوت في النار تستعر) أنا شايفك دلوقتي كده... خلاص يا هنداوي اعمل اللي انت عايزه... وأنا من بكرة راجع القاهرة وهخلص الموضوع بنفسِي... سلام.

لمزيد من الكتب الحصرية ..

جروب عصير الكتب

[FB.com/groups/Book.juice](https://www.facebook.com/groups/Book.juice)

عودة الأخ الضال

□ هند أنا متأسف سامحيني... كان لازم آجي من زمان وأكون جنبك بس للأسف أنا زي اخوات كثير بيعيشوا لنفسهم وينسوا كل اللي حواليه، أرجوكي سامحيني... وأعدك إنني مش هسافر تاني وهاكون دايماً جانبك...

- حمدالله على السلامة يا إيهاب... وحشتني أوي... بجد كنت محتجالك أوي... ورغم إنك كنت بتكلمني على طول... لكن وجودك جنبي بجد حسسني بالأمان...

□ على فكرة بيتك جميل أوي...

- تقصد اللي كان بيتي...

□ يعني إيه...؟؟

- إيهاب أنا خلاص قررت اتطلق...

□ هند أرجوكي فكري تاني. موضوع الطلاق ده مش سهل ولو هنداوي مصمم يتجوز... يبقى سيبويه يعمل اللي هو عايزه وعيشي لولادك، وأحلفك إن بكرة هيرجع ندمان.

- انت بتقول إيه... يعني أفضل على ذمته وهو عايش مع واحدة تانية؟؟

□ أنا عارف إنه صعب، بس علشان خاطر أولادك... وأنا واثق إنك هتسترديه تاني.

- يعني إيه ولادي... طب وأنا فين... فين مشاعري وأعصابي؟

- هند أنا متأسف إني بقولك الكلام ده... بس انتي فعلاً لازم تفهمي انتي داخلة على الأربعين ولا يمكن هتفكري تتجوزي تاني، كمان عمرك مهتسحلي الحياة من غير جوزك... ولا هتستحلي نظرات الناس ليكي كمطرفة ولا نظرات الرجالة الطمعانة ولا شماتة الحاقدين... صعب يا هند... صعب تواجهي الحياة لوحديك ومستحيل هتقبلي إن راجل تاني يلمسك أو يدخل على ولادك... كمان صعب تنسي ذكرياتك وصعب إن ولادك يعيشوا بدون أبوهم... وبنتك تتجوز في يوم من الأيام من غير ما يكون جنبها... صعب تحطميهم وتخليهم يختاروا يعيشوا مع مين فيكم... أرجوكي متعمليش زي جوزك وتفكري في نفسك بس...
- إيهاب أنا أخذت القرار أنا هعيش علشان نفسي وبس.

- يااااه نفس الجملة اللي ختم بيها هنداوي كلامه معايا، - كلنا نفس التينة الحمقاء... وبرغم إن هو اللي ظلم وابتدى، لكن انتي برضه اخترتي نفسك وبس، انتم الاتنين أنانيين مبتفكروش غير في نفسكم ... طب ليه من الأول خلقتوا عيال ووعدتوهم بالأمان والسعادة، صدقيني يا هند انتي وجوزك هتندموا وبكرة هفكركم.

- إيهاب أرجوك كفاية بقى أنا محتاجة ننهي الموضوع ده بأسرع ما يمكن... وياريت تكلمه وتخليه يجيب المأذون معاه وهو جاي...

- حاضر يا هند... هاكلمه... بس أنا كان نفسي تفكري شوية.
- طب يا إيهاب لو سمحت استنى ثواني علشان التليفون بيرن يدخل أرد عليه وارجعلك تاني.

□ اتفضلني...

.....

- الو... أيوه... مين معايا... لا مش ممكن... حصل إزاي ده...
يا رب استر... يارب استر... طب أنا جاية حالاً.

□ إيه يا هند... في إيه وبتعطي لي كده.

- الحقني يا إيهاب، معاذ ابني عمل حادثة وهو جاي ونقلوه
المستشفى الخاصة اللي على آخر الشارع.

□ طب اهدي... إن شاء الله تكون بسيطة... البسي بسرعة وأنا هكلم
هنداوي يحصلنا.

في المستشفى

هنداوي:- إزاي ده حصل يا إيهاب أنا لسه مكلمه من ساعتين.
إيهاب:- معرفش... أنا سمعت الخبر زيك وجبت هند وجيت على هنا.
هند- يارب جيب العواقب سليمة.
إيهاب:- استني يا هند... أهو دكتور طارق جاي وأكيد هيطننا... إيه
الأخبار يا دكتور أرجوك طمني.
د/ طارق:- أنا مش عارف أقولك إيه يا إيهاب بس الحالة فعلاً مش سهلة
مش عارف هقدر أعمل حاجة ولا لأ... ربنا معاه...

هند:- يعني ايه... يعني ابني ممكن يروح مني... لأ يا دكتور أرجوك...
اعمل أي حاجة... يارب... يارب... خد عمري بس رجعهولي.
هنداوي:- أرجوك يا دكتور طارق حاول تنقذه بأي طريقة... ده كل
حياتي مطلعتش من الدنيا غير بيه... دا أنا ممكن أبيع حياتي وكل ما
أملك بس أشوفه واقف على رجله...
إيهاب:- شوفت يا هنداوي إن حياتك مش أعلى حاجة عندك، وإن في
ناس أعلى منها... أعلى من رغباتك واحتياجاتك... وانتي يا هند...
عرفتي قيمة عمرك اللي فات عرفتي إن فيه في حياتنا ناس ممكن
نضحى علشانهم.

هند وهنداوي:- أيوة يا إيهاب عرفنا بس بعد ايه؟؟؟
دكتور طارق:- خلاص بقى يا إيهاب لحسن دول هيموتوا من الخضة
قولهم الحقيقة بقى.

إيهاب:- خلاص يا دكتور طارق علشان خاطر ك... اتفضلي يا هانم انتي
وجوزك... ابنكم في البيت، سليم، محصلوش حاجة... أنا بس قررت
أعمل فيكم فيلم عربي، واتفقت مع دكتور طارق إننا نعلمكم درس
عمركم ما هتنتسوه.

هند وهنداوي:- يعني ايه مفيش حادثة ولا حاجة ومعاذ سليم بجد.
إيهاب:- أيوة مفيش حادثة... اتفضلوا ارجعوا بيتكم، بيتكم الدافي يا هند
بيتكم الدافي يا هنداوي واحضنوا الولاد والحيطان... بوسوا كل ركن في
الشقة وازرعوا فيها شجرة حب جديدة، افرحوا بولادكم وهما بيكبروا
أدام عنيكم يوم بعد يوم... واحلموا تشيلوا ولادهم... وفي آخر الرحلة
اضحكوا واحضنوا بعض أوي، وخذوا آآآآ آخر نفس من الدنيا مع
بعض... هتوحشوني أوي... سلام....

.....
دي حكاية هند وهنداوي، حكاية كل بيت عندنا، وياما جوا البيوت
حكايات، بس الذكي اللي يفهم إنها حكاية متشابهة ومتكررة، يعني مش
هو بس اللي عايشها، والشاطر اللي يستمتع بيها زي ما هي، ومش
عيب إنه يحاول يخليها أحسن، بس العيب إنه ييأس أو يهرب ويسيب
وراه حكاية اختار يدخلها بإرادته وناس وافقوا يدخلوها معاه.....

عصير الكتب

Facebook.com/groups/Book.juice

هذا الكتاب حصري على جروب عصير الكتب

انضم الينا لتحصل على كل ما هو جديد

الرجال من المريخ النساء من الزهرة د/جون جراي مكتبة جرير
المريخ والزهرة معاً إلى الأبد د/جون جراي مكتبة جرير
كيف تنقذ علاقتك الزوجية من الانهيار د/فيليب ماكجرو مكتبة جرير
كيف تسعد زوجتك قبل فوات الأوان د/جاري سمولي مكتبة جرير
أساسيات إدارة الزواج مايكل اتش ما كان مكتبة جرير
المبادئ السبعة الأساسية لإنجاح الزواج د/جون أم جوتمان مكتبة جرير
الزواج المثالي د/فان فلد المكتبة الثقافية بيروت
نسيان دوت كوم أحلام مستعماني دار الأدب بيروت
مواقف محرجة في شهر العسل عبد المطلب حمد عثمان دار طويق الرياض
الأسرار الخفية في الحياة الزوجية محمد السيد الخولي دار اليقين
العشرة بالمعروف بين الزوجين أسامة نعيم الناعسة دار الحضارة
زوجي أنت السبب محمد صالح إسحاق دار الحدث الرياض
الطرق إلى السعادة الزوجية د/عبد الله أحمد الأعلام دار الطرفين الطائف
هدية إلى كل عروسين هبة سيد عبد العاطي دار ابن الهيثم
يوميات اتنين مخطوبين د/ عبد الله حامد البحيري دار الكتب
زوجان في الجنة جمال ماضي دار الصحوة
مجموعة د/عادل صادق متاعب الزواج دار الصحوة
روعة الزواج دار الصحوة
الزوج أول من يشكو دار الصحوة

امراة في محن دار الصحوة
إجمالي مجموعة مقالات دكتور محمد المهدي على المواقع المختلفة

للتواصل مع الكاتب

<http://www.facebook.com/ehab.meawad>

ehab.meawad@hotmail.com